

**NINTH MIZORAM LEGISLATIVE ASSEMBLY
(FOURTH SESSION CUM BUDGET SESSION)**

LIST OF BUSINESS

FOR EIGHTH SITTING ON TUESDAY, THE 11th MARCH, 2025
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPER

2. **PU LALCHHANDAMA RALTE** to lay on the Table of the House a copy of Statement on Actions taken by the Government on the Further Recommendations contained in the Third Action Taken Report of Public Accounts Committee relating to Sports & Youth Services Department.

PRESENTATION OF REPORTS

3. **PU LALCHHANDAMA RALTE** to present to the House the following Reports of Public Accounts Committee :
 - i) Fourth Report on Actions Taken by the Government against the Recommendations contained in the First Report of Public Accounts Committee (2024-2026) relating to Public Health Engineering Department.
 - ii) Fifth Report on Actions Taken by the Government against the Recommendations contained in the Second Report of Public Accounts Committee (2024-2026) relating to Labour, Employment, Skill Development & Entrepreneurship Department (MYC).
4. **PU LALFAMKIMA**, Deputy Speaker to present to the House the Third Report of House Committee relating to amendment of Sub Clause 4(c) of Clause 2 of the Terms and Conditions of Allotment and Accommodation of Members in the Legislators Home, Tuikhuahtlang.

OFFICIAL RESOLUTION

5. **PU B. LALCHHANZOVA**, Minister to move an Official Resolution in the following form :
WHEREAS the land acquisition law of the State, i.e., "The Mizoram Land Acquisition, Rehabilitation and Resettlement Act, 2016" has been set aside and held inapplicable in the State of Mizoram by the Hon'ble Gauhati High Court;
AND WHEREAS there are a number of land acquisition process pending in the State which require application of valid land acquisition law;

AND WHEREAS clause (a) of Article 371G of the Constitution provides, inter alia, that -

"Notwithstanding anything in this Constitution, -

No Act of Parliament in respect of-

- i) Religious or social practices of the Mizos,
- ii) Mizo customary law and procedure,
- iii) Administration of civil and criminal justice involving decisions according to Mizo customary law,
- iv) Ownership and transfer of land,

Shall apply to the State of Mizoram unless the Legislative Assembly of the State of Mizoram by a resolution so decides. "

AND WHEREAS "The Right to Fair Compensation and Transparency in Land Acquisition, Rehabilitation and Resettlement Act, 2013" is an Act of Parliament which extends to the whole of India. As required by clause (a) of Article 371G of the Constitution, the Act has to be made applicable in the State of Mizoram by official resolution passed by the Legislative Assembly of Mizoram in its session;

AND WHEREAS the implementation of the Central land acquisition law, i.e., "The Right to Fair Compensation and Transparency in Land Acquisition, Rehabilitation and Resettlement Act, 2013" in the State will result in the benefits of the landholders and any other affected persons such as:

- i) more solatium to be awarded in the total compensation;
- ii) multiplication factors of land value which drastically enhance the amount of compensation;
- iii) equal value land or developed land compensation for acquisition of land in respect of irrigation projects or urbanization purposes;
- iv) more beneficial subsistence grants and one-time resettlement allowances;

NOW, THEREFORE, this House resolves –

That the Official Resolution may be passed by the Mizoram Legislative Assembly for adoption of "The Right to Fair Compensation and Transparency in Land Acquisition, Rehabilitation and Resettlement Act, 2013" to be applicable in the State.

FINANCIAL BUSINESS

6. **GENERAL DISCUSSION** on the Budget for the year 2025 – 2026
(to be concluded).

VANLALTHANTLINGI
Commissioner & Secretary

SPEAKER : *Ram chu Lalpa ta a ni a, Hnam tin chung a roreltu a ni si a.*
- Sam 22:28

Nimin tin dawnah khan ka sawi ang ka ti a, mahse kan awm lo deuh ta duak a; ka'n sawi tho ang a, Tuirial bialtu MLA zahawm tak khan 'kan nuin thu min chah a, i ti lutuk ang e' min ti a', a ti a. Pu Dawngtea hi MNF camp-ah chuan 'nupui ngam ber' tia sawi kha a ni a, a chah ang khan a sawi ta em? Nge ni, a sawi chiah lo deuh? Nizan a haw kha vuak te a tuar em, tih hriat a chakawm khawp mai.

QUESTIONS & ANSWERS:

Aw le, Zawnha leh Chhanna kan la ang a, Starred Question No. 102 - zawt turin member zahawm tak Dr. K. Beichhua i sawm ang. (**Pu C. Ngunlianchnunga**: Starred Question 101-na kha keimah ka nia.) Min hrethiam teh u; ngaihdam ka dil e.

Starred Question No. 101: Electric Veng Middle School, Lawngtlai chungchang.
Zawnha Neitu: Pu C. Ngunlianchnunga, Lawngtlai West Bialtu.

PU C. NGUNLIANCHUNGA: Pu Speaker, ka lawm e. Mihring chu tusual thei vek kan ni alawm. Starred Question No. 101 - Education Minister chhan atan ka zawnha chu -

- a) Tun Sorkar kal mekah hian Samagra Shiksha atangin Electric Veng Middle School, Lawngtlai hi repair/renovate a ni em?
- b) Repair ni ta se, sanction amount eng zat nge?
- c) Plan leh Estimate kimchang min pe thei em?
- d) Tunge Work Supervisor?
- e) Plan leh Estimate ang thlap a siam/sak a ni em?
- f) A eng laite nge siamthat/thlak a nih kimchang takin min hrih thei em?
- g) Pawisa a full a pek a ni tawh em?
- h) Thawh zawh ni ta se, he Sorkar kal mek hi he hnathawhah hian a lungawi tawk em?

SPEAKER : A chhang turin School Education Minister Dr. Vanlalhlana ilo sawm ang.

DR. VANLALTHLANA, MINISTER: Pu Speaker, ka lawm e. Lawngtlai West bialtu MLA zahawm tak Pu C. Ngunlianchnunga zawnha chhanna kha a thui deuh hlek dawn a. A zawnha chhana

- a) Aw ni e.
- b) ₹18.689 lakh.
- c) Thei e Annexure I ah enclosed a ni. Kan pe dawn a. (Pu Speaker, Annexure hi chhiar chhuah i ti nge, a thui khawp mai a.) A chhanna hi kan pe mai ang e.

Tin, Pu Speaker, ka chhan laiin sawi lawk ka duh chu, term hmasaah khan zawnha thui lutuk hetiang ang chi hi phal kha a ni ngai lo a, pali velah hian min reh bun sak thin a, hei pawh hi a thui khawp mai a, Annexure te, nen a awm a. Starred question leh Unstarred ah hian tlemin senior te a ni tawh a, han thliar hram se tih ka rilruah a awm a. Tin, term hmasa lamah pawh khan phal ngai loh thin a ni a, hetiang a zawnha chhawng tam lutuk hi. Chu chu ka'n tarlang ve hrim hrim a ni.

- d) Supervisor hi Pu R. Muanchhunga a ni a.

- e) Aw ni e.
- f) Hei pawh hi Annexure kan han ti leh a, a chhanna kan in pe leh mai dawn a nakinah. Annexure hi I leh II a awm a, ka'n tarlang law law ang e.

Headmaster office siam dan turah hian a chung hi rangva a thlak tur a ni a, staff room a tukverh zawng zawngah iron bar dah tur a ni a. Kawngkhar hi pakhat thlak tur a ni. Tin. tukverh ventilation pathum aluminum a thlak tur a ni a, school building hi rawng hnawih that tur a nib awk a. Tin, a skirting pawh rawng hnawih that tur a ni a. A building chhung hi rawng hnawih that tur a ni bawk a. (light dark tih te a number neuh neuh te a awm a, kha chu tarlang lo i la).

Tin, a chhak lamah toilet siama, headmaster room atanga luh theih tura siam tur a ni. Main gate hi thiah tur a ni a, a thar siam tur a ni. Tin, a chhuat hi plaster that tur a ni a, kawngkhar luh dawn side drain chungah RCC ramp siam tur a ni bawk a. Tin, a bang pawh hi plaster ngai a ni bawk a ni.

- g) Aw ni tawh e.
- h) Hna hi thawh zawh a ni a, hnathawh danah Sorkar a lungawi a ni tih a ni e.

SPEAKER : Zawhbelhna kan la ang a.

1. Pu C. Ngunlianchunga, (Zawhna neitu),
2. Pu V. Malsawmtluanga,
3. Pu K. Hramo.

PU C. NGUNLIANCHUNGA: Pu Speaker, ka lawm e. Kan member zahawm takin a sawi kha a dik viau a. Sorkar hmasa lamah khan zawhna sei deuh chhan har deuh tura ngaih chu keinin Starred Question ti mah ila Unstarred ah min lo leh sak te pawh a awm a. Hei, a nih ang angin min han zawh tir a, a lawmawm ka ti a. Annexure-te pawh kha nakinah min la pe se la.

Kha, kan sorkar kha 'a lungawi' a ti a, kan Minister khan. Pu Speaker, a hmunah hmu se a lungawi ang em, Kalphung-thar sorkar thil tha duh a nih si chuan. Pu Speaker, hetah hian a thlalak a awm a, a chhuat plaster tur te hi Lalruanga zak pawp a bel leh ang deuh nei-nuai te kha a ni a. Tin, Pu Speaker, a school office kha ft. 15X18 maia zau mai kha cheng nuai 9. Tin, chhak lamah a luhna siam tur a ni a ti a, khi khi a mangan thlak khawp mai a. Pu Speaker, hei hi nakinah House property-ah pawh ka pe ang a. Iron rod bar an siam te hi welding-a zawm a ni a, Pu Speaker, mangan thlak tak a ni an hnathawh hi. Hetianga hnathawh ah kan sorkar a lungawi a nih chuan Pu Speaker, kan ramah hian thil tha a awm a va rinawm loh. Hei hi a hmuna keimah ngei kala thla kan lak a ni a, House property-ah ka pe ang a.

Hemi bikah hian kan Minister zahawm tak hian pawisa kha lo pe tawh mah sela, kan hnung kar lamah khan kan Chief Minister, he House Leader zahawm takina 'hnathawk tha lo chu action kan la ang' a tih kha, a hmunah enin hei hi action laka siamthat leh tumna emaw, tihthat tumna emaw a awm thei ang em?

Pahnihnaah chuan, Mamte RMSA Higher Secondary School chungchangah All NGOs - YMA, MSU, MHIP, MUP leh ZPM Party Mamte Unit ten Ni 11 February, 2025 ah khan

a hnathawh, a rod 20 mm hman tur a nih laiin 16 mm a hmang te leh a brick hman te a chhe em em a, Pu Speaker, a brick hman thla te pawh ka nei a. Thawk tawh lo tura an hrilh hnu pawhin, a thawktu hi ZPM Gen. headquarters a Gen. Secretary ni lai Pi C. Lalrosangliani, ZPM President Personal Secretary niawm tak a ni. Chutianga lehkha engmah thawk tawhlo tura an tihnaah lehkha an pek hnu pawhin, ‘thawk rawh u, ka thu a ni’ a ti e, an ti a. An YMA signatory te ngei pawh hi keiman ka va bia a. Pu Speaker, kan Minister zahawm tak hian a hnathawk thalo hi action a la thei ang em? Kan sorkar tharin ‘hnathawk thalo chu action kan la zel ang’, si a. Hei hi House property-ah kan pe leh hrim hrim ang a.

Tin, Lawngtlai AOC Primary School-I hin ₹8,70,000/- a ni a. A chhuat siamthat tur a ni a, hei pawh hi a chhe lai chiah an siamtha leh a. Tichuan, a chokut thlak tur a ni a, a chhak lamah side-drain lai tur a nib awk a. Mahse, side-drain lai a awm lo; a hmunah ka mit ngeiin a hmu a ni. Tin, a partition te hi siam tur a ni a 3 mm in, a manganthlak khawp mai a, Pu Speaker.

Kan hnathawh dan hi kan ram (**Speaker:** khawngaihin a zawhna lai kha...) a chhe hle mai a. Sorkar hmasa pawh kha kan demna nilovin, hemi Samagra NABARD loan chungchangah khan keimah ngei pawh hi a kal ve a, ACB case te pawh a awmin ka hria a; department lam te pawhin tan an lak a ngai a ni. Hna hi thawk ila kan ramah hian, chu chu hmasawmna a ni. ZPM sorkar kan inzawrhnaah hian work culture hi a tha dawn a ni. Hei, hma an han la tan dek dek a, AOC Primary School-I te hi Pu Speaker, ennawn lehin, thawh tur an thawh lohna lai hi thawh that tir leh theih a ni ang em?

A tawp berah chuan, Mampui Primary Middle School-II hi chung rangva thlak tur a ni a; a lang lam an thlak a, a langlo lama thlak a ni lova. Pu Speaker, hetah hian a thlalak a awm vek a ni. Tin, a chhuat te pawh plaster-a, veranda ban te pawh siamthat tur a ni a. Electric Veng te pawh kha keini pawhin plan estimate kha kan nei a, a ban te thlak tur a nih laiin, thlak a ni lo a ni.

Kan Minister zahawm tak hi, khang ka zawhbelhnaa hnate kha siamthat tir leh theih a ni ang em, tih te kha ka zawhbelh a ni e. Pu Speaker, House property-ah pawh kan pe ve reng reng ang che, thlalak nen dap a awm e. Pu Speaker, ka lawm e.

PU V. MALSAWMTLUANGA: Pu Speaker, ka lawm e. Kan Education Minister zahawm tak Dr. Vanlalhlana min chhan atana ka zawhbelhna chu – “High field, Zarkawta Field chhawng Aizawl Smart City project hnuaiia sak mekah hian Education Department-in NOC engtikah nge a pek? PMJVK hnuaiia school awmsa tichhiaa residential school sak mekah hian eng ruahmanna nge awm? Eng anga kalpui zel tum nge a nih?” tih a ni e.

PU K. HRAHMO : Pu Speaker, ka lawm e. Kha Samagra sum hman chungchangah kan Education Minister hi tan a lak deuh chu a ngaiin ka hria. Sawi tur chu a tam a, mahse, khalam kha chu ka sawilo ang a.

India sorkarin Samagra Shiksha a introduce dawn khan frame-work fel taka siam a ni a. Chutah chuan, ‘lakh 30 hnuailam chu school management kutah dah tur; a chunglam chu tender tur’ tiin framework kha a siam a ni. Chumi hnuaiiah chuan kan State hian dan a siam ve ka ring a, ‘The Mizoram Samagra Governing Body’ kan ti dawn nge, Act/Rules a neih ve ngei ka ring a. SPD hnenah Act emaw, Rules emaw samagra chungchangah a copy te min pe ve turin ka dil a. Hei, kum khat a ni tawh a, tun thlengin min la pe thei lova. Chief

Secretary kal chhuak ta hnenah ka dil ve leh a, tun thlengin a copy ka la nei lova. Chuvangin, Samagra hnuaiyah hian Act emaw, Rules emaw State hian kan nei em? Nei ni ila, a copy min pe thei ang em?

SPEAKER : Awle; a lawmawm e. A theih ang anga chhang turin a changtu Minister Dr. Vanlalhlana ilo sawm ang.

DR. VANLALHLANA, MINISTER: Pu Speaker, zawhna a karkik viau a, a theih ang angin han chhang dawn ila.

Pu C. Ngunlianchunga, Lawngtlai West bialtu zawhna, Electric Veng Middle School, Lawngtlai repair chungchang hi keimahni pawhin kan ngaihven a. DPC pawh a va kal a, Headmaster hnenah pawh a va sawi a. Chutah chuan, toilet te pawh hmundangah sakna tur a awm tawh lova, a ngai an thawm tha a; a aiah gate siam thar tur tih te a chhanna annexure-ah khan a rawn lang a. Tin, a hmaa plan awm miah lo, a fencing te an tihbelh tir a. Chutiang chuan, tui bill te, electric bill te an pe a. Insiamremnain, 'helaiyah hian hetiang hian siam zawk mai teh a' an ti a. Hna thalo a awm anih chuan, kan siamthat tir thung ang.

Mamte RMSA chungchang kha sawi a tam khawp mai a, a school hi va en ila a thain ka hria a. A thawktu hi keini hriatah chuan Allied concern in a sa tih kha sorkar hriat chin a ni a. Nichina Pu Nguna rawn sawi kha chu kan hre ve lo, keini chuan. Chu chu allied concern pawh biak a ni tawh a, titha tura tih a ni a. A mimal ngeia call te pawh ka tum a, amaherawhchu, call an la thei miao lova. 'Action lak a ni dawn em' tihah chuan, kan ngaituah mek a. Tin, Lawngtlai AOC PS-I te, Mampui PS-II te pawh kha a tha lo a nih chuan kan endik ang a.

Pakhatah chuan, endiktute kha a hmaa inhman thote kha kan rochun ve a. MB atanga estimate pawh siam hleithei lo te an ni a, koh turin ka ti tawh a ni. A ti theilo a nih chuan, 'ani hi chuan helai hna hi khawih tawh suh se', tiin kan inhrilh a. Kha kha a Minister atanga ka sawi theih chu a ni a. A endiktu tur kan nei a, a endiktute'n an kawha an sawisel miao loh chuan, keinin sawlai va kal vang vanga va tih kha a harsa a. A zawhna zawttu pawhin a hria ang.

Hna tha kan duh a Pu Speaker, kan sawi lawk ang a, nikum May 24-ah order kan tichhuak a. Chutah chuan term hmasaa an tih ngai lovin ti ang, a hma te chuan completion certificate i sign loh chuan kan sawn dawn che tih kha an dawn a ni Headmaster ten. Keini order tihchhuah ah chuan hna a chhiat chuan completion certificate hi i sign tur a ni lo, tih a ni. Chu chu Pu Nguna'n a rawn zawhna tak kalphung thar chu a ni a. (**Pu C. Ngunlianchunga:** Pu Speaker, headmaster kha sign lo thei lovin an siam tlat a ni.) JE ten an sign a, Headmaster ten an sign a nih chuan JE te Headmaster te kha kan ko dawn a, tunah pawh kan ko khawm tawh a ni, chu chu kan duh dan a ni. Keinin mihring zawng zawng kan control thei lo, kan hria a.

Tin, tunah hian min hriatpui tura ka duh chu vskmizoram.com a awm a ni. Chu chu nikumah kan tlangzarh a dashboard system a ni a, khatah khan lo en ula, school tih thatna a awm a ni. School Education hnuaiyah hna hrang hrang a lang a. Khatah kha a hming a lang a, thawh tawhte, thawh mekte a rawn lang a. Tun session chhung ngei pawn ka va kal a, kan session zawhah khan lo la awm ru kan inti a, VSK Mizoram Control Centre-ah. Tun atang chuan electrification atangin in tan ang a, tuna school sak leh tur ho hi kar tin a

thlalak an rawn update tawh ang. Tin, a estimate emaw a siam tura kha a school building te nen a lang tur a ni, tiin kalphung tharah chuan kalpui a ni tawh dawn a ni.

Electric wiring fel tawk lo tam tak a awm a, sawiselna a tam khawp mai a. Heta tang hian kan tan dawn a, room khatah light pali awm tur te, fan awm tur te, capping tih vek tur te, a wiring ti tu ten electric connection an ti vek tur a ni tih te a awm a. Hei hi complain a nasat ber avangin heta tang hian kan tan dawn. Pu Speaker, ZPM sorkar hnuaiiah chuan hna pawh a tha turah ngai ila. Headmaster te mawhphurhna a sang sawt a, kan sawn ang che u tihna ni lovin, a that loh chuan lo sign duh suh u, tiin order kan siam a ni.

Pu Speaker, Pu Malsawmtluanga, Lunglei North bialtu zahawm takin a rawn zawhna kha, High Field-a field chhawng saw Smart City Project hnuaiiah sak mek a ni a, NOC School Education Department-in kan pek hriat a ni lova; an lo sa tawp a, kan lawm khawp mai a, School Education Department chungah pawh. Tikhan School Education Department-in field kan neiha kha an rawn sak hnan a, tha tak kan nei turah kan ngai a. Khatiang a nih avang khan, keini chuan lawm takin kan lo pawm, tih ka ni tawp mai.

Tin, Pu Speaker, PMJVK hnuaiia residential school kha hmun hrang hrangah sak a ni a, ruahmanna engtinng neih a nih tih te a rawn zawt a. Sorkar hmasa lampangah khan...

PU LALMUANPUIA PUNTE: Pu Speaker, engtinng NOC awm lovin an sak ngawt dan kha?

DR. VANLALTHLANA, MINISTER: Hmanniah an lo kal a, NOC an rawn dil leh hnuhnawh tlat.

PU ROBERT ROMAWIA ROYTE: Pu Speaker, khawngaihin. Thil hriat chian deuh a thain ka hria a. Khalam kha chu a hre lova le. Mahse, ka chan a ni lo na a, kan hotute'n sports thil a nih avangin enpui turin min ti a. A committee te kan siam mai pawh ni lovin agreement te pawh kha a awmin ka hria a. Kha kha lo enchiang zual hret sela, kan Minister zahawm tak hian.

DR. VANLALTHLANA, MINISTER: Mahse, kan sorkar hnuah a ni NOC chu an rawn dil hnuhnawh leh ni. File pawh ka bulah a la awm.

PU ROBERT ROMAWIA ROYTE: NOC chu a awm lo maithei a. Mahse, Govt. Mizo High School-in a neitu nihna a chang leh ang ti a, lawm taka Education Department an awm hi lawmawm ka ti a. Tuna kan Minister pawh hi a lawm viau tih a sawi kha pawm tlang ang u. A lawm ang.

DR. VANLALTHLANA, MINISTER: Project thehluh dawn hian NOC a ngai thin a, a lo tel lo palh a ni ang e. Kan lo en fel ang. Engpawh ni sela, ni e; kan lawm viau a ni. Pu Speaker, mahni buaipui loh kha a ni na a, mahni umzui thil te pawh a ni ang a, rawn sawifiah a ngai a ni ang e.

Pu Speaker, hei PMJVK hnuai thilah pawh hian a rawn ding leh ang tih chu a hlauhawm viau a. Terms of reference a awm a, chumi ah chuan helaiia residential school sak te ho hi, 'School Education ta a ni tur a ni' tih a ni a. Chutah chuan academic building, office

building, quarters, boys hostel, girls hostel, hall, playground (with pavilion), volleyball court (with gallery) tih te a ni a, khangho kha neih tur a ni a. School awm sa tichhiaa sak te a ni a, tunah hian an exam mek a, kan buai khawp mai a. Mamit lampang pheih kha chu Mamit lam bialtu ho hian sawi duh pheih se chuan sawi tur a tamin ka ring a, kan buai phah khawp mai. Hall tukverh nei lo ah te exam te a ngai a, exam dawnah kan inhmukhawm chuk chuk a ni. Nakinah Demand sawi hunah te chiang zawkin kan sawi turah ngai ila. Hmanni lawk pawh khan kan buai a, West Phaileng te, Kawrthah te, khangah khan harsatna chi hrang hrang kan tawk a.

Tin, Pu Hrahmo rawn zawhna Samagra chungchang kha, State hian Central guidelines kan hmang a. Tin, Samagra guidelines hi a hrana han indil pawh kha a ngai lova, mizoram.gov.in atang khan a download theih vek a ni. Hei, tunah pawn ka'n inhaichhuak mai a, khata tang pawh khan a hmuh theih a. A lo harsa deuh a nih pawhin Samagra guidelines kha kan inpe ang a, tun session chhung pawh hian. Kan officer te'n an lo siam ang a, kan inpe dawn nia. Tin, Samagra dan kha chu tunhnai lawkah pawh tih thar te a awm, tih kha ka chhanna a ni e. Ka lawm e.

SPEAKER : A lawmawm e.

Starred Question No. 102: Sorkar leiba chungchang.

Zawhna Neitu: Dr. K. Beichhua.

DR. K. BEICHHUA: Pu Speaker, ka lawm e. Kan CM zahawm tak Finance Department changtu hnena ka zawhna Starred Question No. 102 chu –

- a) Mizoram Sorkar-in leiba a neih hi tun dinhmunah cheng eng zat nge?
- b) Ba nei ta se, khawi atang te in nge a bat?

SPEAKER : A chhang turin kan House Leader Pu Lalduhoma, Finance Department changtu ilo sawm ang.

PU LALDUHOMA, CHIEF MINISTER: Pu Speaker, member zahawm tak Dr. K. Beichhua zawhna chhanna chu –

- a) Mizoram sorkarin leiba (debt stock) a neih hi tun dinhmuna data awm thei Actuals 2023-2024 ang chuan ₹12,082.26 crore a ni.
 - b) Heng leibat-na te component chu –

- Market Borrowings	-	₹5,871.41 crore
- Loans from Centre	-	₹1,774.36 crore
- NSSF	-	₹102.82 crore
- Borrowings from Financial Institution/ Banks	-	₹954.87 crore
- Public Accounts Liabilities	-	₹3,378.80 crore
- a ni e.

SPEAKER : Zawhbelhna kan la ang a, zawt turin -
 1. Dr. K. Beichhua,
 2. Pu Robert Romawia Royte.

DR. K. BEICHHUA: Pu Speaker, ka lawm e. Ka zawhbelhna chu –

- i) Kan leiba neih zat tuna min rawn chhanna kha, nikum tun ang hun nena compare hian a tam zawk nge a tlem zawk? A inthlauhna min hrilh thei ang em?
- ii) Sorkar-hnathawk MR bill bikah hian ba a awm em? Awm se, cheng engzat nge?
- iii) Sorkar-hnathawk dan dik taka GPF withdraw dil te, withdraw an dil anga pek zel a ni em?
- iv) Sorkar-hnathawk pension ten pension benefit an dawn tur ang te sorkarin a pe chat chat thei em? Pensioner GPF bikah bat a awm em?

PU ROBERT ROMAWIA ROYTE: Pu Speaker, ka lawm e. Ka zawhbelhna chu - Kan Finance Minister zahawm tak, kan CM ni bawk khan, (ka lo hre dik em ka hre lova), Public Account Liability (tih a ni em kha aw, a hnukung ber kha) kan sum batna source lian ber ₹3378.80 crore zet mai kan neihna chhan kha a sawifiah deuh thei em? Public Account Liability chu engnge ni a awmzia chiah? Chu chu kan sorkar tan eng ang chiaha phurrit nge a nih? Engtin nge chu chu solve an tum?

SPEAKER : Awle, a theih ang anga chhang turin Finance Department changtu Chief Minister Pu Lalduhoma ilo sawm ang.

PULALDUHOMA, CHIEF MINISTER: Pu Speaker, nikum leh tunah a engnge kan bat tam zawk tih chhanna chu - 2024-25 tun financial year kal meka kan BE ai hian kan RE hi crore ₹103.94 in a tlem zawk a ni. A awm zia chu - tun financial year-ah hian kan leibat crore sang chuangin a tlahniam tihna a nih chu.

Tin, MR bill hi lut reng chhuak reng a ni a, tunah hian eng emaw zat kan la ba a. Amaherawhchu, kan dawn tawh chin hi chu tun financial year tawp hmian a vaiin kan clear vek dawn.

Tin, GPF hi tunhma ang kha a ni ta lova, tun hma kha chuan a pe thei tur chin bik mi pathum-pali vel kha an ruat a, kha mite chauh lo kha chuan an pe thei lova, eng emaw sawi neuh neuh te pawh kha awm a ni, ‘man tang a lo ei’ tih ang chi te pawh kha. Tun sorkar thar hnuaiah hi chuan kan buai ta lo viau a, a tlangpui thuin kan pe thei deuh zel a ni. Amaherawhchu, a rawn lut reng a; kan dil reng a, kan pe chhuak reng bawk a; ‘kan clear vek’ tithei dinhmunah chuan kan ding chiah lo a ni.

Chutiang bawkin, kan pensioner te pawh pension benefit tihfel loha pending tam lutuk kha manganpui tham a awm a. Chuvang chuan, ‘kan senior-te an ni a, i ngaihsak ang’ kan ti a, a buaipuitu tur bik eng emaw zat kan inruat a. ‘Office-a in buaipui hman loh pawhin, in lamah hawn ula; pension case pakhat tihfel ah lawmman chuti zat kan pe ang che u’ kan ti ringawt mai a; chuti khawp chuan chhun leh zanin kan bei ta a. Tunah hi chuan kan pe thei deuh zel a ni. Amaherawhchu, heng pawh hi lo lut reng a ni a, chhuak reng a ni bawk a. ‘A vaiin’ han tih ang zawng chuan, sawi theih a ni lo a. Thla a lo thar a, pek leh a lo ngai zel a, khatiang kha a ni a.

Tin, ‘kan liability engnge’ han tih chuan, thil tam tak a awm ang a. Pawisa kan puk te, budget kan pass ho tak, puk tura kan remtih chin kan puk ho te kha kan liability chu a ni a. Tin, SASCI-a kan dawn that hian kan liability a tipung bawk a, a chhan chu, loan a ni miao a.

Tin, sorkar hmasa atanga lo bat lawk kha tam zet kan chhawm lawk hrim hrim tih kha hriat tur a ni bawk a. Kha nen khan a inbelh chho zel a. Kuminah heti zat hian han titla mah ila, a la tam fu mai.

SPEAKER : Aw le, zawhna dangah kan kal ang.

Starred Question No. 103: School upgrade chungchang.

Zawhna Neitu: Pu H. Lalzirliana.

PU H. LALZIRLIANA: Pu Speaker, Starred Question No. 103, School Education Department, Minister zahawm tak chhan atan ka zawhna te:

- a) Sorkar hmasain khaw hrang hranga school a upgrade, Middle School leh High School leh High School-te kha eng zat nge?
- b) Khaw hming leh school hming min hrilh thei em? A list min pek theih chuan ka lawm hle ang.
- c) Tun Sorkar tharah hian tihdanglam a awm em?
- d) A awm a nih chuan, engnge a chhan? Engtia kalpui zel nge Sorkarin a tum?

SPEAKER : Chhang turin, a changtu Minister Dr. Vanlalhlana, ilo sawm ang.

DR. VANLALHLANA, MINISTER: Pu Speaker, Pu H. Lalzirliana, Mamit bialtu zahawm tak zawhna chhanna chu:

- a) High School 120 leh Middle School 48.
- b) Heta a rawn zawh kim loh ka'n belh lawk duh chu - Higher Secondary School kha 12 an awm bawk a, chungte chu provincialized tura tih an ni. Tin, upgrade chungchang kha ziaka chhannaah hian a lang lo na a, heta 'upgrade' tih kha, 'provincialized' tiin kan lo let palh a, heta tangin kan chhang mai ang a. Chu chu adhoc atanga provincialized tih nichina ka sawi kha an ni a. Tin, lump-sum atanga provisional adhoc 411 kha middle school 7, high school 11 leh higher secondary 34 te an ni.

Tin, lump-sum aided a dah luh zat kha middle school ah hian an tam khawp mai a, hetiang hian category A, B, C tea dah vek a ni -

Middle school : A - 22, B - 6, C - 9;

High school : A - 17, B - 17, C - 14;

Higher Secondary : A - 6, B - 11, C - 8 te hi upgrade an ni.

A khaw hming leh school hming te chu a list kan rawn pe ang a, a chhannaah pawh Annexure ah dah a ni.

- c) 'Tuna Sorkar tharah hian tihdanglam a awm' tih a ni.

ZPM sorkar hian a tihdanglam chhan chu, Provincialization Rules dinglaia terms & conditions hi school thenkhatte hian nasa taka an tlin loh vang a ni a. Kalpui zel dan tur hi uluk taka zirchian mek niin, Council of Ministers meeting-a put luh leh tur a dah a ni.

SPEAKER : Zawhbelhna kan la ang a.

1. Pu H. Lalzirliana, (Zawhna neitu),
2. Pu Lalmuanpuia Punte,
3. Pi Prova Chakma,
4. Pu Jeje Lalpekhlua.

PU H. LALZIRLIANA: Pu Speaker, ka'n mean deuh lai chu adhoc aided atanga kan provincialized tih lai vela hi a ni a. Ka sawi fo thin a, kan district ah hian kan bial hi kan vanduai khawp mai a, Govt. High School neih mang lohna a ni.

Hetah hian Dampui school lumpsum-aided a awm adhoc-aided a dah tur a ni a. Nizanah an headmaster nen kan in phone a, 'kan Managing Board Chairman phei chuan tun thla hlawh pawh hi lak tur in nei lo min ti a', a ti a. Dampui khu khaw-upa tak a ni a, High School private in an lo bei char char a, khang zinga tel te kha a niin kan hria a. Tin, Hmunpui hi adhoc aided provincialized tur a ni a, heng te hi kan han tih chuan Govt. High School kan nei pung ve deuh dawn tih te ka sawi thin kha.

Tichuan, ka zawhbelhna pakhatna-ah chuan, Rawpuichhip ah hian 10+2 Higher Secondary School din chungchang kha, ve theih a ni ang em? Tumna a awm em? Khulai khu a laklawh a, a feeder an tha a. Pu Muanpuia te khua te, Dapchhuah te, Hmunpui te, Rawpuichhip te tan hian Higher Secondary School min tihsak thei em?

Tin, Chakma area ah hian Mizo subject hi an mamawh khawp mai a. Middle School leh High School level a nih loh pawhin Primary leh Middle School level thleng ta lawm thei se. Anni hi part and parcel of Mizoram an ni a, engtin pawh ti ila kan hnena bet tlat tur an nihna chen hi a awm a. Chuvangin, anni hi Mizo tawng thiamtir an pawimawh khawp mai. Bru ho chuan an thiam deuh vek a, an hmingah pawh Mizo hming deuh vek an nei a, an ngaihtuah awm loh. Chakma bik hi Middle School leh High School emaw, a theih zawk zawk Primary leh Middle pawh ni sela, Mizo subject introduction hi kalpui theih dan a awm ang em?

Tin, nichin khan Minister zahawm takin Mamit ah PMJVK hnuiaia school sak mekah exam conduct harsatna a sawi kha, khawi school nge ni aw ka hre chiah lova. PMJVK project lian deuh deuh kan nei a, sports complex leh eng emaw crore 40 chuang man te kan nei a. Amaherawhchu, school hi ka bial takah khuan kan nei vak lo a. Luangpawl Agape school ah basketball kan nei a, chubak chu school attach zawng chuan PMJVK project kan neih ka hre chiah lova. A sawi kha kaw i lai tak nge ni, a thlang lamah chuan a tam maithei a, Mamit District chhunga constituency dangah chuan. Ka bialah tak chuan PMJVK hnuiaia project a awm thawm ka hre chiah lova. Ka lawm e.

PU LALMUANPUIA PUNTE: Pu Speaker, ka Zawhbelhna chu –

- i) Samagra Shiksha hnuiaia sport equipment hi tha zawka kalpui tumna a awm em?
- ii) Lehkhabu lei hi eng anga kalpui tum nge a nih? tih te hi a ni e.

PI PROVA CHAKMA: Pu Speaker, kan Education Minister zahawm takin a chhan atana ka zawhbelhna chu –

- i) Ka bial Tlabung chhungah hian KGBV sakna tur, PAB pawh lo approve thlap tawh kha tun tlingen sak a la ni lova, a chhan min hrilh thei em?
- ii) Tun Sorkar kal mekah hian CSS hnuiaiah thawk Samagra Shiksha Abhiyan te dah ngheh tumna a awm em? tih a ni e.

PU JEJE LALPEKHLUA: Pu Speaker, ka lawm e. School Education Department changtu Minister Dr. Vanlalhlana chhan atana ka zawhna chu –

- i) Hnahtial DIET Building hi sak theih a ni dawn tawh em? A sakna hmun tur tihfel a ni tawh em?
- ii) DIET, Hnahtial hi engtikah nge a taka hman theih a nih?

SPEAKER : Chhang turin, School Education changtu Minister Dr. Vanlalhlana ilo sawm ang.

DR. VANLALHLANA, MINISTER: Pu Speaker, Pu H. Lalzirliana, Mamit bialtu zahawm zawhna - Ropuichhip Higher Secondary School din chungchang kha, Higher Secondary School din hi rawn dil an tam khawp mai a, a VC leh a MLA ang te pawhin lehkha kan dawng nasa khawp mai a, an mamawh ang zelin pek chu kan tum a. Amaherawhchu, tunah hian school thar han din belh emaw, a thar han siam belh emaw hi Samagra Shiksha hnuaiyah hi chuan kan tum rih lova. Tuna kan neih sa te thawm tha ila, tuna a sak kel mek, a muang lutuk te hi umzui phawt ang u, tiin thuthlukna kan siam a. Tun thut thut chuan kan la ti thei hrih lovang tih kha min lo hriatpui ta sela.

Kha, a sawi ang khan Pu Muanpuia bial lampang pawh hi Pu Muanpuia'n a rawn sawipui a. A dik chiah a, an khaw lampang a ni ang chu; Tuahzawl te, Ropuichhip bul hnaih te ho hian an mamawh khawp mai a rawn ti a. Kan mamawh a nih phawt chuan, kan lo en ang a, tih dan te kan ngaihtuah ang. Amaherawhchu, tunah chuan hna awmsa muang lutuk um ngaia awm te a awm a, chutah chuan insawrbing phawt ang u, tiin tunah chuan thuthlukna kan siam hrih a ni.

Tin, Chakma area-a mizotawng thiamtira kha, hei, Samagra School hi kan nei a, Chakma area-a school tam zawk hi Samgra hnuai a awm an ni em aw, ka ti a. Chuta Mizo subject teacher chu keini sawnchhuah ni miah lovin, lo lak chhuah deuh vek an ni a. Kan vei tlang a nih chuan, in lakchhuah hote pawh kha kan dah let leh ang a.

Ka sawi tlang law law ang a; tum-hnih Union Minister kan zuk hmu tawh a, chuta kan zuk kal chuan min lo vau ti-tih a, "School kan mamawh in rawn ti a, Samagra zirtirtu kan rawn pe che u a, Sorkar laipuiin an hlawh 90% kan rawn tum a. In din a, zirtirtu in lachhuak lehngal a, hmun dangah in dah a. Chuvang chuan, zirtirtu in lakchhuah ho hi chu tawp mai sela, an hlawh in lo tum tawh dawn nia" tiin, Secretary khan tum khat pheih chu bul deuhin min lo sawipui a ni.

Union Minister te an rawn zin thin a, Aizawl hi an rawn kal kan deuh thin a. Chutah chuan district dangah te an han kala, tute'n emaw lehkha an lo thehluat a, a zirtirtu list nen an lo nei thlap mai a, khulam pangah. Tichuan, khu lampangin min rawn vau let a, chutiang chu harsatna kan tawh dan a ni a. tunah pawh hian Samagra Shiksha zirtirtu tam tak khawpui lamah kan han attach a, office-ah te kan attach a. Khu lampang chuan school kan dahna/kan peknaah dah let turin min ti a, min rawn vau a.

Hmanniah kan zuk kal hnahnun ber kha chuan, "in ti dawn ro ro a nih chuan, All India level-in ti teh u; Mizoram bik hi min rawn bitum suh u" tiin a ngenna te kan siam nghe nghe a ni. Mizo zirtirtu hi chu High School level-ah pawh, Middle School-ah pawh kan nei a, amaherawhchu, an awm lo hlawm a. An chhuanlam erawh chu, 'zirtir hleihtheih loh an ni' tih a ni a. Mizo tawngin an biak theih lova, Mizo tawng an zir duh bawk si lova; chu chu kan harsatna tawh a ni an ti a. Hei hi kan hriatthiapui khawp mai a, eng emaw chen

chu. Amaherawhchu, Chakma lam NGO te pawhin ‘Mizotawng hi zir ni ve tawh sela’ tiin, ngenna te pawh an rawn thlen a; hei hi ngaihtuah mek a ni. A tha tur zawk a nih chuan, kan Mizo tawng zirtirtute pawh kan dah let leh ang a, chutiang chuan hma lak kan tum ang chu.

Pu Lalmuanpuia Punte, Hrangturzo Bialtu Member zahawm tak zawhbelhna - sports equipment chungchang kha, ni e, term hmasaah pawh kan lo vei tawh thin a. Kan kal velnaah cricket bat a thing tur te, plastic te kan lo hmu a. Sawi chu a hrehawm viau na a, kan Sorkar tirh khan a supply tur kan inpawt pheii a, keimah ngei pawhin a hmunah ka endik a, fuh lo tam tak a awm a. Tun, a tharah hi chuan restricted ni lovin, tender pangaiin sports equipment hi lei a ni dawn a, a equipment pawh check a ni dawn a ni. A mawi lo em, chu ka hre lova, a supply tuin a rawn dah kan en a, football kha printed price-ah ₹870/- a ni a, a hmaah cheng 1 a lo thai belh a, ₹1870/- angin a lang a, chu chu ₹1100/- anga supply a lo tum a ni. ‘Hetiang hi a dik lo; a supply tu hi ko rawh u’ kan inti a, office-ah na takin kan inhau a. Printed price-ah a tlathla a, nikhat chhungin football lei belhna tur nuaih 30 chuang kha kan hmuh belh a. Chutiang chuan, thil dang, football chungchang ah pawh, beach ball chungchang ah pawh sawi tur a awm a. Sports equipment supply hi tha taka kalpui a ni tawh dawn a, a tha thei ang ber school-te pek tum a ni.

Tin, lehkhabu lei chungchangah pawh hian Pu Speaker, Samagra Shiksha hnuaiiah hian ‘School Library’ tiin guidelines a awm vek a. A hma chuan ‘National Book Trust’ chauh a dawr theih tih kha a ni a, chu chu mi pakhat chauhin a lo supply thin a. A dan kan han enchiang a, SCERT kaltlang te, thil dang kaltlang tein a lo lei theih reng a. Chuvang chuan, a dan ang takin, mi pakhat ina supply bik lovin. A chanve kha local publishers ho atangin lei thin a ni a, a chanve danga kha NBT authorized dealer pakhat, awmchhun atanga lo lei thin a ni a. Hei pawh hi tihtawp a ni dawn a, SCERT kaltlangin lei a ni tawh dawn a ni.

Tin, Pu Speaker, hemi chungchangah hian lehkhabu hi school ten an mamawh tak tak em tih ngaihtuahu tur committee din rawh u, kan in ti a. Engkim kan in um vek seng lova, an lo buaipuiin ka ring a. Sawi fo tawh angin, comics hmang hian moral reform siam theih kan inbeisei a. Tunlai chuan Youtube an en a, lehkhabu an chhiar peih tawh lova, comics hmangin awmdan mawi te, environment chungchang te, thil hrang hrang an tana Mizo nun zia te, khatiang chi kha dah tum a ni a, chung te pawh chu SCERT kaltlanga siam tum a ni.

Tin, Pu Speaker, Pi Prova Chakma, West Tuipui bialtu zahawm tak zawhna, Tlabung KGBVT chungchang kha, eng chen nge kan thlen tawh ka chiang chiah ngam lova. Tender kan chhuah nual a, a then chu kan re-tender leh a. Chutiang chuan, tunah inchiah lai mek zingah chuan a awmin ka hria a. Work-order kan pek chhuah hunah chuan an rawn sa vat turah ka ngai a. Keini pawh kan hmanhmawh a ni, hei hi. Hna-muang, hna-thawhloha awm a tam avangin ‘spill-over’ kan nei nual a. Hei hi kan um vat vat a ni. Khami zingah a lo awm anih, chuan a rang thei ang berin sak kan lo tum ang.

Tin, Samagra Shiksha hnathawkte tihngheh chungchang kha, Councils of Ministers meeting ah kum 10 thawk chin tawh ho tih nghehna regularization kha kan han rel a, chutah chuan Samagra Shiksha pawh an awm a. A zirchiangtu kan han dah a, a buaithlak khawp mai a. Samagra Shiksha hnuaiiah hian an luh dan, initial appointment te, tin, a then an chhuak zuai a, khawi emaw election ah te an lo va tel a, an lut leh a, chhunzawm ang ten emaw an lo ziahsak leh a, an inhek tawn a; chutiang chuan tunah hian thil a kal mek a ni. Chuvang chuan, a zirchiangtu kan indah a, kan Addl. Secretary hoin an ngaihtuah a. Hemi

a fel hnuah chuan tih chhoha thehluh pawh kan tum a ni. Tin, seniority-list kan siam pawh kan tichhuak vek tawh a; amaherawhchu, sawiselna a tam zia kan hriatthiampui bawh a. Sawiselna kha chumi lehkha lo lutte nen chuan tunah hian ngaihtuah mek a ni.

Tin, Pu Jeje Lalpekhlua, South Tuipui bialtu zahawm tak zawhna Hnahthial DIET building chungchang kha, Hnahthial Diet hi 2023 khan Khawzawl nen a sakna tur tender chhuah a ni tawh a. Kan han sorkar a, kan han en vang vang a. Tunah hian DIET ah vaccancy kan neih hi 41.7% a ni a, a dang siam leh hi kan tlin ang em, kan ti a, an hlawh hi a chanve kan tumsak a ngai si a. DIET pakhatat zirtirtu 25 leh anmahni puitu tur staff 24 siam a ngai a, an hlawh chanve tum a ngai bawh a. DIET pahnihah zirtirtu 50 Group-A thiau post han siam kha kan huphurh khawp mai a. Amaherawhchu, NGO te an rawn tlan a, ‘tih ngei ni rawh se’ an rawn ti a. Anmahni kan zah a, tin, bialtu MLA te pawhin tih theih dan a awm em a rawn ti a. Kan meeting ho bawh a, ‘tihdan ngaihtuah ila a ni mai alawm’, kan ti a. Chutiang chuan tender te pawh kan reevaluate leh a, kan han han pe ta a ni a.

Tichuan, Khawzawl DIET building hi tunah hian an sa tan a, a sakna tur an lo kawhmuha kha Benlung a ni a; Cachar Road-a kal ngai, furah chuan va kal theih loh leh mimal ram a lo la ni zui a. Chuvang chuan, hetah hi chuan sak thei a ni lo ang. Hnahthial DIET pawh kha Hnahthial atanga kal fe ngai a ni a. Kan officer leh kan hotute an va kal a, ‘hetah chuan sak chi a ni lo e’ tiin an rawn report a. Work-order kan lo inpe tawh laklawh a, agreement sign a ngai tawh si a. Tunah Hnahthial College ramchhungah sak tum a ni a, file pawh a kal mek a ni. Tichuan, Hnahthial College kha a sawi tel loh theihloh a; NEP 2020 hnuaiyah hian Integrated BA course kalpui a ngai a. Keniin Hnahthial DIET hi hma lo lakpui theilo pawh ni ila, college hian nakinah Integrated BA course kalpui nan a la tangkaipui ang tiin, chutiang chuan hmahlir thui tak nen dah dun kan han tum a ni a.

Tin, engtikah nge tan theih a nih ang tih hi chu, ka sawi mai thei lo a. Sawi ang khan zirtirtu 25 lak belhna tur leh anmahni staff lak belhna tur te kha sanction post siam a la ni chiah lo a, a buaipui kan huphurh deuh a. Tuna kan neihsa pawh kan hnawhkhat hleithei lo a ni a. A tahtawl leh a remchang dan angin buaipui zel kan tum e.

SPEAKER : Zawhna dangah kan kai ang a.

Starred Question No. 104: Aizawl chhehvela Zu-quality chungchang.

Zawhna Neitu: Lt. Col. Clement Lalhmingthanga, Champhai South Bialtu.

LT. COL. CLEMENT LALHMINGTHANGA: Pu Speaker, Starred Question No. 104, Excise & Narcotics Department changtu Minister min chhan atan –

“Aizawl chhehvela zu-hmunpui - Rangvamual, Phunchawng leh Tuikhurhlu tea zu-quality chhia hi sawi fo a ni a, hemi chungchangah hian sorkarin hmalak tumna a nei em?” tih a ni e.

SPEAKER : Excise & Narcotics Department changtu Minister Pu Lalnghinglova Hmar ilo sawm ang.

PU LALNGHINGLOVA HMAR, MINISTER: Pu Speaker, Starred Question No. 104 ka chhanna chu –

“Rangvamual, Phunchawng leh Tuikhurhlu tea zu te hi dan phal loha siam leh zawrh a ni a. Heng zu a siam, zu zuar leh a in te hi dan tlawhchhana man zel an ni.

January Ni 30, 2025 khan Mizoram Police te nen joint-operation neiin mi 150 lai an thawk chhuak a. Zu siamna hmun 101 lai tihchhiain, rakzu lits 1083, zu bilh lai tin 25,556 leh zu bilhna bel lian 96 tichhiat a ni. Heng zu-hlahawm nia sawite mihring tan a hlawhawm zia chipchiar taka pholang tura test-na tur Laboratory tha Mizoram- ah kan neih loh avangin, tunah hian Delhi lama endik tura hmalak mek a ni.

Pu Speaker, ka'n belh zawk duh chu, (nimin lama House-ah ka sawi tawh) Arbro Pharmaceutical Private Ltd. Kirti Nagar, New Delhi ah kan sample te hi pek a ni a, zirchian mek a ni a; a result a lo la chhuak lo deuh a. Kan thihpui tam em em zu hi, 'kan hmai te a dum a, kan taksa a chhe chak a; kan vital area hi a khawihna bik e' tih hi tlang titi a ni a. Tin, kan natnaah pawh hriat a ni a, eng ang chiah nge a nih taka hi scientifically-a endik a tha kan ti a. Chu chu tunah hian zir chianna kalpui mek a ni e.

SPEAKER: Zawhbelhna kan la ang a.

1. Lt. Col. Clement Lalhmingthanga, (Zawhna Neitu),
2. Pu Lalchhuanthanga.

LT. COL. CLEMENT LALHMINGTHANGA: Pu Speaker, ka zawhbelhna pakhatna chu - Champhai South bialtu ka ni a, ka bial Champhai-a Zokhawthar te khi international border a awm a ni a, hei hi ruihtheih thil chi hrang hrang, zu bakah drugs te a rawn luhna, a kawngkapui ang deuh a kan sawi thin a nih avangin, ka bial lam khua te hming a lang ve ziah mai a, a bialtu tan chuan a lo lainatawm thin a. Chuvangin, Zokhawtharah hian ruihtheih thil leh bungraw dang dan loa lo kal thilte lo check turin Assam Rifles te bakah Custom te, Police te leh Excise & Narcotics lam te an duty a, a bik takin Assam Rifles lam hi an intithu em em a. Hei, Assam Rifles ho lah hi tuna an hotupa ber DIG leh an Brigadier te hi Defense lama ka lo thawh vena ah ka junior-te an ni a. Heng ho nena kan han inkawm leh han inzawh hianin an insawithiam ve viau mai thin si a. Hei hi, Excise Department lam atang hian, Assam Rifles te hi engtiang chiaha co-operative nge an nih; thawhpui theih te an ni em; dan loa lo lut ruihtheih thilte danna kawngah hian Excise Department hi engtiang thlengin nge an co-operate, tih hi ka zawhna pakhatna ni se.

Pahnihna ah chuan, nimina khan thu lawmawm deuh mai kan hria a. Wine leh beer te zawrh dan (regulation) mumal taka regulate-na turah Dan lawmawm deuh mai kha kan pass ta a. Khatah khan, i veilama thute zinga kan MLA thenkhat te phei kha chu kha bill avanga zan thum ngawt lo mu lo tawh te an ni a. Thil lawmawm tak mai Zoram-mipuite tana eizawna mumal tak awm theina tur bill kan han pass kha, kei pawh nizan chu ka mu mang lo nghe nghe a ni, ka lawm lutuk kha. (**Speaker:** Aw! Khawngaihin a zawhna lai kha.) Pu Speaker, kan senior-te tih dan kha tihdan tur a lo nilo a nih chuan, ka copy leh ngai tawp lovang.

Kan Minister zahawm takin a rawn chhan ang khan, 'a sencha-lane' kan tih mai te pawh kha a rem ta duak, tih kha a ni a. Khatah khan engtiangin nge kan sorkara Excise Department changtu Minister leh hotu chak takte hian hma an lak?

PU LALCHHUANTHANGA: Pu Speaker, kan Minister zahawm tak khan Vaivakawn-Zohnuai te, Rangvamual te, Phunchawng te kha zu-hmunpui leh ruihhlo chi hrang hrang tihna hmunte kha....

SPEAKER : Khawngaihin; Zawhna leh Chhanna hun a tawp a, kan zawh zawh tir law law dawn nge? (House-in zawhtir law law a remti a.) Aw le, chhunzawm rawh le.

PU LALCHHUANTHANGA: Pu Speaker, khang hmunte kha an check a, tunah chuan a hmun khu a clear tha a, a fai ta vuk mai a. Amaherawhchu, Pu Speaker, khang ruihhlo zuarte, ruihhlo ti thin te kha ka bial lam World Bank Road, Falkland - Silaimual leh Trinity Hospital velah te an rawn inkhuar ve leh a, kan rush viau tawh leh nghal a. Chuvang chuan, heng lamah hian kan Minister zahawm tak hian hma min laksak ve thei ang em?

SPEAKER : A lawmawm Chhang turin, Excise & Narcotics Department changtu Minister Pu Lalnghinglova Hmar ilo sawm ang.

PU LALNGHINGLOVA HMAR, MINISTER: Pu Speaker, Lt. Col. Clement Lalhmingthanga zawhna chhanna chu -

Khilai Champhai District-a Zokhawthar te khi international boundary a ni a, a buaithlak em em mai a. Tin, a nihna takah chuan Zote, Bulfekzawl, Khuangleng, Khuangphah, tin, Saitual District Ngopa thleng khian ruihhlo kalkawng a ni ta a. Thawkkhat lai deuh phei kha chuan Zokhawthar leh a chheh vela Assam Rifles leh Excise te, Police te pawhin strict lehzuala operation an neih deuh chuan a lehlam, Ngopa lamah an hel ve leh ta thung thin a. Chuvang chuan, thal lai chuan Tiau khi kaltlang theih a ni a, kil tinah duty indah theih a ni si lova, a buaithlak khawp mai a.

Champhai District bikah hian, Pu Speaker, Excise & Narcotics Department hian mi 43, enforcement staff bikah 38 kan nei a, chung ho tana cover vek theih a ni lova. Tin, zawhna zawttu sawi ang khan, international boundary hi chu Assam Rifles ho ven a ni a, thawhhona pawh a tha a, an hnawksak lem lova. Excise Department atanga kan report dan chuan, khilaia heroin leh meth an lo mante pawh Excise Department-ah an hlan deuh zel a. Tin, joint-operation te pawh neih a ni a.

Pu Speaker, nikum December-a Champhai kan kal tuma Champhai NGO te, DC leh sorkar-hnathawk hrang hrangte, tin, Assam Rifles te pawh an lo kal ve a. Chuta kan sawiho pawhin an co-operative tha viau mai a. Sawi ang khan, Champhai South bialtu hi sipai officer lo ni tawh thin a ni bawk a, an lo la zah a; tun dinhmunah chuan thawhhona pawh a tha. Amaherawhchu, ruihhlo lut a tam em avangin kan inveng seng lo tih erawh chu zep thu a cheng lo a; kan ram dinhmun chu Pu Speaker, kan hre vek awm e. Tunah hian a ven leh a veh hna ringawt lo deuh, awareness lam pawh Excise & Narcotics Department hian kan kalpui ve zel bawk a ni.

Tichuan, khulai 'a sencha-lane' kan tih kha chu Vaivakawn-Zohnuai phei petrol pump bul khu a ni a. Chhun zan zawmin lirthai a ding a, mi an awm luih luih reng a. Tichuan, Pu Speaker, Excise & Narcotics Department hnathawh leh hmalakna a nih rualin, Vaivakawn khawtlang te vang a ni tel bawk tih kha ka sawi duh a. Vaivakawn khawtlang an thawh hlawk

hle a, tum hnih-thum meeting kan nei a. Nikum May thla khan sorkar hmun lamah kan meeting a, chutah chuan Vaivakawn MUP te, MHIP, YMA, Local Council te; tin, Vaivakawn ah hian ruihhlo do pawl leh Vaivakawn siamtha pawl te nen Joint meeting kan nei a.

Chuta kan sawi danah chuan, “Sorkar tih theih chin chu in hria; heti mai hi a ni a. Theihtawp kan chhuah ang; khawtlang in kalna chin chinah kan tlanche lovang. Amaherawhchu, keiniin, chuti chuan i ti ang u tiin kan sawi chiang ang a, nangniin min puih loh chuan a tawn tawna mualpho theih a ni” kan ti a. Anni lam pawhin an huphurh thu te leh tun hma atanga an lo beih nasat tawh thu te sawiin, a rem theih loh thu te an sawi a, ‘kan lo inrawn ve phawt ang e’ an ti a, khawtlang an inkokhawm a. Chutah chuan, kan beisei aia thain ro an rawn rel a, nikum June thla khan kawng te an zawh a. Tichuan, Zohnuai thleng an kal a, warning te an pe a; khawtlangin, ‘zu in zawrh chuan in awm thei tawh lo ang’ an ti a; a man hna kha Excise lamin an bei bawk a. Tin, nilengin khulaiah khuan Excise duty te tun thleng hian an la awm reng bawk a.

Chutih rual chuan, Pu Speaker, veng duak angin lang mah se, a tak takah chuan nichin report ah khan a lang tawh a. Khumi a lui mawng lam te, a bikin Rangvamual leh Phunchawng lui lam kan kal chuan, zu-sakna hmunpui chu a la awm reng a ni. Ka’n sawi thui hret duh chu, henge hi han beiha han ti tak tak chuan, eng emaw chen chu kan tirem thei mai ang. Amaherawhchu, a aia hla zawkah an kal a, hmun dang atangin zu chhe zawk an sa a, in lo theilo mizo thalaite’n kan thihpui bawk si avangin, eng chena khauh tur nge; engtin chiah nge kan tih ang tih hi ngun taka ngaihtuah ngai a ni a. Chungte chu ngaihtuah zui atan tukinah hian ka’n chhawpchuak duh a ni.

Pu Speaker, Pu Chhuanthanga zawhna kha a har hle mai a. ‘Khulai atangin in um kiang a, kan bial lamah an lo kal leh si a’ tih kha, tun tum House-a zawhna mai a ni lova. Tum khat chu Pu Chhuanthanga hian Inrinni tlaiah min rawn phone a, ‘ka hau dawn che’ a ti a; ‘engnge ni ta’ ka ti a. “Khulai khu kum tluana ka fehna a ni a, tun hma atang tawhin; tun ang reng renga an ven that hi ka hre ngai lo. Eng emaw chen chu a thianghlim ta a. Amaherawhchu, kan tuar ve thung a ni” a ti a. “Ka bial, World Bank Road lamah an rawn insawn a, ruihhlo ngai khulaia pungkhawmte kha” a ti a.

Pu Speaker, a sawi kha a dik chiah a ni. Heng ruihhlo ngaite hi Mizo-thalaite an ni a, khawiah emaw an awm a ngai si a. Khulaiah kan han strict a, kan han khauh a; hmun dangah an kal a. Entirnan: kan biala Tuikual South te chuan ruihhlo beihpui an thlak a, sawlai Vanapa Hall leh a chhehvel te, kawngpui te an han thian a; a piah vengah an phei a, a piah vengin an rawn complain ve leh a. Heti zat hi an awm a, khawiah emaw an awm a ngai bawk si a. Excise Department ringawt pawh hian camping centre a an dah luh hi an thahnem em em a. Tin, kan thawhpui Central YMA ten an han khawm a, camping centre-a an dah luh hi an thahnem tham em em a. Chuti chung chuan chu aia tam mah chu a pawnah hian an la awm a. Invuak sim theih a ni lova, khall khawma bo duak thei pawh an ni lo. Amaherawhchu, khawpui hmun pawimawh leh laili te ruihhlo ngaiin min neihsak lutuka hi chu, i ngaimawh ang u; a theih chin chin i veng ang u, kan inti a.

Kan inmualpho pawh a ni ang a, Pu Speaker, har em em mai chu, darkar 24 kan duty thei lova, kan awmlah chiah hian, entirnan: zan dar 10 ah duty an haw chuan, dar 11-ah an lo kal mai. Tin, eitur awmna lai te an pan khawm lo thei lo a. Tichuan, Vanapa Hall leh a chhehvelah dar 3 vel atangin eisiam an awm tan a, duty te haw ah an lo kal a. Tin, ruihhlo

an kawl loha tihsual an neih loh chuan, ‘misual’ tia va treat kha a ni chiah bawk si lova; Pu Speaker, a har em em a ni, chu lai chu. Dan bawhchhia an ni ngawt bik lova, an awmkhawm hian; khawtlang erawh chuan hnawk kan tia kan han umdarh thin tak nanging, an lainatawm takzet a ni.

Zawhna lo zawngin ka chhang em ka hre lo a, Pu Speaker. Kan zavaia ngaihtuah tlan atan, ‘hetiang ringawt lo deuh hian engtin nge kan awm theih ang’ tih hi. Tiang leh Jail hmang ringawt hi chuan an sim lova, an kiam bawk si lova; chulai chu beng sika ngaihtuah a ngai a ni. He House mai nilo, he ram hian ‘engtin zel nge ni ang’ tia nagihthuah a ngai. Misual angin kan en ang a, kan khalhkhawm ang a, kan vaw darh ang a; kan sawi ang chiah khan kan um darha te kha Pu Chhuana bialah an lo va kal leh tho si a. Khawiah emaw an awm a ngai, khawiah emaw an riah a ngai a ni. An riahkhawmna kha, tunah pawh kan tawngkamah chuan ‘homeless’ kan han ti tan a. Tumahin kan bial leh kan veng a riakkhawmah kan duh lova; kan vaw darh a, an sim thei chuang si lo lai hi he ram problem lian hi a niin ka hria a, Pu Speaker.

Chute chu remchang lain ka sawi ta deuh duah a. ‘Theihtawp chhuah a ngai a ni’ kan tih hi, a la tawk lo hle a ni tih hi a hrechiantu chu Mizoram-mipui an ni a, theihtawp kan lo chhuah zel ang e.

LAYING OF PAPER

SPEAKER : Tunah chuan, Laying of papers ah kan kal ang a.

Pu Lalchhandama Ralte, Chairman, Public Accounts Committee - “Statement on Actions taken by the Government of Mizoram on the Further Recommendations contained in the Third Action Taken Report of Public Accounts Committee relating to Sports & Youth Services Department.

PU LALCHHANDAMA RALTE, OPP. LEADER: I phalna leh he House zahawmtak remtih nain he, “Statement on Actions taken by the Government of Mizoram on the Further Recommendations contained in the Third Action Taken Report of Public Accounts Committee relating to Sports & Youth Services Department” hi ka rawn lay e.

(A copy sem a ni a.)

SPEAKER : Kan Member zahawmtak Pu W. Chhuanawma hi taksa lam fellohna avangin a lo kal thei lo tih kha House ka hrilh tawh a. Hei, tunah hian Mumbai ah an inenkawl mek a. Kan zingah a tel theilo a ni tih kha House hriatah ka sawi duh a. Tin, Pu F. Rodingliana, Member zahawmtak pawh hi nimin lam khan a lu a nat avangin a lo kal thei lo bawk a. Chu chu House hriatah ka sawi a ni e.

PRESENTATION OF REPORTS

1. **Pu Lalchhandama Ralte Opp. Leader**, Chairman, Public Accounts Committee to present -

- i) Fourth Report on Actions Taken by the Government against the Recommendations contained in the First Report of Public Accounts Committee (2024-2026) relating to Public Health Engineering Department.
- ii) Fifth Report on Actions Taken by the Government against the Recommendations contained in the Second Report of Public Accounts Committee (2024-2026)

relating to Labour, Employment, Skill Development & Entrepreneurship Department (MYC) on the table of the House.

2. Pu Lalfamkima, Deputy Speaker & Chairman, House Committee –

“The Third Reports of House Committee relating to amendment of Sub Clause 4 (C) of Clause 2 of the Terms and Conditions of Allotment and Accommodation of Members in the Legislators’ Home, Tuikhuahtlang” on the table of the House.

PU LALCHHANDAMA RALTE, OPP. LEADER: Pu Speaker, i phalna he House zahawmtak remtihngain heng: -

- i) Fourth Report on Actions Taken by the Government against the Recommendations contained in the First Report of Public Accounts Committee (2024-2026) relating to Public Health & Engineering Department.
- ii) Fifth Report on Actions Taken by the Government against the Recommendations contained in the Second Report of Public Accounts Committee (2024-2026) relating to Labour, Employment, Skill Development & Entrepreneurship Department (MYC) te hi House ah ka rawn present e.

(A copy sem a ni a.)

PU LALFAMKIMA, DEPUTY SPEAKER: Pu Speaker, i phalna leh i remtihngain he House zahawmtakah hian, “The Third Reports of House Committee relating to amendment of Sub Clause 4 (C) of Clause 2 of the Terms and Conditions of Allotment and Accommodation of Members in the Legislators’ Home, Tuikhuahtlang” chu ka present e.

(A copy sem a ni a.)

SPEAKER : A lawmawm e. Tunah chuan business dangah kan kal ang.

OFFICIAL RESOLUTION

Vawiinah hian Official Resolution pakhat kan nei a. Land Revenue & Settlement Department changtu Minister Pu B. Lalchhanzova, tunah move turin ilo sawm ang.

PU B. LALCHHANZOVA, MINISTER: Pu Speaker, ka lawm e. He House zahawm takah hian, “The Right to Fair Compensation and Transparency in Land Acquisition, Rehabilitation and Resettlement Act, 2013” hi Mizoram ah hman tura adopt a nih ve theih nan move min phalsak turin ka rawn dil a che.

SPEAKER : Awle, Minister in a resolution a rawn move ta a. He resolution hi Central Act, State-in a kan adopt ngai chi a ni a; sawi chiam lova adopt mai thin kha a ni a. Sawiho ngai kan ti em? (House-in sawiho ngai a ti lova.) A lawmawm e. A ngaih loh chuan, kan Minister khan adopt rawn dil se la.

PU B. LALCHHANZOVA, MINISTER: Pu Speaker, he Fourth Session of the Ninth Mizoram Legislative Assembly ah hian Central Act, 2013, “The Right to Fair Compensation and Transparency in Land Acquisition, Rehabilitation and Resettlement Act, 2013 (RFCTLARR)” chu he House zahawmtak a adopt turin ka rawn dil e.

SPEAKER : Tikhan resolution neitu in adopt a rawn dil ta a. Remti apiangin, ‘remti, ti ula; Remti lo kan awm chuan, ‘remti lo ti ula’. (House-in a dopt a remti a.) A lawmawm e.

Kan Minister zahawm tak Pu B. Lalchhanzova official resolution putluh chu he House hian lungrual takin a adopt ta a ni. (**Pu. B. Lachhanzova, Minister:** Pu Speaker, ka lawm e).

FINANCIAL BUSINESS

Tunah chuan, General Discussion ah kan kal ang a. Kan Chief Minister zahawm tak, Finance changtu Pu Lalduhoma khan Ni 4.3.25 (Thawhlejni) a budget a pharh tak ‘The Annual Budget for the Year, 2025-26’ kha kan sawiho ang a. General discussion hi wawiiinah zawh nghal hram kan tum dawn a ni. Memberte minute engzatnge kan inpek ang le? Minute 10 a tha mai em?

PU LALRAMLIANA PAPUIA: Pu Speaker, minute 10 kha memberte’n kan pel leh theuh dawn chuan, kan indaihlo hle mai dawn a. Chuvang chuan, strict deuh hlekin kal ta ila. Anih loh chuan, minute 7 emaw pawh kha a tawk viau lawm ni, a lai lakin, tih kha ka lo rawt ve a ni e.

SPEAKER : Member zahawm tak rawtna kha enge kan ngaihdan le? (House-in minute 10 a remti a.) Aw le, minute sawmah khan khung hram tum ila. Minute 8 ah bell rawn hmet kan tum dawn nia.

Tunge sawi hmasa ang? Member zahawm tak Pu Lalramliana Papua ilo sawm ang.

PU LALRAMLIANA PAPUIA: Pu Speaker, ka lawm e. Wawiiinah kan sawiho tur kan budget 2025-26, kan Finance Minister-in a pharh tak kha ka han chhiar a, theih angin ka inbuatsaih ve a. Kumin financial year kan hmanral takah thil lawmawm tak tak kan budget pharhin a rawn tarlan kha hmuh tur a awmin ka hria a.

A hmasa berah chuan, financial management-ah kan Finance Minister a fakawm hle a. Tunhmain kan ngaithla thin a, budget te la pharh ve ngailo kan nihna atang tein kan insit ru viau a. Amaherawhchu, kum khat budget kan han kalpuia tuna rawn lang ta chu, financial management-ah te, budget control leh kawng hrang hrangah fakna tur tam tak a rawn langin ka hria a. Chuvang chuan, lawmthu a hmasa lamah ka sawi a ni.

Tin, 2025-26 Budget Speech kan han ngaihlaka lawmawm ka tih em em thildang tarlan leh duh ka nei chu, kawng tamtaka hmasawna hmuh tur awm zingah kan hun liam ta te kan thlirin, kan hriat theuh angin sawrkar hnathawk GPF leh pension sum tangkhang thahnem tak mai kha a awm thin a ni a. Hun hmasa lamah te chuan sawrkar-hnathawkte’n anmahni sum lakchhuah an han dil pawhin a harsa em em thin a, a tithei deuh te rawih a lo ngai a. Zepthu cheng lo, a tithei deuh te an rawihna lamah sum sen ngai tawk te a lo awm a ni awm e, a chang phei chuan. Khang te kha kan dinhmun paltlang thin te a ni a.

Tuna kan Finance Minister budget speech-a tarlan ang khan, kumkhat chhung lekin GPF leh pension sum tangkhang crore ₹2000 dawn lai mai kan han inpe fel thei te kha, management fel taka min kalpui vang a ni tih a lang Chiang hle a. Hei hian a nghawng leh a sawtpuitu chhungkuate tan chuan a lawmawm tur zia te min ngaihtuah tir a ni.

Chu mai ni lova, sawrkar hmasa atanga healthcare bill lo tlingkhawm pek tlak a ni te hi a lawmawm ka ti a. Sorkar kum kal lai mek a tawp hunah pheh chuan healthcare bill ba zawng-zawngte pawh tlak thei tawh turah kan inngai te hi a ropuiin, he harsatnain a nghawng chhungkuate tan a lawmawm hle dawnin ka hria a ni.

Nikum Governor Address-ah, ‘kan dinhmun siamtha tur hian thutlukna harsa deuh te pawh huaisen taka kan siam ngam a tul dawn a ni’ tih tarlan a nih ang khan; tuna kan budget kum kallai mek leh hman liam mek turah hmalakna hrang hrangah, a tul chuan huaisen taka hmalakna te pawh kan hmu chho a. Group thenkhat anmahni hmakhua tur ngaia, a tuartu tur nia inhriate pawhin an han dodal deuh a nih pawhin, huaisen taka kaltlangpui a ni te hi, kan ram sum leh pai dinhmun siamthatna kawngah pawh a hlawkna leh awmzia a neih zia a rawn lang chho zelin ka hria a. Heng kawngah pawh hian lawmthu sawi tur tam tak a awmin ka hria.

Tun Financial Year 2025-26 atana kan Finance Minister budget ruahmanna ang hian ‘Voted Expenditure’ tur atana cheng crore ₹13835.42 leh ‘Supplementary Demand’ crore ₹3476.21 te hi he House hian pawmpuia lungrual taka kan pawm tlan hi kei pawhin ka duh a. Chuvang chuan, he budget hi he House-in a pass ngei theih nan ka pawmpuiin ka thlawp a ni, tih ka han sawi a ni e. Ka lawm e.

(Speech not corrected.)

SPEAKER : Dr. Lorrain Lalpeklina Chinzah ilo sawm ang.

DR. LORRAIN LALPEKLIANA CHINZAH: Pu Speaker, Mizoram Budget 2025-26 sawitheh tura hun min pek avangin, a hmasain I chungah lawmthu ka sawi a.

Pu Speaker, sorkar kumthar 2025-26 chhunga sum hman tur ruahmanna kan Chief Minister, Finance Minister ni bawkin he House zahawm taka a rawn chhawp chhuak hi a hmasain lawmawm ka ti a.

Pu Speaker, kan sorkar kalphung-thar hnuaiah kawng hrang hranga hmalak chhoh zel a ni a. Kan Chief Minister budget speech-a kan hmuh angin, kum hmasa lam, tun financial year kal meka Public Accounts hnuaiah k-deposit leh deposit-3 hnuaia sum tlingkhawm crore ₹837.87 te, sorkar-hnathawk GP fund lak harsa tak thin ah crore ₹785.9 te leh, pension benefit tangkhang mek crore ₹1042.42 zet te pekchhuah a ni hi a ropui ka ti a. Kan sorkar-hnathawkte leh pension te pawh an lawm takzet niin ka hria.

Chu bakah Pu Speaker, power sector lamah kum hmasa lam aiin power hralh chhuah lamah revenue ₹783 lakhs chuang zet kan hmuh te, National Social Assistance hnuaia beneficiaries te sum hmuh thin tihpun a lo ni ta te, healthcare scheme hnuaia leiba 80% zet pek tlak a ni te leh financial year thara ba la awm te pawh la pek zawh tumna a awm te, public distribution system lamah huaisen taka hmalak tum a ni te, Tax Reform leh Administrative Reform lama hmalakna thar ‘Kai App’ kan tih hmuh tur a lo awm chho te hi, kalphung-thar sawrkar a nih zia a langin ka hria a.

Pu Speaker, kan hriat theuh angin, kan sorkar hmaa kan tlangaupui leh kan sorkar hnua kan flagship programme – hand-holding policy a taka implement a ni chho zel hi a lawmawmin, kan Chief Minister pawhin a mimal taka kum tam tak a lo tlangaupui tawh,

kut-hnathawktute dawn kan leh hmasawna atana ruahhmanna thar siam a ni chho zel te leh, heti lama hmasawna kan hmu chho zel hi Zoram kut-hnathawktute tan hian 'kawl a eng chho ta' tih loh theih a ni lovin ka hria a, a lawmawm ka ti hle.

SASCI hnuaiyah crore 500 hmu tura kan inbeisei laiin crore 630 zet kan hmu tawh a, tin, a dang pawh hmuh belh kan inbeisei te hi, kan Chief Minister, kan Finance Minister inpekna leh thawhrimna vang niin ka hria a, a lawmawm ka ti takzet a ni.

Pu Speaker, kan Chief Minister duh dan angin tun budget document-a huaisen taka kan GSDP chhut dan thar tarlan a ni te hi a realistic in, a kalphung-thar ka ti a. Tin, kan Annual Financial Statement a kan hmuh angin, sorkar kum thara kan sum hman tur ruahhman total budget outlay pawh 5.4% velin a lo pung chho ta a; a tam zawk hi revenue expenditure tana hman tur ni mahse, capital outlay pawh eng emaw zahin a rawn pung a. Hei hian hmasawna kawngah pawh rah tha a chhuah dawn niin ka hria a, a lawmawm hlein ka hria. Financial year tharah kan State-own tax revenue pawh kum kal meka hmuh tura kan inngaih zat aiin 12.6% a tam thei tura kan inbeisei te hi, a lawmawm ka ti a. Kan total revenue receipt pawh 20.20% tling thei tura ngaih a ni.

Kan State thawh chhuah ve tur kum kal meka ruahman aia 7.45 % lai maia a pung tura kan inchhut te leh, revenue surplus crore 562.91 neih theih kan inbeisei te hi thil lawmawm lam niin ka hria a. Chutiang zelin, non-tax revenue atanga sum kan hmuh tur pawh crore 15 velin kum kal mek aiin a tam dawn niin a lang bawk a. Chu bakah State tin te chhiah insem tur atanga kan State-in a hmuh tur pawh 16.61%-in a hmasa aiin a sang dawn te hi a lawmawm hlein ka hria.

Pu Speaker, kum kal meka kan leiba tlingkhawm tur kan budget estimate-a chhut pawh kan revised estimate ah crore ₹1000 chuangin a rawn tlahniam a, heng te hi sawilan a thain ka hria. Chutih mek laiin, Pu Speaker, 16th Finance Commission-in post devolution revenue deficit grant atanga kan sum hmuh tur min ruahman sak hi 54% velin a tla hniam dawn tih tarlan a ni a, keini ang State rethei tan chuan a tlakhniamna hi a tam tham hlein ka hria a. Amaherawhchu, Chief Minister, kan Finance Minister kaihraina fel tak hnuaiyah harsa lutuk lovin kan inenkawl chhoh theih erawh ka beisei tlat a ni.

Pu Speaker, sawi tel ngei a ka duh chu, rural local-body grant crore 2-a tlahniam tura tarlan a ni hi tam tham lutuk ni lo mahse, hmanni lawkah 'The Mizoram Village Council Bill, 2025' kan pass a, Rural Administration lamah bung thar kai kan tum mek lai a ni a, hei hi tlem chuan a uiawm deuhin ka hria. Tin, kan 'fiscal deficit' chungchang pawh kan Finance Minister-in chiang takin a rawn sawi tawh a, pung viau anga a lan laiin, tun sorkar kum kan hman mekah pawh GSDP revised figure atanga chhut chuan, hei hi a la zia zawk tih kan hmu thei awm e.

Pu Speaker, Chief Minister budget speech ah khan CSS kaihnawih sum te, SNS purse-model hmanga rang taka RBI hnuaiya e-Kuber platform hmanga release nghal zel tawh tur a nih thu kan ngaithla a, hei hian CSS sum chelh khawtlai a veng dawn nia tarlan a nih kha, a tha hlein ka hria a. Hei hian developmental works pawh chak zawk leh tha zawka a hun taka thawh a nih theih ngei ka beisei a ni.

Pu Speaker, a hma lama ka rawn sawi ang khan, hmasawna ruhrel thar dinna tur capital expenditure pawh 8.2 % lain sorkar kum kalliam tur aini a tam zawk dawn hi a lawmawm ka ti a. Ram leh hnam hmasawna atana tha taka hman a nih ngei ka beisei a. Chutih rualin, social-service sector a kan sum hman tur 4.43 %-in a lo hniam ta hret a, hei hi a uihawm deuh chuan ka hria a.

Kan sawi tawh angin, kan sorkarna hnuai essential commodity supplies ah te, healthcare ah te leh thil dang dangah hma kan sawn zel a, healthcare scheme hnuai ah kum lai mekah crore 20 dah a ni. Tun budget thara crore 50 dah a ni hi mipuite tan a thlamuanthlak hlein ka hre bawk a ni.

Tin, ei leh bar zawna - economic sector-a sum dah 7.27% laia a rawn pung chho ta te, a bik takin kan sorkar flagship programme - Bana-kaih policy atan crore 200 atanga crore 350-a tihpun a ni te hi lawmawm ka ti a. Kan sorkar hian tih tak takna nen kut-hnathawktute hmakhawngai chungin hma a la ka ti lo theilo a ni.

Pu Speaker, a tawp bera ka sawi duh chu, Mizoram hi Central sum ringa khawsa kan ni a, hei vang hian kan sum hman tur ruahhman kawngah leh kan inrelbawlna kawngah zalenna kan nei thui lutuk lova. Kan duh ang leh kan ruahhman ang diak diaka thil tih a harsat thin zia kan hre tlang vek awm e. Chutiang karah ngaihtuahna nasa tak senga hetiang budget tha tak Chief Minister, kan Finance Minister ni bawkin a rawn chhawp chhuak thei hi a lawmawm ka ti a, pass ngei a nih theih nan ka thlawp e. Pu Speaker, ka lawm e.

(Speech not corrected.)

SPEAKER : Member zahawmtak Pu RM Chakma ilo sawm ang.

PU RASIK MOHAN CHAKMA: Pu Speaker, wawinah kan budget 2025-26, sawihona general discussion ah hun ka nei thei hi ka lawm a.

Budget kan pass a, kan present a, mahse mipui leh keima mimal pawhin kan beisei ang lo deuha thil awm hi a tam lutuk a. Ka ngaih dan chuan, budget ah hian kan sorkar khan nikum khan 'austerity measures a la' tih uar takin an sawi a. Kha austerity measures khan sorkar inrelbawlna tihlem a kawkin ka hria a. Tun budget-a kan House Leader thusawiah pawh hian, austerity measures eng angin nge an lak, sum kan senso tur engzahin nge kan tih hniam theih, administrative cost kha eng angin nge kan hlawkpui, tih kha a lang lova, a paw ka ti a. Sorkar inrelbawlna ti tlem turin eng ang post nge kan tih tlem, no-vehicle days te kan siam em, Englai. bawr velah khan kan sum senso tam lo tur zawngin hma kan lak tih te hmuh a ni lo bawk a. Ministerte'n eng inauguration emaw an tih velah te hian a ti tlem zawngin hma an la em, tih pawh a lang lova.

Chuvangin, tawngkam thiam taka austerity measures kan sawi uar em em lai khan, a takin keini chuan kan hmu lova. Sorkarin a ti tak tak a nih chuan, khang te kha budget presentation ah te pawh sawilan awm tak a ni a.

Kan hriat theuh angin, India sorkarin Viksit Bharat, 2047 ah khan India ram hi developed country ah siam a tum a, Central sorkar atangin vision paper te pawh siam mek a ni a, North-East ah pawh hian chu chu an ti tawh a. Khatiing anih lai khan Mizoram-ah hian inclusive development nei thei turin eng hmalakna nge a neih, tih pawh a lang lo a ni.

Central sorkar hi India ram tan hian nu-leh-pa nih a tling em em a, a ram kilkhawr thleng hian engtin nge hmasawna a thlen ang, tih an ngaihtuah thin a, focus-area development te, backward-community development te an ngaihtuah chhuak a, a scheme pawh an launch thin a. Mizoram sorkar ve thung hian chhimlam te, khawthlang lam te, a bik takin border area hote hmasawna tur hian specific scheme te duan ve awm ka ti a. Lunglei leh Aizawl velah eng ang pawhin hmasawn ila, a kilkhawr lam te pawh Aizawl-Lunglei te anga hmasawn ni lo mahse, a awm tawh vel tala hmasawna a awm si loh chuan Mizoram hi developed-state kan ni thei dawn lo reng reng a ni. Literacy ah pawh pakhatna ni turin khawilai area in nge pawt hniam kan tih chuan, sawlai chhimlam leh khawthlang lamte hi an ni. Chuvangin, khan development thilah eng ang pawhin hma la mah ila, heng kan sawi area te kan developed si loh chuan, Mizoram hi developed-state kan ni thei dawn lo.

Tin, Mizoram sorkar sum harsatna hi chu a hriatthiam awm. Mak ka tih em em erawh chu, Mizoram sorkar sum hek miah lovin Central sorkarin khang area te develop-na tur scheme te a duang a. Amaherawhchu, khang scheme ah te khan duhsak kan hlawh lova. Entirnan: 'Backward Community Grant' kan tih te kha a awm a, khang block te kha NEC ah ziah lan vek an nih angin, mumal takin project te siam ni sela; khang area ah khan kan mithiam officer-te tirha, vote zawna tur scheme-a hmang mai lovin, real-development thlenna turin project siam awm a ni a. Chuith laiin, State-matching share 90:10 pawh ni lo, 100 percent share-in a kal a ni. Khang te em kan tih sak lo kha a veiawm ka ti a ni. Khang area te kha Mizoram angah kan ngai lo em maw ni aw, tih ngaihtuahna te a thlen a, a paw ka ti khawp mai.

Backward Community Grant pawh a awm a, term hmasa khan engtin tin emaw NEC ah kan dil a, 6 crore chu min pe ve mai a. A project kan a zawhna pawh a rei tawh a; amaherawhchu, kha project khan state-sorkar a kaltlang a ngaih avangin, kan submit a. Sikul sakna tur crore 5 lai a ni. amaherawhchu, hei hi tun thlengin NEC-ah forward a la ni lova, kan sikulte a chhiat tehlu nen; siamthat a ngai lutuk tawh. Samagra Siksha - state plan fund atanga sum senso ngai lovin, central sum hmanga kan school te siam that theih anih laiin, chutiang te tih lova a awm leh, khatiang hawi zawnga hmalak a awm miah lo mai hi a mak ka ti a ni. Chuvangin, Pu Speaker, nangmah kaltlangin, kan sorkar, huapzo-sorkar nia in sawi hian chak takin hma min laksak hram se ka ti a ni.

Chutiang bawkin, kawng lamah te, infrastructure lamah te, Focused Area Development atangin Ministry tinah 27% kan budget-ah allot a ni thin a, amaherawhchu, hei hi kum tin hian hman lohin a awm thin a ni. Tin, State-sorkarin a duh chuan 'specific fund' nilo, 'normal fund' atang pawhin kha kha a thawh thei a. Central PSU, entirnan: NBCC te, kawng laiha PMGSY te chu, a tha e; hmuh a har a. Amaherawhchu, State-matching share te, central PSU hnuai PRO te emaw, NBCC te emaw, khatiang atang te khan thingtlang kawng tha tak siam turin hma min lak sak sela, state sum hek miah lovin sawlai area saw sector hrang hrangah kan develop thei a ni tih kha kan sorkar chuan a hre ve turah ka ngai a. Mahse, hmalak a awm lova, sawi leh sawi hnu, a mak ka ti a ni. Chuvangin, khawngaih takin khatiang zawng khan hma min lak sak sela.

Tin, point pakhat, sawi loh theih loh chu, Pu Speaker, District Council hi kan awm miau a, eng emaw chen chu State-sorkar kutah a awm a. Mahse, kan Governor thusawiah hian kan assessment te, kan performance te hi a lang lo reng reng ti ila, a tawi zawngin tlemte a awm chauh a ni. Kumin ngat phei chu, kum 52 chung zawnga a vawikhatna leh district

council history a tan, ‘hlahw pek kim loh’ tih hi a ni. RE ah cheng khatmah kan hmuh loh hi a vawikhatna a ni. District Council hi kum 52 a ni tawh a, 53 kan kal mek a, hei hi engnge a chhan? Eng rilru nge kan put? District Council administration-ah diklo deuh chu a awm; khangte pawh kha State-sorkarin tha taka khuahkhirh theihna power chu a nei reng. Kan fate pawh tihdan tawk kan thiamloh chuan, kan khuahkhirh mai a, District Council-te pawh hi state sorkarin fate enkawl angin thinlung takin min enkawl sela, eng emaw diklo awmte a awm pawhin a khuahkhirhna dan siam se a fel mai ang. Hei hi enliam ringawt chi a ni lo. ‘An duh duhin awm teh se’ tih rilru kan pu hi a vanduaithlak ka ti a.

Chuvangin, kan vei zawng leh kan ngaihtuahna te hi Pu Speaker, tih danglam theih dan awm se a tha ka ti khawp mai. Minute 10 hi kan tan chuan a tlem lutuk a; engpawh ni sela, ka duhtawh mai ang e. Ka lawm e.

SPEAKER : Member zahawm tak Pu Jeje Lalpekhlua ilo sawm ang u.

PU JEJE LALPEKHLUA: Pu Speaker, ka lawm e. Vawiinah kum 2025-2026 Pu Lalduhoma’n Mizoram Budget 2025-2026 a pharh takah hian thil lawmawm tak tak hmuh tur a awm a. A zavai mai khan han sawi zuite pawh a chakawm a, Pu Speaker, i remtihna ka ngaihpaawimawh zual tlem han sawilan ka duh a.

Kan Chief Minister Budget Speech-ah hian Mizoram Sorkar hmasawmna hrang hrang kan hmu a. ZPM-in sorkarna a chan tirh khan state sorkarina sum leh pai a enkawl na kawnga inbuatsaihna atan ‘Year of consolidation’ a puang a, mipuite tana tha ber tur ngaihtuah chungin he insiamrem kum denchhen hian kan sum neih angte awmze nei taka pek chhuah a ni a.

Pu Speaker, point 4-naa kan hmuh ang hian, public account hnuaiah kan sum pekchhuah hmabak K. Deposit te, Deposit 3 te, GP Fund leh Pension Fund te a tahtawl zela pekchhuah anih thu kan hmu a. ZPM-in sorkarna a chan hma kha chuan sorkar-hnathawkte’n an mamawh hunah GPF leh thildangte pawh an draw theih thin loh avanga harsatna tam tak kan tawhte pawh kan hre theuh a. Tin, pension chhuak ten pension benefit reitak an nghah hnu pawha pek chhuah a ni hlei theiloh thin avangin harsatna tam tak an tawh phah a. Kan Chief Minister kaihhraina hnuaiah kum 2024-2025 chhunga sorkar-hnathawkte GPF ₹785.90 crore leh pension benefit atanga tangkhang ₹1042.42 crore zet pekchhuah a ni te hi thil lawmawm tak a ni a.

Tin, sorka-hnathawkte’n a hun takah hlahw an lak theih thin loh avangin harsatna chhungkaw tam takin an tawh thin a, hlahw te pawh a hun taka lak a ni chho te hi kalphung tharin a rawn ken tel niin ka hria a, Pu Speaker; kan Chief Minister chungah pawh lawmthu kan sawi duh a. Tin, kan Chief Minister enkawl na atangin sorkar-hnathawkte’n an hlahw lak chungchangah mi tam tak atangin phone call te pawh kan dawng ve a, Mizoram mipuite kan lawm tlang niin ka hria a.

Tin point 6-naa kan hmuh ang khan, power sector lama hmasawmna pawh hi thil chhinchhiah tlak tak a ni a. Kan la hriat theuh ka ring a; kum 2021-2023 chho ah te power company NEEPCO te, NHPC te atangin kan power leiba tling khawm thinna lehkha dengkhawng tak tak kan state sorkarin a dawng thin a. Kum 2023 ah phei kha chuan NEEPCO-in Mizoram sorkar hnena power bill ba a tam lutuk avangin 16th June, 2023 atanga power supply pek tih tawp tur ang hialin a rawn warning a, ramchung newspaper

ah te an ziaik chuai chuai a nih kha. Mahse, kalphung-thar mipui-sorkar hnuaiiah chuan kum khat chhung lekin thil danglam kan hmu nghal a. Kan state-in power leina bill a hun taka a pek zat zat tawh avangin, lawmmanah rebate ₹165.69 lakh zet kum khat chhungin kan dawng let tawh zawk a, power hralhna atanga revenue kan state-in a hmuh pawh ₹783.53 lakh laiin a tam chho ta te hi a lawmawm ka ti a. A hun taka power bill kan pek avangin kan chawi belh thin surcharge kum hmasa lama kan pek thin ₹300 lakh zeta a tlahniam thei ta te hi hmasawna duhawm tak a niin ka hre bawk a ni.

Point 7-naa kan hmuh ang khan, National Social Assistance hnuaiia kum upate, hmeitheih leh pianphunga rualbanlote'n central atanga kan sum dawn thin bakah state sorkarin a tipung te hi a lawmawm ka ti a. Pu Speaker, hei pheih hi chu kan bialah hian kum upa lamte an lawm tak tak a; a then pheih chu lawmna mittui ti tla hial te pawh kan awm a ni. Kan hriat angin, sorkar hmasain cheng ₹100/- an lo pek thin kha, sorkar tharah chuan cheng ₹1000/- a tihpun dawrh a ni te, tin, sorkar thara healthcare bill ngaih pawimawh ber zinga a awm chho ta leh, sum harsa chung pawha mipui bill tang reng sorkarin a clear zung zung ta te hi ropui ka ti hle a.

Pu Speaker, point 8-naa kan hmuh ang hian, kumin chhungin healthcare scheme hnuaiia bill ba tlingkhawma 80% pek tlak a ni tih kan hmu a. Hei bakah hian sorkar kum tawpah hian healthcare bill ba zawng zawng pek tlak vek theih beisei anih tur thu tarlan a ni bawk a. Tin, Mizoram, sorkarin Mizoram Universal Healthcare Scheme hnuaiia inenkawlina changtlung zawk healthcare system keng tela buatsaih mek a ni te hi a lawmawm a.

Hengte hi Pu Speaker, i remtih nain han sawi lawk ka duh a. Pathian leh mipui zarah MLA te kan han ni a, tun hnaiah bial atangin mi-harsate te khawpui zawkah damdawi-in pan tein an kal a, hetiangah pawh hian damdawi-in kawt atangin min han phone a 'golden card ka nei ve lova engtia hmalak tur nge niang?' tih te kan dawng thin a.

Vawiina min lo thlirtute leh min lo thlir ve lo kan thenrual tha, kan u leh nau hetiang tihna chang hre lote pawh vawiina ka sawi duh chu, sorkarin Mizoram Universal Healthcare Scheme in ziahluh hun hi a rawn ti vat turah beisei ila, hengte hi lo ngaihchana, kan u leh nau, kan khawtlangah mi harsa zawk hetiang lam ngaihven lo te pawh kha he scheme-a inziak lut vek turin vawiinah he House zahawm tak kaltlang hian kan chah nghal bawk che u a ni.

Pu Speaker, point 17-naah khan sawilan loh theih loh, kan state kal zel tura pawimawh em em kan hmuh chu, GSDP dik taka chhut ngamna kan hmu hi; kan nihna dik tak aia sanga GSDP figure neih hi kan hmalam hun zela tan a himlo hle a, reality hi thup bo tak tak theih a ni lo bawk a ni. Kan status dik tak mil GSDP figure neih ngam zel hi a pawimawh ka ti hle a. Hmasawn kan ngaihna lai leh tan lak kan ngaihna lai zawng zawng a reality tarlan zel hi, a hniam zawk pawh ni se kan tan a him ber a ni. Tin, politician-te chu sava ang kan ni a; kan hun a zova, kan kal leh mai thin a. Mahse, kan state erawh chu awm reng tur anih avangin, kan tu leh fa thangthar lo awm leh turte tan reality lam hi tun atanga kan hawi ngam a pawimawh hlein ka hria.

Kan hriat theuh angin, sorkar revenue nei chhe ber pawl kan ni a, revenue nei tha lo tan chuan hmasawna kawng kan duh anga chak a zawh a har thin a. Point 24-na a kan hmuh ang hian, kum kal meka state sum lakluh pawimawh ber pakhat state-own revenue atanga sum hmuh zat tur kan target aia sang 12.64% lai kan hmu te hian kan sorkar tan zia a lantir

a. Kum lo kal zel turah pawh a pung zawnga kal zel theih a duhawm hle a, a mipuite bawk hi a zarzotu tur kan ni a.

Tin, point 21-na a kan hmuh ang khan, kum kal mek 2024-2025 budget estimate B aia kum 2024-2025 RE ah kan leiba ₹1,003.94/- crore zeta a tlahniam te hi thil lawmawm tak a ni a, financial management ah hmasawna nasa tak a awm tih a lantir chiang hlein ka hria. Pu Speaker, kan House Leader sawi ang khan sorkar tharah chuan Police te travelling allowance bill tang avanga buai chhungkaw tam tak harsatna tawh te sorkar tharah chuan sorkarin a ngaipawimawh em em a, he harsatna chinfel nan hian ₹87.72 lakh DT hnuai an hmuh thin pangngai baka pek belh an ni te hi a lawmawm ka ti a.

Tin, point 48-na ah khan, Health Care Scheme chungchang kan hmu a, Sorkar hian mipui hriselna lampang a ngaihpawimawh avangin kum thar budget ah hian Health Care Scheme kum kal mek atana kan dah ₹20 crore chu ₹50 crore a tihsan anih tur thu kan hmu a. Sorkar-hnathawkte'n medical bill te rang zawka an lak theih nan leh medical bill tling khawm tam lutuk thin pumpelhna atana ruahmanna hi a lawmawm ka ti bawk a.

Tin, point 50-naah khan, kum kal meka kan tihdan ang bawkin kumthara thingtlang lam mi a mamawh te tana a thlawna ruang phurhna ₹5 crore ruahman a ni leh thei te hi a lawmawm ka ti a. Pu Speaker, hei pheih hi chu a chhawr tu zingah hian keini bial hi kan awm a, a lawmawm hlein hria a ni. Tin, kan nitin eizawna atana pawimawh tak ei leh bar zawna atana hmasawna Economic Service Sector atana ₹3518.37 crore ruahman a ni a. Hei hi budget pumpui atanga 23.15 % a ni a, kum kal mek budget ₹3279.96 crore atangin 7.27% a pung chho ta hi a lawmawm hle a ni.

Pu Speaker, ZPM sorkarin a intiam ang ngeia economic sector hnuai flagship programme - Bana kaih (hand-holding) atan kum 2005-2026 chhunga ₹350 crore a ruahman hi a ropui ka ti hle a. Kum kal mekah hemi puala kan dah crore 200 aiin 75% lai maia a sang hi a lawmawm ka ti hle a, kut-hnathawktute tan kawl a eng chho mek a ni.

Pu Speaker, kan House Leader Pu Lalduhoma'n kum 2025-2026 budget a rawn pharh hi tha ka tiin ropui ka ti hle a Mizoram tan hmasawna a nih ngei pawh ka beisei tlat a ni. Tichuan, he House zahawm tak hian budget hi a pawmpui ngei theihna turin ka rawn thlawp a ni e. Ka lawm e.

(Speech not corrected.)

SPEAKER : A lawmawm e. Tunah chuan member zahawm tak Pu Ramthanmawia ilo sawm ang.

PU RAMTHANMAWIA: Pu Speaker ka lawm e. Hei, vawiinah financial business-a general discussion kan han nei hi a lawmawm hle a. Kumin budget kan han hmuh ah hian thil lawmawm tak takte pawh sawi tur a awm a.

Pu Speaker, kum 6 kal ta 2019-2020 MNF Ministry-a kan budget kha ₹10,692.30 crore a ni a, hemi atanga tun hi kum 7 budget kan pharhna a ni ta a. Tun tumah hian kan budget chu ₹15,198.76 crore zet a lo ni ta a ni. Pu Speaker, kum 6 kal ta 2019-2020 atana kan budget aia a tamna chu, ₹4,506.46 crore lai a ni; kum 6 chhunga a punna ringawt pawh hi tam tham tak a ni Pu Speaker. Tichuan, tun kum kal mek aia kan budget thar a tamna chu ₹786.64

crore, chu chu 5.45% tihna a ni a. Tuna budget kan hman mek hi 2023-2024 aia a punna chu 1.42% a ni a, budget thara ₹786.64 crore-a a pung hi chu, punna tha tak a ni. Budget pumpui atanga chhutin 82.51% lai revenue expenditure a hman tur a ni a, kum kal mek aia a tamna chu ₹583.16 crore lai a ni.

Pu Speaker, Year of Consolidation - Inrenchem kumah kan puang a, sum leh pai siamremna leh sum leh pai inrenchem kumah kan puang avanga kan revenue expenditure a tlahniam duai tura kan ngaih laiin, a ngai bawkin a sang leh hle mai a. Sum inrenchemna kan kalpui leh year of consolidation kan puan hi hlawhtling ni se revenue expenditure tlahniam ngei tur a nih laiin, Pu Speaker, ₹600 crore dawnin a pung ta zawk a ni. 'Kan hmalakna hian awmzia a nei lo em ni aw' tih tur a ni a, sum renchem kuma kan puan reng chung siin, kan duhna lamah chuan sum kan ren hauh lo tih kan hre tlang vek a, hei hi hemi rah te pawh a niin a lang a ni.

Pu Speaker, hmasawna hnathawh tur capital expenditure hi budget pumpui atanga chhutin 17.49% chauh a ni ta a. Sorkar hmasa 2023-2024 khan capital expenditure chu 21.90% a ni. Chuvangin, hmasawn zawnga kal lovin kan hnungtawlh, a tih theih a ni. Chu chu 4.41% in hnathawhna tur a tlem ta a nih chu.

Tin, he kan budget ah hian thlai thar leina tur 'D-A-H' tih kha a lang lova, hei hi khawi atangin nge a lokal dawn kan hre lova; thlai thar lei hi kan tum ta lo nge tih rilruah a awm bawk a ni. Hun hmasa lamah khan finance management thiam bik ang khan kan insawi nasa thin hle a, sorkar kal ta te kan beihna ber pawh 'finance thiam lo; supplementary demand tam lutuk' tih te kha a ni a. Mahse, hei tuna Pu Speaker, i dinglama finance management thiam inti ten anmahni pualin budget an han pharh ta a, covid len lai tih loh ah chuan supplementary demand tam ber kum kan tawng ta tlat mai. Kum 2021-2022 a kan supplement demand sang kha chu covid leng mai bakah thil hrang hranga chhiatna - raltlan, vawk hri, lirngching, kangmei ten min chim buai avanga khang harsatna kan tawh kha mi tam takin min hriatpui a ni.

Mahse, tunah chuan eng harsatna mah kan tawh loh laia kan rin em em, Finance lama mithiam nia kan ngaihte'n budget an han pharh leh enkawl hmasak berah Supplementary Demand a sang ta hle mai a; hei hi, budget management ah kan fail hle a ni lo maw tih ngaihtuahna a awm thei a ni. Entirnan: 2021-2022 covid len lai khan ₹3,863.97 crore a ni a, 2022-2023 ah ₹3141.35 crore a ni a. Tichuan, 2023-2024 (sorkar hmasa) ah khan ₹3,287.93 crore a ni a, tun kum kal mek 2024-2025 ah hian ₹3,476.21 crore a ni ta a ni. A pung hle tihna a nih chu. Pu Speaker, revenue deficit chungchang ah hian Kum 2015 hnulamah Covid-lockdown lai, kum 2020 tih loh ah chuan revenue deficit hi kan nei ngai tawh loa hriat a ni a. Mahse, hei, kum bikah hian a lo awm leh ta a ni. Kan sum hmuh tur aia tam daihin kan inrelbawl tihna a ni thei awm e. Miin ₹10,000/- thlatin hlawnh lain ₹12,000/- hmang si se, chutiang vel chu tuna kan awm dan a ni. Pu Speaker, fiscal deficit kum kal meka BE a sum puk tura tih zat ₹1,366 crore a nih laiin, RE ah chuan ₹2,597 crore zet a lo ni ta a ni.

Kum 2014-2015, 2019-2020, 2020-2021 hi fiscal deficit kan san kum a ni a, mahse khang zawng zawng ai khan tuna sorkar kum kal meka kan puk hi a tam ta daih mai a. Kan Dan FRBM parameter-a 3% hnuuia a awm tawh tura tih kha anih laiin, tunah hian 7.7% kan ni daih ta mai a. Kan CM zahawm takin san chhan hi GSDP tihhniam vang niin sawi mahse,

GSDP a ngai ang pawhin kal ila 5.5% kan la ni ta tho tho dawn tihna a ni. Financial Management thiam kan han tihte hian engtingnge min kalpui zel dawn, Pu Speaker?

Pu Speaker, election campaign lai khan ‘sum kan puk ve dawn lo’ tih kha kan au-hla a ni a, ‘nang ni chuan in puk ve lovang’ tia hnukulh teuha a thusawi lai video te pawh a darh chuai chuai a nih kha. Mahse, heng zawng zawng sawi tute han han sorkar a, leiba a pung thur thur ta mai a ni. ZPM sorkarin hun hmasa lama leiba a chhawm chu 12,082/- crore a ni a, sorkar a inthlak a, budget an han pharh ta a; kum 2024-25 a kan leiba chu ₹13,030/- crore ah kai chhovin, ₹948 crore ngawtin a pung ta a ni. Tichuan, 2025-26 ah hian crore ₹13,999 ngawt leiba nei tura chhut a ni bawk a, a punna hi ₹969 crore lai a ni dawn ta a ni. Pu Speaker, kum 2023-24 ah MNF sorkar lai khan CM office atana sum hman chu ₹252 lakh a ni a; sorkar a inthlak chho a, 2024-25 budget a lo chhuak a, CMO a tana sum hman tura ruahman chu a hma aia tam daih; ₹280 lakh estimate a nih laiin, RE ah chuan ₹412 lakh zet a ni ta daih mai a ni.

Pu Speaker, hengte hi supplementary demand ti tam tu a ni. Chuvang chuan ‘sum inrenchem kumah kan puang’ kan tih dum dum lai hian, a lu ber Chief Minister Office atan, inrenchem awm lo mai ni lo, sum hman tura ruahman aia tam fe hman a lo ni ta zawk hi a paw em em a ni. Kum a lo thar a, 2025-26 budget ah chuan a hma aia tam ₹384 lakh zet mai CMO atana hman turin D-A-H a lo ni leh ta a ni. ‘Kan inrenchem’ kan tih hi, kan ti zel ngam dawn em, Pu Speaker.

A tawp berah chuan, Pu Speaker, hun hmasa lamah khan a khawnpui te kan ti a, kan Chief Minister kal chhuak ta khan ‘khawnpui’ tiin a hman thin a, a khawnpuia sum dah tam kha kan sawiselna a nasa em em a ni. MNF sorkar lai khan kum 2023-24 khan Finance Department a sum dah kha ₹3,324 lakh zet a ni. Tun sorkara budget pharh hmasak berah khan ₹3,438.13 crore dah a ni a, a pung ta a nih chu. MNF hunlai aia a tamna chu ₹113 crore zet a ni. (Pu Speaker, ka zo dawn e).

Tun budget thar kum 2025-26 ah chuan ₹4,330 crore zet mai Finance Department - A khawnpui ah hian dah a ni leh ta a. Kum hmasa aia a tamna chu ₹595 crore zet a ni. Hetia Chief Minister-in a khawnpuia sum a dahkhawm teuh hian Chief Minister intlawnsiak, ‘boruak tha lo’ tia kan sawisel vak vaka kha, a aia uar zawkin Pu Speaker, kan kal ta em ni aw, tih theihin a awm a ni.

Engpawh nisela, budget tha leh tha lo tehna atana an hman pakhat sectoral allocation ah hian General Services Sector leh Economic Services Sector ah sum a pun hle laiin, mipui mamawh phuhrukna lam, mipui nunphung leh hmasawna lam hawi Social Services Sector-a sum dah hi kum kal mek aiin a tlahniam ta tlat mai a, hemi Social Services Sector-a sum dah tlem hi mithiamte chuan budget tha ah an ngai lo a ni.

Pu Speaker, tuna kan budget pharh takah khan thiltha tam tak a awm laiin, a pumpui thua ngaihtuah chuan, hmasawna lam aiin kan hnungtawlh deuh a ni lawm ni, tih hi vawiin ah hian ka present dan a ni e. Ka lawm e.

SPEAKER : Tunah chuan, Member zahawm tak Pu K. Hrahmo ilo sawm ang.

PU K. HRAHMO : Pu Speaker, ka lawm e. Memberte'n an sawi nual tawh a, a tlangpuiin kan hmuhdan hi a inang a. Mahse, tlema zawng an la sawi loh lam han sawi ve ka duh a.

Sawi tawh ang khan kan budget pumpui ₹15,198/- crore ah 82.97% hi hlawhah a kal a, a bak 17% hi leiba leh eng emaw hnathawhna tur a ni a; a sum zawngin ₹2,235/- crore vel tihna a ni a. Chuta tang chuan 'CSS' kan tih central scheme hi 332/- crore a ni a, hei hi kum tina a tlem tial tial mai hi engnge a chhan ni ang? Kan sorkar hi Central lama a tlaktlum loh riauna chhan hi engnge; inthlahrun riauna te a nei em, tih te ngaihtuahna ah chuan a awm a.

Budget related speech a ni tho bawk a, han stress zawk ka duh chu, nikum MP inthlan ah khan Central BJP in a mala sorkar a inbeisei a, mahse, MP 230 chauh an nei ta si a. MP 32 vel an mamawh laiin a thawhpui theih turte an zawng a. Chutihlai chuan a fing hmasa ho Nitish Kumar te, Chandrababu Naidu te chuan, 'keini kan tel ve ang e' an ti a, an tel ve a. Minister te ni ve in, sum leh pai ah pawh tunah hian a neitu chan changin sum semtu ah an tang a, an State tan hna tamtak an thawk a ni tih kan hria; chu chu a fing zawkte tihdan a ni. Keini lam kha kan hre ve lo nain chanchinbu tea kan hmuhdan ah chuan, issue-base a support tur ang khan kan lang a. Chutiang a nih chuan, Central khan, 'issue-base a min support dawn chuan, keini pawhin issue-base in pawisa kan rawn release ang che u' an ti ni awm tak a ni, central scheme a thlen dan a tang hian.

Pu Speaker, hetiang te chuan engtinngge kan ramin hma a sawn theih ang, tih khan ngaihtuahna thui tak min neih tir a. Tunhma kan rilrua hlauh loh tur hlauhna khan min la tuam reng em maw ni. Hetiang rilru hi bansana, ram kan inpek tawh si chuan theihtawp chhuahin kan bei ve tur a ni dawn lawm ni, tih hi a hmasain kan sawi duh a.

Hei, budget theih ang tawkin ka'n zir ve a, Minister pahnihte fak ka duh a. A pakhatna ah chuan, Power & Electricity Minister hi ka fak khawp mai a; a-pa ka ti. Leiba kan neih zawng zawng a rul vek a; tin, thlatin a hun taka a rulh zel theih avangin lawmman te ama zarah kan dawng a ni a, ka fak khawp mai. Khilai Kawlchaw hydro project phase-I hluihlawn tawh khi ti thar leh phei se chuan, a fakawm lehzuak khawp ang a. Khi project hluihlawn tawh khian mega watt 460 a pechhuak thei a, Mizoram ina kan mamawh hi mega watt 180 vel chauh a ni. He mega watt 460 hi hman theia siam ni phei ila chuan, mw 200 han hman chuan, mw 260 vel kha chu duh duhnaa kan hman tur a awm reng dawn a. Chuvangin, he project pawh hi huaisen takin, pa takin take-up leh thei sela chuan a fakawm lehzuak ang, tih kha a hmasain ka sawi duh a ni.

Tin, Member dang pakhat fak phu e mem chu, kan Supply Minister hi a ni a. Mi tih ngam loh, Congress emaw, MNF emaw pawhina tha nia an hriat, mahse an tih ngam loh chu – ration card-sen rate 15/- atanga 32/-a a dah chho kha; sorkar hmasa pawhin kha kha an hria, mahse an ti ngam lo. Khalaia pa taka a che ngam kha fakawm ka ti a ni.

Pu Speaker, ka sawi duh ber chu, CSS hi kan beisei tlem lutuk; Central sorkar-a kan inthlahrung lutuk hi pawika ti a ni. Hetiang hi chuan Mizoram-in hma a sawn theih loh ang. Chuvang chuan, heti lo deuha tih dan hi a awm se, tih hi. Pu Speaker, a tlangpuiin, budget hi pawisa kan hmuh tur kan hmuh hunah ti hian kan hman ang tih beiseina nena siam kan ni a, hetiang bak hi chu siam ngaihna pawh a awmin ka hre lo. Amaherawhchu, kan lo kal tawhna

ah leiba erawh chu kum hmasa aiin a pung hret chu a ni a. ‘Year of Consolation’ kan ti a, mahse leiba a pung leh tho si a; hei hi ka ngaihawh zinga pakhat chu a ni. A bak hi chu Pu Speaker, ka support vek mai ang e. Ka lawm e.

SPEAKER : Pu H. Lalzirliana i sawm teh ang.

PU H. LALZIRLIANA: Pu Speaker, ka lawm e. Chawhnu lama sawi ka tum kha a ni a, mahse hun i han hawn takah chuan ka han sawi mai ang e.

Hei, kan Finance Minister, kan CM zahawmtakin Ni 4.3.2025-a budget a rawn present hi ka’n chhiar chhuak ve chhen a, han fakna lai tur te leh han sawisel ngai lai te pawh a awmin ka hria a, chungte chu ka’n chuk kual ve ang e.

Hei, fakna turte zingah sum tang khang han release tur te, electric bill a hun taka pek avanga rebate kan han hmuh chungchang te, k-deposit-a sum tangkhang han lakchhuah te, tar pension te, sum hnar zawn kawnga an hmalakna te, administrative reforms te, public distribution system ration buhfai, healthcare leiba rulh chungchang te, ruang phurh, sorkar-hnathawk hlawh a hun taka pek, a then peka a then pekloh te pawh a awm maithei e; han fakna tur laiah khangte kha ka’n han la chhuak a ni a.

Kan budget hi kan hria a, nikuma atanga a punna hi 5.5% a ni a. Chutah chuan, kan thiante’n an sawi tawh angin, a hma ang bawkin revenue expense hi a tam leh dawn hle a, 82% a ni a. Tin, capital expenditure hi 17-18% bawr vel a lo ni a, total budget-a sectoral allocation, general services-a 42.84% lai a ei kawk mai a. BE-ah hian Social Sector-ah 31.23% a ni a, nikum aia a hniamna hi -2.31% a ni. Social Service-ah hian kan thang lo a, budget pawh hi a (-) a ni a; Economic Sector-ah hian 3.45% in a pung ve hret a ni.

Heta kan hnathawhna tur tak tak capital outlay phei hi chu ₹2,235/- crore bawr vel chiah kan neih a ni a. Chutah chuan kan receipt tura kan han beisei, ₹12,947/- crore atanga puk tura hi ₹2,250/- crore bawr vel kan nei a ni. Hei, kan budget hi han en ila: kumin kan kumkhatnaa ‘year of consolidation-in kan kalpui dawn’ kan tih mek lai hian, ‘budget tha a ni nge nilo’ tiha kan tehna tur pawimawh takte zingah chuan, kan revenue expenditure hi a deficit tlat mai a; revenue expenditure hi chu deficit lo tura ngaih a ni. A expenditure kan hriat sa tlangpui a ni a, sorkar-hnathawk hlawh te, inrelbawlina te, forecaste theih deuh vek a ni. Revenue Expenditure-a kan deficit hi hriatthiam a harin ka hria a. Covid lai khan revenue deficit kan nei a, chumi tih lohah chuan tun hi revenue deficit kan neih hnai vai chu a ni ta a. Hei hi fimkhur zawka, budget siamlai te leh kan hman dan chungchangah monitor that ngai a niin ka hria.

Tin, fiscal deficit pawh hi kan nei a, tun hma zawng aiin fiscal deficit kan neih tam kum a ni an ti a ni, a bu-a a lan dan hian. Budget Estimate-ah puk belh ngai ₹1,366/- crore a nih laiin revenue expenditure-ah chuan ₹2,597/- crore a lo ni ta a. Tuna kan budget ah hian puk belh tura ngaih fiscal deficit-a kan dah chu ₹1,651/- crore a ni. He fiscal deficit kan neih chhan hi a bu-a a rawn insawifiah danah chuan, kan GSDP kan han tih hniam tak vang leh, a chhut dan tur dik te kan hmang, tih kha a ni.

Hei, kan Finance Minister hian nikuma ama budget pek ngeiah khan GSDP 2024-2025 current price projection chu ₹48,037.52/- crore a ni a, chu chu a hmaa 2023-2024 aia a

tamna hi ₹8,681/- crore tiin nikum 27.2.2024 khan a present a ni. Chu chu kan GSDP a ni a. Amaherawhchu, chhut dan kan hmang thar a, reality figure kan hmang a ni. Heti laiah hian a rawn sawi a, kan GSDP hi a dik zawk pawh chu a ni ang a, tunah hi chuan expert ten an rawn sawi ah pawh, ‘tuna kan hman hi a awm viau a ni’, te pawh kan han ti a, a dik turah ngai ta ila.

Engpawh ni sela, kan GSDP kan hman chung pawh hian kan fiscal deficit hi a la sang viau a ni a, a hma ami pawh kha hmang ila a sang dawn a, tuna figure tharah pawh hian a la sang tho, 5% bawr vel kha chu a la ni tho niin a hriat a ni. Kan GSDP tuna kan hman hi kan hmang chho zel a nih chuan a tha zelah te pawh han ngai ta ila. Amaherawhchu, target kan lo set tawh a; ‘5 feet i zuankhum tur a ni’ min ti a, ‘a ngawi rawh, 3 feet hi ka’n zuankhum zawk ang e’ ti khan, ‘ka zuan apiangin ka zuan khum zawk dawn a lawm’ ti ang deuh te kha a ni thei em, tih te rilru ah a awm ve a. Amaherawhchu, vawiina kan figure hi a rintlak zawk a nih chuan, nakum zel atan pawh, ni e, reality kan neihna tura kha chu a tha ah ngai ta ila.

Hei, thil lawmawm deuh pakhat, kan revenue source tur own-tax kan lak tur chungchangah hian September Ni 1, 2024 khan petrol leh diesel-ah tax kan la a, a punna hi a sang viau a ni. Petrol hi 16.36% atangin 18%-ah a pung a, chu chu per litre-ah ₹5/- ang zela pung chho a ni a. Diesel hi 5.23% atangin 10%-ah a kang dawrh mai a, chu chu litre ah ₹7/- bawr vel a ni. Hei hi ni e, sorkar hmasa-ah te pawh khan ka sawi ve thin a; State hian scope kan nei a ni. State dang kan thenawmte pawh han khaikhin ila, kan rate hi heta tang hian revenue tam tak kan earn thei a ni, tih te ka sawi ve thin a. Amaherawhchu, tuna kan kanna hi a vawrh dawr lutuk em, tih ka ngaihtuah a. Oil Industry-ah kum 22 chhung zet ka lo thawh ve tawh hnuah hian hetiang em ema vawi khata jump hi ka la experience ngai loh thil a ni a.

Hei, Mizoram leh kan thenawm State - Assam, Meghalaya, Tripura te vawiin nia an petrol, diesel RSP (Retail Selling Price) te ka collect vek a; tunah hian Assam-ah pawh hian pahnih a awm a ni; keimahni state border leh Assam lairilah. Tin, Meghalaya-ah pawh hian hetilai kan state-border leh a lairil ah a awm bawk a. Hetilai Assam lama kan state border nen tuna kan difference hi petrol-ah hian, paise 46-in kan la hniam a, HSD-ah pawh hian 3.69-in kan la hniam a ni. Meghalaya-ah hi chuan petrol-ah pawh ₹1.30 paise in kan sang a ni. Tam tak motor-a zin veivak leh fleet nei tam ho ten ‘Mizoram chhungah petrol/diesel ila ang’, an tih thina kha, tunah chuan awmzia a awm ta miah lova.

Engpawh ni sela state mipuiten kan afford anih chuan, a pawl lo e; amaherawhchu, mipuite mila heng kan revenue earn-na tur kan han jump-na te hi a sang lutuk lo maw, tih kha ka rilru ah a awm a. Mipuite’n kan tlin a nih phawt chuan, state revenue kan earn-na tur a ni a; thil tha takah kan hmang thei dawn anih pheichuan thil tha tak a ni, tih te hi ka lo aupui ve thin a ni.

Amaherawhchu, vawi leh khata ₹5, ₹7-a sang em em hi chu ka la experience loh thil a ni a. ₹1.50 te, ₹2 te, a tam berah 90 paise emaw, mipuite milpui zawnga tih thin a ni a, a hnuah tihsan leh deuh te a awm mai thin. Chu chu kalphung a ni a. Vawiinnia kan kalphung-thar hian hei hi a rawn ti lutuk em, tih kha ka’n question duh a.

Tichuan, ‘Year of Consolidation’ kan tih mek lai hian kan revenue a deficit a. Chubakah, kan in save theihna tur ‘Others’ tih, a loh theih loh thil chu tam taka awm a, Others-a kan

expenditure hi a sang em em a ni. Hlawh awm ngai lo hlawh pung han nasa te, hna lak belh tih te, tin thil chi hrang hrang CM Secretariat thuamna te leh khang kha an rawn sawi tawh kha a figure chu ka nei na a, hun a awm tawh loh avangin ka sawi lo mai ang a.

Khang kha ‘Year of Consolidation’-ah pawh khatiang kha kan dinhmun anih chuan kuminah te hian puang leh ila, kan puang lo anih phei chuan kan revenue hi a deficit nasat lutuk a hlauhawmin ka hria a. Chu chu kan sorkar enkawltute pawhin hei hi monitoring nasa zawkin ti sela tih kha he budget atanga kan hmuh ka’n sawi tel ve duh a ni e. Pu Speaker, ka lawm e.

SPEAKER : A lawmawm e. Hei kan kan Health Minister hmalakna in Health Department ten memberte tan free medical check-up a tih theih reng e, tih kha kan hre dawn nia. Tunah chuan, chhun-thingpui in chawlh kan nei ang a, dar 2-ah kan lut khawm leh dawn nia.

(Recess at 1:00 PM)

2:00 PM

SPEAKER : Kan budget-a general discussion kan nei mek a ni a; tunge sawi leh ang le? Kan wind-up hnai tawh mai dawn em ni? Aw le, Member zahawm tak Pu C. Ngunlianchung a ilo sawm ang.

PU C. NGUNLIANCHUNGA: Pu Speaker, vawiinah general discussion kan kan nei a; thiante ho ka han ring deuh a, anni lam kha an lo inpeih lo deuh nge, sawitu kan tam lo khawp mai a. Budget sawi hi kan phur lo hle mai a, heta tang pawh hian budget tha a ni lo a ni tih chu a lang chiangin ka hria a.

Pu Speaker, kumin a kan budget hi avaiin cheng ₹15,198.76 crore a ni a, han en hian a manganthlak ka ti a. Kan Sorkar, sorkar thara revenue expenditure te, capital expenditure te kan han hmu a. Pu Speaker, ka hmaah East Tuipui bialtu khan a lo sawi tawh a, tin, kan House Leader ngei pawh hian term hamsa lama helama kan thut ho lai khan budget discussion ah a lo sawi tawh thin a. Revenue expenditure tunah hian 83% vel leh, capital expenditure 17% vel a ni a. Pu Speaker, chuta tang chuan leiba rullhna tur eng emawzat a la awm bawk a. Tichuan, capital expenditure -hmasawmna hnathawhna tura kan hman tura chu ₹1900 crore vel bawr a lo ni chho ta a. Kan Minister leh ruling MLA te tan pawh a chhenfakawm loh hle a ni.

Kan budget speech-ah kan hmu a, ruangphurhna te, GP Fund te kha ram hnuk tak tak khawih, kan ram tana asset tling han siamna tur niin a lang chiah lova. Tin, chumi piah lamah chuan Pu Speaker, vawiinah main ah pawh phone call te kan dawng a, MNREGA hnuai atanga VC tena material component an chan ve tur tak tak pawh kha ruling MLA ten an mi leh sate tan VC te chhuhsakin, VC te chan ai kha mimal an pe a ni an ti a. Tukin lam leh nimirah te pawh zawhna te kan dawng a, ‘hei hi thil ni thei a ni em’ tih te min rawn zawt a. Ruling an ni a; an ti duh tlat a nih chuan an ti mai a ni ang chu. Mahse, keini Congress kan sorkar lai kha chuan khatiang khan VC te chanvo kan chhuhsak ve ngai lova, VC ten an chang mai thin a ni kan ti a. Tunah chuan kan budget en hian hmasawmna hnathawh tur leh kan MLA ten kan biala hna kan thawhna tur capital expenditure kha a awm tlat loh avangin, kan mi leh sate tih lawmna tur anmahni tanpuina tur kha a awm lo a ni.

Tun tum general discussion-a ka'n sawi duh leh em em chu Pu Speaker, 2024 December atanga thingtlanga kan mite'n job card an thawhna an la hmu lo a ni tih te phone kan dawng reng thin a, khangte kha kan House Leader hi finance minister anih angin nakinah min react sak se; engnge kan pek theih loh chhan kha. A bik takin keini thingtlang bial tan phei chuan an inngahna ve tak tak a ni a, an khawngaihthlak em em a ni. 'Tunah hian vawithum thawhna kan la thei tawh lo a ni' an ti a, an mangan thu te an rawn sawi a ni.

Kan budget han en hian, Mizoram-a department 49 vel awmah hian hlawh indaihloha hi department 30 chuang a awm dawn niin a lang a, Pu Speaker. Hei hi kum tawpah hlawh indaihlohna na na chu hlawh kan pek ngei ngei a ngaih avangin, kan hlawh pekna tur kha Supplementary Demand-ah kan hmu chho dawn a ni a. Department, nikum an BE leh salary pawh pha ta lo kha 18 ngawt mai an awm chho te, nikum Supplementary Demand kan en chuan chiang takin a lang a ni.

Tin, Pu Speaker, kan Finance Minister-in nakinah min hrilhfhah se, he Legislative Assembly Secretariat ngei ah pawh hian, salary tur hi nikum lamah khan ₹2448.70 crore a ni a, kuminah ₹2,100.00 crore a ni a; nikum kan phaklohna hi ₹348 lakh lai mai a ni a. Tin, helaiia hriatthiam loh deuh mai ka neih pakhat chu, Wages ah hian nikum ah ₹141.5 lakh a ni a, kumin ah ₹442.6 lakh a rawn kal daih mai a. Wages lam a pung a, Salary lam a hniam leh lawi si kha; tin, a BE hrim hrimah pawh a ni tho a.

Tin, Food & Civil Supplies ah te pawh a BE ang zawng te phei chuan ₹4072.65 lakh lai mai a ni a, salary ah hian ₹85 lakh-in an tlahniam a. Tin, wages ah pawh hian ₹46.48 lakh-in nikum kan phak lo a ni. Thil vanduaithlak chu, helaiia kan ngaihthlak thin ang leh budget speech a kan hmuh angin Higher & Technical Education te pawh Pu Speaker, nikum kan phak lohna a nasa em em mai a ni.

Pu Speaker, services hrang hranga budget allocation-a thil lawmawm lo tak nia lang chu, sorkarin mipuite rawng a bawlina tur ber social services allocation a tlahniam hi a ni. BE leh RE khaihkhin hian kumin social services atana sum dahbelh ₹878.7 crore niin, 16.35%-in a tlahniam a. Tin, hei hi nikum BE estimate nena khaihkhin pawhin ₹105 crore-in a tlahniam bawh a ni.

Tin, economic services-a sum dah ₹264 crore in a tlahniam a. Hei hi chu kum dangah pawh tih thin dan a ni a, general services-a sum dah kum laihawla outlet component re-appropriation avang te pawhin a ni thei a.

Tin Pu Speaker, social services lian tham chu a awm vak lo; mahse, social service-ah hian sorkarin mipuite hriselna atan te, zirna atan te leh thianghlimna atan te, rawng an bawlina tak tak lanna a ni a. Sector dangte nena khaihkhina he sector dah-pawimawh lohna hi mipuite ngaihthahna lian tak niin a lang a. Nge ni a, revenue surplus kan neih theihna tura adjustment siamna sector-ah kan hmang zawk? A nihna takah chuan, min thlangtingtu mipuite zah lohna a ang hle a ni.

Year of Consolidation pawh hi sawi tel ka duh a. Electric bill ba clear te, GP Fund tangkhang release etc. te ha hipin kan sawi a. Hei hi chiang zawka han bih chet chet chuan, P&E budget actual expenditure, 2024-25 RE leh 2023-24 han compare ila, a kal lai kum hnih liam ta 2023-24 aia a sanna chu ₹86 crore chauh a ni.

Tin, Public Account Disbursement hi han enchian chuan kum kallaia k-deposit atangin ₹16.10 crore pek chhuah a ni a. Hei hi sang bik ta viau a ni lo; 2022-2023 ah pawh ₹1,725.2 crore pek chhuah a ni a, 2023-24 ah pawh ₹1,319 crore lai disburse a ni. Tin, Public Provident Fund pawh kum 2024-25 ah 968 disburse a ni. Tin, hei hi a sang lemlo a ni. 2018-19 ah khan ₹1,095 crore te, 2019-20 ah ₹899 crore te disburse a lo ni tawh a ni. Hengte hi ka'n sawi chhan chu year of consolidation-a revenue expenditure titamtu leh revenue deficit kan neih chhan, thil tha ti anga sorkar kan insawina te hi thil lian tham lutuk niin a lang lo. Thil pangngai normal trend mai a ni. Revenue expenditure tipungtu dik tak zawk chu, nuam-tawlina vang chauh a ni. Chumi awmzia chu, revenue expenditure kha a tikiam tur zawngin hma kan la lova, kan leiba a pung tulh tulh a.

Tichuan Pu Speaker, congress sorkar lai khan 2015-16 ah khan year of consolidation puan a lo ni tawh a. Khami kum OMB atang khan ₹200 crore chiah kan puk a ni. Kumin financial statement pheh 15-naa 'loan vawmhlum tur; internal debt-ah 101 market loan' tih kha, khami kuma sorkar puk kha anih ngei a rinawm a, tun hi a kum 10-na chiah a ni a. Han ngaihtuah teh u, kumin year of consolidation kan puan kumah OMB atanga kan puk nasa takin a tihnam thei a. A hnu kum lo kal leh turah liquidation-burden nasa takin a lo chhawk a ni. Tuna sorkar hian year of consolidation a puan kuma OM chu ₹1170 crore zet a puk a ni. Hei hi 10 sawm vela sorkar leh tur te tan chuan repayment-burden lian tak siam tur a ni.

Ka sawi tum ber chu, Pu Speaker, year of consolidation hi a tak taka hmalakna ni lovin, 'slow-dance mai a ni' tih hi a ni. Chuvangin, he hmalakna hian physical outcome pakhatmah a nei ta lo a ni. Inrenchem kumah kan puang a, Pu Speaker, kan pawisa puk a sang tulh tulh a.

A tawp berah chuan, Pu Speaker, nimin lamah kan pass kan revenue statement te han en ila. Pu Speaker, Excise & Narcotics a kan beisei chu revenue receipt budget a ni. Hetah hian ₹230 lakh chauh kan beisei a, nikum lamah khan nuai 200 beisei a ni a receipt budget ah, kuminah hian ₹230 lakh beisei a ni a. Nimina kan dan pass taka Dan siam chhanah chuan, 'pawisa harsat vang a ni' tih kha a ni a. Hetah hian revenue lo lut tur kan beisei ta lo tihna em ni, tih lai te kha.

Pu Speaker, budget session hi kan nei thin a, kan inbuatsaih ve nasa thin a. Sawina hun a tlem thin lutuk hi chu a pawl a ni. Pu Speaker, ka lawm e.

SPEAKER : Memberte kan duh thlan zat kha a ni miao si a, a tih hleihtheih loh a ni e. Member zahawm tak Pu VL Zaithanzama ilo sawm ang.

PU VL ZAITHANZAMA: Pu Speaker, 2025 leh 2026-a kan budget kan Chief Minister zahawm tak, Finance changtuin langtlang taka a pharh leh hi lawmawm ka ti a. 2024 leh 2025 kha lei rem rahna tura inbuatsaihna atana puan a ni a, hlawh pawh kan hlawhtlingin ka hria. Kum hnih-khat kal ta khan sorkar-hnathawkte'n a hun takah hlawh an la ngai lova, ni sawm dawn dawn te hlawh la lovin an awm thin a. Tunah chuan, a hun takah sorkar-hnathawkte'n hlawh an han la pawh hi insiamremna ropui tak a niin ka hria a, sorkar hnathawk te pawh an lawmin ka hria.

Chu mai ni lovin, thil tha tam tak insiamna kumah hian tih a ni a. Electric bill ba, kan bat rei avanga late fee kan chawi thin te kha a hun takah pek a nih vangin rebate ₹165 lakh

chuang zet kan han dawng te hi, ka hriat theih tirhah thil la awm ngailo a ni a. Tun hma chuan late fee kan chawi a, pawisa neih loh naka laiin kan pek belh nghek nghek zel mai thin kha a ni a. Heng te hi han sawi loh atan ka phal lo a ni.

Hetiang bill ba tam tak sorkarin a bat khawl entirnan - healthcare ah te pawh damlo mangang tam tak hospital awm man leh an damdawi leina man bill ba avanga thu kun rengte ta kan bat khawl 80% zet kan han pe te hi a ropui tak zet a, sawi loh phal chi niin ka hre lo a ni.

Pu Speaker, insiamrem kum kha kan Finance Minister hian tha takin a hmang a, kum lo kal turah hi insiamrem kuma kan hmang leh dawn a nih si loh chuan, hmasawna chu rin ai hian a kal chak dawn niin a lang. Kan insiamrem kumah leiba tam tak phurrit kan rul zo a ni deuh ber ta a. Vawinah hian kut-hnathawka eizawngte'n an thlai tharte man man taka an han hralh chanchin han sawi te hi thil nuam tak a ni. Chuta lo lang ta chu, 'sum hi a tam lam aiin, a hman dan hi a pawimawh zawk a ni' tih a takin, tun kum kal meka kan leiba rulh tam dan atang hian a langin ka hria a. Tar pension ₹1,000/- a tihsan a lo ni te hi, kum upa lamte hian lawmawm an ti a, an beisei phak bak niin ka hria.

Tunlaia kan sawi tam tak SASCI sum te hi January, 2025 thla thlenga ₹792.18 crore min han pawm sak hi a ropui a. Tunah sum fai ₹630 crore zet kan dawng tawh a, kan la dawng belh zel dawnin, tunah pawh kan dawn belh nual tawhin ka lo hria a, chungte chu ropui ka tia ni.

Tin, Pu Speaker, Food Security Act-in a huam ve lohte atangin buhfai man kg ah ₹15 -30/- a kan Minister-in an ti sang ngam te hi a huaisen thlak ka ti a, ropui ka ti a. Heta tang hian sum tam tak a lo lut a, thla 5 chhunga ₹20 crore lai kan hum theih phah hi lawmawm ka ti tak zet zet a ni. Buhfai hralh bang pawn lama hralh phal a ni ta lova, thla 12 lek chhungin buhfai quintal 46,000 zet hum a lo ni bawk a. Hetiang thil tha nia kan hriat te vote hmuh loh hlauh vanga ti ngam lova kan ip reng thin kha, tunah huaisen takin kan han ti a, petrol leh diesel atanga cess kan han la te hi insiamrem kum atan chuan kan insiamrem tha hle niin ka hria a ni.

Hei, GPF pek chhuah theih loh ₹700 crore chuang zet mai kan han pe thei te hi a ropui ka ti a. Ka rilrua lang chu, pension benefit ₹1,000 crore chuang zet pek chhuah hi a ni. Pension benefit kan pe hleithei lova, an pension tawh si a; Thla tin hlauh pawh nei tawh bawk si lo khan tam tak an vir buai a ni. Khang harsatna avang khan dam ngawt theih a ni lova, natna ten chhungkua a rawn tlakbuak a, hlauh mumal pawh nei tawh lo pension hunah eng emaw, 'in te pawh kan sa ve ang a' ti te khan engmah hmu thei lova hun rei tak an han awm kha hrehawm an ti em em a. Tunah kan han pe chhuak zo thei te hi sum kan hman thiam zia tilang tu ah ka ngai a ni. Insiamrem, inrenchem kumah awmze nei takin sum kan hmang a, leiba tam tak rulh a lo ta hian kan Finance Minister rintlak zia a ti lang a ni. Chuvangin, kumina kan budget pharh mek 2025-26-a kan sum hman tur pawh hi hetiang bawk hian kan hmang tha leh dawn tih a lang a, a rintlak a ni.

Tunah hian PHE hnuaiah tui pump-na tur ₹60 crore dah a ni a. PWD te leh PHE te hi an pawimawh em em a; a bik takin PHE hi. Tui tel lovin kan nung thei lova, tunah Aizawl khawpui chhung tui chawmna a tha chho ta zel a, tui pawh kan hmu tha khatin ka hria a. Hetianga kan hmuh that zel theih nan ₹60 crore hi tangkai takin kan hmang leh ngei turah ka ngai a ni.

Health Care Scheme atan ₹50 crore dah leh an ni te hian ngaih a titha a. Healthcare scheme ba tam tak kan rul zo tawh a, tuna ₹50 crore hian hna tha tak a thawh leh ka ring a ni. Tin, Medical Reimbursement atan ₹100 crore lai kan han dah te leh ruang phurhna tur ₹5 crore lo lang te hi a lawmawm ka ti a. MLA leh chhiat tawk chhungte hei hian a thlamuanin, a tilawm em em a ni tih Pu Speaker.

Tichuan, Hand-holding atan ₹350 crore zet kan han dah leh thei a. Tunah hian Pu Speaker, power leina tur ₹500 crore kan han hmu hian kum lo kal turah pawh power man ba late fee chawi lova rebate kan hmuh leh ngei, hei hian min tibeisei tak zet zet a ni.

Pu Speaker, hun tha tak min pe a ka lawm e. Kan CM zahawm tak Finance changtu in budget tha leh rintlak zet a rawn pharh hi tha ka ti a, ka han sawi ri ve leh a ni e. Ka lawm e.

SPEAKER : A Lawmawm e. Dr. K. Beichhua ilo sawm ang.

DR. K. BEICHHUA: Pu Speaker, ka lawm e. Pu Speaker, kan hmuh angin Sorkar kumthar atana kan budget chu balance budget niin, kan sum hmuh tura kan beisei leh sorkarin a hman chhuah tur zawng zawng Revenue Receipt leh Capital Receipt te hi hi a inzat chiah chiah a, ₹15,198.76 crore ve ve a ni. Kan sorkar hian sorkar sum dinhmun sawhngheh a tum nasa viau a, kan kal tawh chinah. Tunah pawh hian budget han en hian kha lampangah khan rilru a sawrbing deuh niin a lang a. Tun sorkar kum kal mek 2024-25 atana nikum budget session kan neihah khan kan Finance Minister-in ‘Year of Consolidation’ ah a puang a, hemi avang hian sorkar leiba te pawh nasa takin budget bu ah khan

(Pu Lalramliana Papua, Panel of Chairman takes the Chair.)

Pu Chairman, ‘rulh a ni’ tih te pawh kan lo hmu a, a lawmawm viau a. Kumin 2024-25 RE ah chuan kan leiba chu cheng ₹1003.94 crore zet in a thlahniam tih te pawh kan lo hmu a, a lawmawm viau a ni.

A tha lam tam tak a awm a, a fuh zan lo lai te pawh a awm a; a tihfuh vek theih bik lova. Chutih lai chuan, Public Account hnuai sorkar sum pekchhuah bak k-Deposit sum tlingkhawm tih chhuah te, GPF leh pension benefit sum tih chhuah te kan Finance Minister-in chhuang taka a rawn tarlan te pawh kan lo hria a. Pu Chairman, sum inrelbawl na tha kan neih theih nan kan Finance Minister hian theihtawp a chhuah tih chu a langin ka hria a. Chumi piah lamah hei, Adviser to CM (Finance) smart leh fel tak, kan hmuh loh lama football thiam tak te kan han nei a, a thlamuan thlak hlein ka hria a. Ngun taka kan han bihchian chuan, 2025-2026 budget tur han thlir vang vang hian thil tam tak a thlahniam a ni. A bik takin central scheme lamah hian a thlahniam tlangpui a, hei hi keini ram angh chuan kan inenkawl na tangkai tak a ni baw si a. Heng ah hian kan insawrbing deuh hleka, tan kan lak hi a ngai awm mang e, ka ti a.

Tin, kan budget-ah hian loan lak tura ruahman a tam hlein a lang a. Hei hian, hetia han en thuak chuan ‘a va dik lo ve’ tih tur te pawh a awm a, kan fimkhur hle chu a ngai dawn a ni. Loan lak chu, a hmanna tur tha a awm phawt chuan a tha a ni. chuvang chuan, a hmanna tur dik leh ram tana ro-ting tur thil tha kan siam dawn chuan, loan pawh hi hlauh tur vak chi ah ka ngai lem lova. Mahse, a hmannaah hian rinawmin, Pathian duh dana kan hman phawt

chuan, chu chu loan tha a ni dawn a ni. Annual Financial Statement 2025-2026, phék tawp ber kha ka'n en a, table a awm a. Table column tawp bera '2024-2025 BE' tih kha chu a dik tawk lo em aw ka ti a; a column dangah khan '2024-2025 BE' tih kha a awm tawh tho si a. kha lai kha dik hlelh deuhin ka hria a ni.

Tin, 2025-2026 Budget sawifiahna leh thil dang kan han en hian, engatinge 2024-2025 RE awm tawh si; 2024-2025 BE hi tun BE sawimam nana kan hman tlat? Helai hi hriatthiam a har ka ti a. Hemi a nih chuan, a tak rama thil awm tawhsa hi a ring tehchiam lo tihna nge, tih ngaihdan te pawh a neih theih dawn a ni, Pu Chairman.

Tin, motor vehicle, atanga chhiah tax hmuh kan inbeisei te hi 2024-25 RE nen hian a inangin kan dah a. Motor hi kan hriat angin a pung tual tual si a, nikhatah engzat nge Aizawl khawpui leh Mizoram khawpuiah hian pung, engzat nge kan lei thar, tih te rilruah a awm lo thei lova, helai hi mak ka ti deuh hlek a.

Tin, kan Minister-in nakinah rem a tih chuan min han react nghe nghe se, "Taxes on Commodities and Services Other than GST" tih chhunga 'Other taxes and TDS on commodities and services' tih hi, a punna tur a sang hle mai a. Hei hi a chhan kan Minister-in min han hrilhfiah bawk se.

Tin, 'State own non-tax revenue' hnuai interest receipt kha 2024-2025 RE ah khan ₹5,070 lakh a ni a, 2025-2026 BE-ah ₹4,400 lakh a ni bawk a; kum hmasa lama revised estimate pawh a pha lova, hei pawh hi enge awmzia ka hrethiam lova.

Revenue Account leh Capital Account disbursement lam hi en ta ila, Health & Family Welfare ah hian 2024-2025 RE hi tuna BE hian a pha lo nasa mai a, hmanna tur lamah hian kan ip deuh dawn tihna nge? Hriselna kawnga hmalakna ah hian tlemin kan inkuangkua deuh hlek em, tih min ngaihtuahna tir a ni. Hetiang chuan health infrastructure lamah hma kan sawn thei lo ang tih a hlauhawm a. Chuvang chuan, helamah hian kan insawrbing deuh hlek a ngaiin ka hria.

Tin, Economic Service Capital Account disbursement lamah hian Pu Chairman, thil lian tham tih kan tum lo niin a lang a. 2024-2025 RE hi tuna BE in a phak lohna a tam khawp mai a, hei hian ngaihtuah a ti thui a. Social Services lamah hian State investee te neih tumna a awm avangin tlemin capital expenditure ah hma kan sawn hret a; chumi tih lovah chuan infrastructure development lamah kan tha lutuk dawn lo niin a lang a ni. Mahse, heng te hi loan puk hmangin kan ti mai thei tho a, a hmanna dik tak leh ram ro-tling a nih dawn chuan, a loan lamah te huaisen deuh hlek ila.

Pu Chairman, chutih laiin thil pawimawh deuh - hand-holding, kan flagship programme atana ₹350 crore chauh hi zokhaw lama mipuite'n an thlamuanpui ang em, tih hi. Tin, thlathar leina tur kumin budget ah hian a rawn lang tlat lo mai a. He kalphung-thar sorkar hi kut-hnathawktute ngaituhtu, nimin lamah pawh nasa takin kan thlai chi hrang hrang atanga wine siam tih pawh kha a rawn lang a. Kut-hnathawktute hi kan sawi ang em hian kan vei lo nge, tih hi kan budget atanga ka hmuh dan a ni. Chuvang chuan, helai hi a thlamuanthlak zanin ka hre lova; kawng danga hmalak tumna te a awm anih chuan thu dang ni se. Kalphung-thar sorkar chu kut hnathawktute tana campaign angin kan in chhal

si a, kut-hnathawktute tan hian a thlamuan thlak lem lo ve, tih hi Pu Chairman, ka hmuhdan a ni e. Ka lawm e.

CHAIRMAN : Hun a hmang thiam hle mai a, a lawmawm e. A dawt lehah chuan Pu TBC Lalvenchhunga sawi turin sawm zui ve leh nghal ang.

PU TBC LALVENCHHUNGA: Pu Chairman, vawiina Budget-general discussion a sawi thei tura hun min pek avangin lawmthu ka sawi a. Vawiin chawhma atangin kumin 2025-2026 lo awm tura Sorkar budget te kan sawiho a, chung atanga lang chiang reng chu, he lehkhawba kan Finance Minister-in budget speech a neih ami hi an rawn tifiyah-famkim viau hlawmin ka hria a. Eptu lam te pawh an thusawi hrang hrang enin, minute 10 chhunga sawitur hria kan tlem riau mai a, ban pawh kan phar vak lova. Kum dang ang lo takin ni khat chiah general discussion hun kan nei chung pawhin, kan hmanhmawh lem lo a. Budget hi sawisel tur emaw a tlem deuh a nih kan ring deuh ringawt a. Ni lo se chuan, phur taka han phar suau suau awm kan nih laiin.

Kan thusawi hrang hrang atanga ka lo thlir vena ah chuan, kan sorkar hmalakna kan Finance Minister-in kumina a budget pharh hi a tha kan ti tlang niin a lang a. Heng kan sawi hrang hrangte zingah hian lang lian deuh deuh awm chu, ‘revenue expenditure a va sang ta ve’ tih te kha a a ni a. Heng hi ka lo zir ve tawhna, tunhma atangin budget hi ka lo enchik ve em em thin a, number hian min misguide thei em em bawk a. Chutiang karah chuan, eptu lam sawite pawh kha ka lo thlir ve a, kan deficit neih dan te. Tin, tv lama kan mi-thiamte sawihona te ka lo thlir a, “minus-in bul an tan dawn; Annual Financial Statement phok hmasa berah khan minus a ni nghal” tia han sawi chuan a awm-ang ve viau mai a. Revenue Expenditure pawh “82% a ni dawn” han tih nghal tawng mai te; kan chhut kim lova. Kan budget zir dan hi a tlangpuiin, kum hmasa budget lam kan en ve tawh ngai lova; chumi mil chuan kan sawi ta thin a. Hei hi a pawl niin ka hria a. Hmasawna tam tak hmuh tur awma kha kan hmuh kan niin ka hria a.

Pu Chairman, hei hi Annual Financial Statement kum 5 chhung ami a ni a. Kumin Budget-a Annual Financial Statement kan en reng reng chuan, a kum hmasaa revised leh, a hmasa lam actual kan ena, siam rem tawh hnu fel-faia kha dik ta ber emaw tiin kan sawi thin a. Kan Chief Minister, kan Finance Minister-in a sawi thina chu, “number dik lo avangin kan economy, kan financial position (kan sum dinhmun) kan tarlang dik kim lo thin a ni,” a tiha kha a tilang chiang bawkin ka hria. A chhan chu, heng lehkhawba te han keu let hian awlsam te-a lang chu, opening balance hi kumin chauh a ni lova, nikumah pawh ₹38,989 lakh in a tlem zawk a. A kum hmasa lehah ₹64,001/- lakh minus-in bul kan tan a, a kum hmasa lehah ₹13,309/- lakh in bul kan tan a, chumi kum hmasa leh 2020 ah ₹66,165/- lakh minus sain bul kan tan a. Chumi hma lehah chuan ₹30,049/- lakh in bul kan tan a. Hei hi a vawikhatna a ni lo tih kan en a ngai a; kum hma lama corrected figures tawh kan va sawi ta thin a. Khami kuma kan budget estimate leh kumina kan budget estimate atanga kal dan dik lo kha kan Finance Minister hian siam that a sawi kha niin ka hria a. A chhana chu, kan GSDP value atangin kan fiscal indicator kan en thin avangin, fiscal deficit te pawh a sang ber a la ni. He ‘Year of consolidation’-a reveue a sang thei ang bera kan han chhut ang chi te kha a dik lova.

Nia, FRBM Act-in 3% ti tura min kawh hmuh lai khan kan budget estimate kum khat chauh kan en thin avangin kum nga kal taa kan budget zawng zawngah khan kan fiscal deficit

kha 3% vawikhat mah a tling lo a ni. Congress Sorkar tawpah khan actual kan hmuh hnuhnun berah deficit -1.57 ah kan awm ve a, a dang zawng zawngah kha chuan 2.5 – 2.8 -ah kan chho ta a, chu chu estimate a ni. Actual a rawn chhuak ta hlawm a, kan figure hi a dik loh thin a ni. Kum 4-5 a lo nih khan a hlui kha kan zu en ngai tawh si lova, kan sum dinhmun tak kha kan hre tawh ngai lova. Chuvang chuan, vawiinniah inchirhtheh nan kan hmang thin niin ka hria a.

Chuta ka'n sawi duh chu, Pu Chairman, kum 2019-20-ah khan actual-a kan fiscal deficit kha 4.62 daih a ni; dan pawn lam a ni. 2021-ah phei chuan a actual, (a tak tak) hi 6.43% a ni; kan GSDP atanga kan fiscal deficit-a hi. Chutiang bawkin 2021-2022 ah phei chuan 5.20% a la ni a, RE-ah khan; 2022-2023-ah pawh 6.95 a la ni ta cheu a, 2023 & 2024-ah khan 4.73 a ni. Engtiklai mahin sorkar liam ta ah khan 3% chu sawi loh, Covid avanga min phal sak chin 4% pawh kan pha lo reng reng. Amaherawhchu, budget kan pharh apiang erawh chuan, kan pha em em a, 3% below-ah a rawn pung ta thin a. Chumi a tihlemna chu engnge a chhan kan sawi duh chuan, kan GSDP kha a factor-a kan lak vang a ni.

Kumina kan sorkarin a rawn chhawp chhuah hi 'Arima Method' te an ti a, time series an calculate dan te an han thlakah hian, kan GSDP tur kumina kan ruahman hi ₹36,000/- chauh a ni a, a lo tlem ta a ni. Chuvang chuan, kan GSDP atanga chhut a nih miao avangin kan deficit ratio kha 4% chuang a lo ni ta a. Chu chu engnge a chhan kan tih chuan, a tak leh a tak lo lai hi kan hriat a ngaiin ka hria Pu Chairman. Example mai maiah, 2021-2022 kha han en ta ila, khatih lai kumli liam taah khan vawiina kan GSDP estimate ai hian ₹1,000/- crore chuangin a sang daih tawh a ni. Kan estimate kha a san na na na chuan, kan deficit kha khutah a percent kha a hniam zel ta a ni. Chungte a nih avang chuan, actual a rawn chhuak ta a, tunah chuan kan GSDP 2021-2022-ah khanin ₹25,795/- crore chauh a ni ta a, a inthlahna hi han en ta la, ₹11000/- crore chuang a ni. A percent zawng phei chuan tam tham hem hem tak a ni. Chu correct figure chu mipui kan hmuh thin loh avangin leh, a correct figure kha kum 4-5 hnua a rawn lan taka vang khan kan sum dinhmun tha taa ngaihna te kan lo nei ta thin a, vawiin ami hi kan sel ta thin a ni. A kum hmasa lam ami kha a nihna kum a mi nen khan va ennawn tur a ni a.

Vawiina memberte hnena pawh ka'n chah duh chu, vawiinah hian thil dang vak en a ngai lova, hei hi FRBM Act-ina kan budget bu-a ti tura min tih kum 5 chhung a mi ka rawn keng a. He FRBM Act-a kan Economic Frame of Policy te, kan fiscal strategy statement ah te hian engkim chiang takin a lang vek a ni, khami a bu chhah pui pui en lo khan. Chu chu, 2022 & 2023-ah phei kha chuan ₹39,000 crore kha GSDP kan estimate tawh a ni a, vawiinniah kan estimate ai pawhin a la sang fe a ni. Revise a rawn chhuak ta tehreng a, tunah chuan ₹32,000/- a ni. Actual rawn chhuak sela, hei pawh hi a pha leh lovang. Kan estimate dik lohna kha 30-40% dawn dawn te a ni ta a ni. Chung a nih avang chuan, corrected GSDP figure hi neih theih dan a awm em, engatinge a tak nen heti em ema a inthlah thin, tih te a lo ni ta a. Heng hi kan hriat ngai loh leh mipui hmaah kan mithiamte pawhin yah te, Youtube-ah te an sawi thin a, chu chu an tih khan vawiinniah budget document an en a, vawiin ami chu chauh a la ni, nikuma kan revised estimate te, kum hmasa actual statement te, a kum hmasaa an estimate dan leh a actual a lo chhuah dan kha en kawp loh chuan mipuite hi dawt kan hrilh ang tih hi ka hlau thin a.

Tin, sawi tur tam tak mah ni sela, sawitu tam zawkina kan stress lian em em maia kha ka ngaih mawh deuh pakhat chu, 'revenue expenditure a va sang ta ve' tih kha a ni a. Kan revenue

expenditure hi a tam ta thut a ni lova, kan revenue expenditure leh nikum Supplementary Demand a san chhan kha eptu lam, i veilama thute hian duh ni se chuan kan han sawiho tur kha a ni a, a san chhan hi mipuite'n hriat an phu ngawih ngawih a, amaherawhchu, sawi ho tul kan ti miau si lova. A san chhan hi tawite te han sawi zuai zuai ka duh a.

‘₹600/- crore chuangin kan sum sen aiin a tam’ han tih te kha a awm a. Nikumah Cyclone Remal kan tuar a, India ram pumpuia Central Sorkar pawhin chhiat tawkte tanpuina te pawh pek ngai khawpin kan awm tih hrelo te pawh kan awm niin ka hria a. Chhiat tawkna avanga sum tum lawk lem lova senso nasa tak karah khan, kan public account-ah hian engvangin nge nikumah leh kuminah hian revenue expenditure a san tak kan tih chuan, he Sorkar tharah hian a theih ang tawk tawka a pek piah lamah, nikuma budget estimate a siam a han revise takah khan leiba lo tlingkhawm leh, khatiang chi hrang hrang tam lutuk avang khan tum aia tam revenue expenditure kha a kal ta a; chu chu a chhan ber engnge, kan tih chuan, kum 2018-21 inkara PHE Department-in an power bill ba ₹43/- crore chuang han rulh ngai te; kum 2 chhung power bill ba tling khawm leh surcharge kan lo chawi ngar ngar ₹126/- crore chuang kan han pek belh te, pension leh other retirement benefits kum 2 dawn tlingkhawm tawha extra kan pekna ringawt pawh kha ₹282/- crore chuang a ni a. Khami bakah khan medical reimbursement leh State healthcare atana kan pek belh pawh hi ₹50/- crore chuang zet a ni a. Hemi piah lamah hian Mizoram Police te kum 3-4 chuang an TA leh an medical reimbursement pawh hmu ve thei lote tan khan ₹25,000/- lakh chuang teh meuh mai chhuah a han ni bawk a. Khami piah lamah khan, nikum chhung zawnga leiba tlingkhawm tawh inhnawh khawm a pung kan pekna ringawt pawh ₹60,004 lakh tura chhuta kha ₹63,200 lakh-in khatah khan a han pung bawk a.

Khatiang zawng zawngte chhuta, engvangin nge revenue expenditure hi a pun tak kan tih chuan, a chhan kan hria ang a; kalphung-thar sorkarah tar pension a pek piah lamah sorkar-hnathawkte DA 4% a tihpun pawh khan, kum dang ang lo takin Sorkar hmasa ah te chuan a impound sak a, a dawngtute hnenah a pe ngai lo a ni. Mahse, he kalphung-thar Sorkarah chuan vawikhatmah khang 4% DA tihpunna pawh kha a impound sak lo mai ni lovin, a cash-in a pe chhuak vek bawk a ni.

Amaherawhchu, pawimawh ka tih deuh mai phakhat chu, Pu Chairman, engatinge kalphung-thar leh kalphung-tharlo a va inthlau ve kan tih takin, wawiina membrete hian Annual Financial Statement (phek hnuhnung ber dawt) ah khan, ‘Composition of Outstanding Fiscal Liabilities’ tih a awm a ni. Khatah khan kan leiba tling khawm a chart kan hmu a; khata Public Account Liabilities kha 13% chauh a ni tawh a ni. ₹13.67/- crore, kan leiba zawng zawng Public Account Liabilities kan tih hi compound interest nena pung tam tak, sorkar-hnathawkte hlawh kan pek let leh ngai a ni a. Chu chu kum hmasa 2023-2024 pheh hnuhnung ber kha kan han en leh chuan, khatih laia kan leiba composition 43.21% hi Public Account Liabilities a ni; ₹56,000/- lakh pawh a ni lo, nuaih hlir - nuia 5, sing 6 leh 66 teh meuh mai kha Public Account Liabilities a ni. Khang Public Account Liabilities kha kum 2 chhung lekin wawiina Sorkar thar hian, kumin estimate-ah pheh chuan Public Accounts Liabilities hi ₹1,930 crore-a tla tura beisei a ni a. Kan sorkar hlim khan ₹3,378 crore teh meuh mai, a pung tam chi kha kan chhawm nghe nghe a. Khata tang khan ₹1500 crore chuang kum hnih chhunga kan han ti tlem thei te, heng zawng zawng hi fiscal management kan Finance Minister leh he sorkar hruaitute hmalakna hrang hrang vang a ni, tih a pawm loh theihloh niin ka hria.

Kan sawi duhzawng leh kan thlir dan a in ang lo a. Vawiina hian thil kan zira kan sawi duh anih chuan, vawiinnia kan Accounts statement hi a tawk lo; kum 10 hmalama Accounts statement nena kan khaikhina kan en a ngai a ni. Tun dinhmunah chuan vawiina mite hi engnge kan that bikna kan tih chuan, sawi tur a la tam ang hun a tlem em mai a, Pu Chairman, khati zawng kha ka sawi theih ni se. Ka lawm e.

CHAIRMAN : Tunah chuan, Pu T. Lalhlimpuia sawi turin kan sawm ang a. A zawhah Pu V. Malsawmtluanga kan sawm chhunzawm dawn nia.

PU T. LALHLIMPUA: Pu Chairman, tuna Panel of Chairman-a i thutlai taka he budget chungchang thua kan Finance Minister rawn siam kan han sawi thei a. Kan Finance Minister, kan CM zahawm takin ‘We seek Mizoram’ tiha a sawi ang leh a duh angin, Mizoram hmasawna tur budget rintlak hmanni khan an pharh a. Kan Finance Minister hnuai kum 3 chhunga financial position kha thlir ta ila. Tunah khan kan Advisor to CM khan ka sawi tum eng emaw zat kha a rawn sawi tawh a; ban kha kan phar lawp lawp a, min sawi khalh kha kan hlau ang reng khawp mai a. Amaerhawhchu, a sawi kha sawinawn ngailo turah ngai ila.

Tichuan, kha opening balance-a kan financial position dinhmun kha han en ta ila - 2023-2024 ah khan nuai hlira nuai 342 ah nuai ₹34,282.15 kha actual a ni a. Tichuan, kum 2024-25 ah ₹389 crore vel a ni a, kum 2025-26 ah -1566.16 lakh a ni tawh, estimate kha. A difference kha ka han ngaihtuah a; nuaih hlir - ₹2,332.93 lakh lai a ni thei a ni. Hei hi budget speech no. 24 - State own taxes revenue 2024-2025 a hmuh beisei ₹1,312 lakh kha a tak takah chuan ₹1,478.26 lakh lai hmuin, hmuh tum ai khan cheng nuaih ₹165.84 lakh-in a tam a, chu chu 12.64% in a pung thei a ni, tih tarlan a ni a, hemi ti pung tur hian beih ve fe chu a ngaiin ka hria a ni.

Chungah chuan kan Finance Minister leh a thawhpuite, a bik takin Finance Department te an fakawm ka ti a. GST project 2024-2025 ah khan ₹1,045 crore atangin ₹1150 crore a ni ta hi, kan Finance Minister leh a thawhpui department te hi ‘an va huai em ve aw’ ka ti a ni. Finance thiam bik tak nih loh chuan he thil hi Zoram hmangaih vang chauha thil tih niin ka hria a ni. Hetianga Finance Minister sum dinhmun min enkawlpui thei kan nei hi a ropui ka ti a, tarlan ngei ngei tulin ka hria a ni.

Tin budget speech no. 19 ah khan, engkim langtlang-sorkar ah chuan zep a awm lova, a nihna ang angin kan lang mai a ni. Kumin 2025-2026 kal turah khan revenue surplus kha ₹562.91 crore neih beisei a ni a, chu chu GSTP atanga teh chuan 1.56% vel a ni. Chumi achieve tur chuan kumin kan financial year kal laia tan a ngaih tur zia hi finance lam thiamte leh economics thiam chuan an hmuhfiah thiamin ka ring a. Hetiang an project thei mai hi a ropui ka ti a. An tang viau a ngai dawn a, chutih rual chuan, tax management leh bill management pawh thawh viau a ngai dawn a. Kumin ah hian ‘Year of Consolidation’ puang lo mah ila, a ruk tak chuan kan CM leh a hote hi khawihli-pui vei ang anni reng thovin a lang a ni. Chuvang chuan, an tan chuan he thil hi a challenging em em a ni.

Tin, GSTP hi tunah hian ₹13,999/- crore ni tura chhut kha a ni a. Hei hi kan tax reform-na tura beisei atang hian he thil hi a hniam a beiseiawm ta em em a ni. Chung zawng zawng kan han ngaihtuah chuan, ₹13,999 crore ni tura chhut hi nakumah a tak takah chuan he kan

tax reform hian a rawn effect ang a, a tih hniam ngei beisei ila. Vawiinah kan Finance Minister speech no. 21 hi, chona nasa tak a awm niin ka hmu a, kan tarlang bawk a ni.

Tin austerity measure chungchangah hei, kumin hma kan la a, year of consolidation kan puang a, chutah chuan kan budget ‘a eng nge reflect-a, a eng nge reflect lo’ tih erawh chu kha tunah khan kan Advisor to CM khan eng emaw zat a rawn sawi tawh a. Kan CM te, Minister te, MLA te kan chet velna hi thlir ta ila. Sorkar thil pawimawh anih loh chuan, kuminah hian kan kalna hi a vang khawpin ka hria. Chutah chuan hmanni ah Tuivai Lei kan han hawng a, media lamah pawh kan hmuin ka ring a, a kal tur Minister leh MLA an kal mai a. Chutah chuan kalphung-thar kan hmuh chu, Opposition-bial a ni a; a bialtu MLA kha session zawhah khan hmanhmawh em emin a biala lei hawn turah khan a chho a ni. Chu mai chu a ni lova, a tukah tv leh youtube ah te kan han en a, chutah chuan thu sawi hmasa-sa ah te khan a han tang leh nghal kha kalphung-thar chu niin ka hria. Vawiinah hian chungte chu kan Finance Minister min kaihruaina ah hian han tarlan ve te pawh ka duh bawk a ni.

Tichuan, inrenchemna hian budget ah a rawn reflect mek a, a thlamuan thlak a; he a thlamuanthlak thu hi hmannah Finance Department te nen kan sawi ho a; chutah chuan, ‘enge ZPM sorkar chu in hmuh dan’ te pawh kan han ti a. Ka zawhna an chhannaah chuan an thlamuan thu an sawi a; ‘eng vangin maw?’ ka ti a. ‘ZPM Ministry, kan Finance Minister enkawlna hnuaiah chuan, kan pawisa hman tawh kan hre thei tawh a, kan pawisa hman mek kan hre thei a, kan hman tur pawh kan hre thei bawk’ min ti a. An thla a muangin, kan thla pawh a muang a ni.

Ka ngaihtuah neuh neuh a, engtik lai atang khan nge Finance Department te hi an thlaphang viau thin ang aw! Nikum Budget 2024-2025 kan sawi a, Suplemenatary Demand ah khan enge maw siamrem a ni a. Kei ngei pawhin ka sawi a, Pu Chairman he hmun atang hian. Chutah chuan kan Supplementary Demand-a danglamna lo awm a hi eng danglamna nge, tih kha kei pawhin he House-ah hian ka sawi a ni. Kuminah hian kan Finance Minister khan a budget speech ah khan a sawi mawlh mawlh a; CSS-a kan sum hmuh belh te, SASCI a kan sum hmuh belh te, REMAL avanga kan sum hmuh te, tin, medical re-imburement avanga kan sum hmuh te kha a rawn tilang a. Tichuan, ‘kan revenue expenditure pawh a sang a ni’ a rawn ti mawlh mawlh a. Nimahsela, vawiinah hian heng thil zawng zawng lo thleng hi indem tehchiam tur awmin a lang lo a. A chhan chu, kan hmuh loh thil, thil lawmawm lam hlir a ni.

A tawp berah chuan, Pu Chairman, No. 6 - power sector ba kan rulh thu kan sawi a, chu chuan kan revenue expenditure te pawh a tisang a, tunah hian chu hlawkna chu kan budget-ah hian sawilawk theih a ni lova. Engangin nge chu chuan he budget leh Mizoram Sorkar hi a nghawng dawn tih figure in a la lang lova. Nimahsela, engtik niah emaw chuan he power sector-a kan ba te, surcharge leh khang ang thil tih fel te kha vawiinah hian lang lo mahse, vawiinah hian thil tha lo thleng turin kan beisei a ni.

Tichuan, kan Finance Minister-in Budget 2025-2026 a pharhna speech hi ka thlawp a, a chungah lawmthu ka sawi bawk a ni. Ka lawm e.

(Speech not corrected.)

CHAIRMAN : A lawmawm e. Hon. Speaker-in heti laia sawi tur list a lo neih sa mil hian kan kal ang a. Tunah Pu V. Malsawmtluanga, Lunglei North bialtu, ilo sawm ang.

PU V. MALSAWMTLUANGA: Pu Chairman, ka lawm e. Budget 2025-2026 discussion huna sawi ve thei tura hun min pek avangin ka lawm e.

Pu Chairman, i veilama thute zinga mi, ka sawi chhan tak tur kha a chhuak niin ka hria a, zan-thum mu tha theilo te kha an awm niin ka hria a. Hei kei budget hi vawikhat ka chhiar chhuak a, ka thla a muang em em a. Helai ka thut lai pawh hian ka lo muthlu leh thin a, ka bula kan member-pui, kan adviser Champhai lam kan MLA pawh, ‘tun tum chu ding suh; a thlamuanthlak em mai’ ka ti a, a ding dawn lo nghe nghe mai thei a ni.

Engpawhnise, 2024-2025 budget hi a hmingah ‘Sekibuhchhuak’ tiin ka lo phuah tawh a ni. Kha kha, vawiin thlenga ka hming phuah tawha ka phuah soal loh berte zinga mi niin ka hria a. A takin kan hmu a, kum khat chhungin hmasawna hrang hrang Zoram dung leh vangah mita hmuh theih thu mai nilo tisaa lo chang te kan hmuh hian, he sorkar, a bik takin Finance Minister, kan Chief Minister leh kan House Leader nib awk chungah lawmthu ka sawi hmasa duh a.

Kan hriat angin, a kum khatna atan Year of Consolidation kan hman hian ken tel tam tak a nei a, chung zinga pakhat chu, inrenchem hia ni. Chu chuan a kum khatna ah rah tha a chhuahte kan memberte’n an rawn sawi tawh a, sawi vek sen a ni lo a.

Kan hriat angin sorkar hnathawk indaihlohna a nasa em em a. Mahni bial tin thlir ila Health Sub-Centres workers te, zirtirtu indaihlo te a tam em em a ni. He ‘inrenchem’ tiha kan Chief Minister, Finance Minister ni bawkin huaisen taka a kalpuina in rah a chhuah zingah chuan, sorkar-hna tam tak lak a ni a, kan la chho mek zel dawn a ni, tih te hi he House zahawm takah hian ka sawi duh a. Tun financial year kal mek kum khatnaah pawh hian zirtirtu ringawt pawh mi 1507 chuang lak anni tawh nghe nghe a, a lawmawm hle a; Year of Consolidation a hlawhtling hlein ka hria.

Tin, kan hriat theuh angin GPF Fund pekchhuah mai theih loh ₹785.90 crore leh pension benefits tangkhang ₹1,042.42/- crore zet mai pekchhuah a ni te hi a ropui hle a ni. Helai House zahawm takah hian member te pawhin kan lo sawichhuak tawh thin a. Damlohna avang te’n leiba tam tak an duh vang ni lovin chhungkua tam tak te’n an lo nei tawh thin a, chhungkaw-pa chhungkaw-nu an lu a hai a ni. Chutiang chuan ‘pension hunah’ an ti a, pawisa te a pung awmin an puk a. Amaherawhchu, an han pension a, an duh hunah sum an hmu lo thin a ni, anmahni chanvo ngei si a kha. Chutiang chiah chuan, in te miin an sa a, sorkar-hnathawkte’n loan an la a, an pension huna sak chhunzawm turin. Amaherawhchu, a hun takah hmuh anih thin loh avangin he Mizoram zimte, population tlemte ah hian chhungkaw-pa, chhungkaw-nu an rumin, an tap thin a ni. Chungte tan chuan zalenna dar a ri niin ka hria.

Tin, power ah leiba kan ngah thin em em a, a hun takah kan pe hleithe i lo leh nghal a. Kan hriat angin, power leiba eng emaw zat chu kan rul a. Chu chang a la ni lova, a hun taka kan pek thin avangin rebate ₹165.69 lakh lai lawmman kan hmu a. Chu chang a ni lova, Power Department-in a revenue a neih pawh 2023-2024 aiin 2024-2025 ah ₹783.53 lakh laiin a tam a ni. Mahni bial kan thlir lo thei lo a, heng te hi eng emaw development lian tak

tihna tham a ni a, a bik takin kan Power Department changtu Minister pawh a chhuanawm hlein ka hria a ni. Kan memberpui Pu K. Hrahmo khan 'Minister pa tak' ti khan Supply Minister kha a rawn chhuah deuh a, a ni pawh MLA pa tak nih a duh chuan, kan leader hi rawn zuin, helamah hian rawn awm ve mai se, tiin ka'n sawm bawk a ni.

Kan hriat angin tar-pension, Indira Gandhi National Old Age Pension Scheme (IGNOAPS) kan kalpui danah mipui, a bik takin tar leh upate, kum lama upa zawkte an thla a muang hlein ka hria a. Kum 2024-2025 atang khan ₹1,000/- a tihsan a lo ni ta te hi a lawmawm hlein ka hria a. Kum 60-79 inkar ₹300/- lo dawng thinte khan cheng ₹1,200/- an dawng tawh dawn a ni. Chutiang zelin kum 80 leh a chunglam thla khata ₹600/- la thin te khan ₹1,500/- an la ta a ni. Hei hian, kan sorkar hi upate a ngaipawimawhtu a nih zia a tilang chiang hle a ni.

Ka han sawi leh duh chu, Mizoram healthcare scheme hnuaiah bill ba tlingkhawm zinga 80% pek tlak a ni te, kumin kumtawp lamah a bak la bang tlemte la awm pek tlak tum a ni te hi a ropui ka ti a, he budget hi damlote tan a thlamuanthlak hle a ni.

Chu chang a ni lova, Mizoram Universal Health Care Scheme (MUHC) cashless system tun 1st April, 2025 atanga kalpui a ni tur te hi, damlo thin tam takte tan chuan a thlamuanthlak hlein ka hria a. Tin, damlohna hi kan duh vang ni lovin, MLA keini aia neinung zawkte khabe-liam kan chan chang te pawh a tam thin a ni. Chung zawng zawng lak ata chu he budget hian min chhawk zangkhai thei dawn niin a lang a, a lawmawm hle a ni.

Tin, buhfai supply ah public distribution system hnuaia National Food Security Act (NFSA) ina a huam ve loh chungkuate, buhfai man kg ah ₹15/- atanga ₹30/-ah tihsan a ni hi, kan Minister a chhuanawm hlein ka hria a. Hei hian a tihlan chian em em chu, ZPM Pu Lalduhoma kaihhruai-sorkar hian Zoram siam that tak tak a tum a ni; vote khawn ringawtin hma a la lo a ni; a lehpekah engtin nge kan tlin ang tih a ngaihtuah lo. He Zoram hi tun kan dinhmun atang hian engtin nge kan insiamthat theih ang, tih a ngaihtuahna a tilang chiang hle a, a lawmawm hlein ka hria.

A dawtlehah chuan, administrative reforms chungchang hi kan sawrkar tirh khan titi tam ber pakhat a ni a. Sorkar-hnathawkte administrative reforms hi a har lai ber tur a ni an ti a, a dik chiah mai. Amaherawhchu, kan House Leader, Finance Minister ni bawk hian huaisen takin ke a pen a. 'KAI App' te, hei hian a hun taka sorkar-hnathawkte'n an office an thlen piah lamah, hnathawkte an thawh dan tur te thleng, an thawh hun chungga dik taka an thawh tur chanvo te an thawhtheihna tur te, discipline te bakah thawhhona boruak that zawkna atan pawhin he app hi a tangkai a, a lawmawm hle a ni.

Ka han sawi leh duh chu, state-own tax revenues atanga kan hmuh zat ₹1,478.26 crore, kum kal mek 2024-2025 BE-a hmuh kan beisei cheng ₹1,312.42 crore aiin 12.64%-a a pung hi a lawmawm ka ti a. Hei hian Mizoram tan source of income kan neih tax lakna kawngah te sorkar-hnathawk nilo, a bik takin sumdawng liante pawhin he sorkarah hian tax pek an phur a, an chak hle tawh a ni tih a chiang a ni.

(Hon. Speaker takes the Chair.)

Aw, Pu Speaker, a lawmawm ka tih leh em em chu, kan sorkarin police-personnel te travelling allowance bill rei tak pending tawh ₹87.72 lakh DT hnuai a an hmuh thin pangngai baka dah belh hi a hluin ka hria a ni. ZPM Sorkar chuan dan a ngaipawimawh a, chumi tluk zetin a kengkawhtu kan police force-te a ngaipawimawh zia a tichiang hle bawka ni.

Tin, PHE Department hnuai tui pump-na tur ₹60 crore dah a ni hi, kum kal mek aiin ₹10/- crore in a tam a ni. Hei hian mipuite he sorkar hian a ngaipawimawh zia ti chiang a. Pu Speaker, Lunglei-pa ka ni a, Lunglei lamah pawh Pialthleng AMRUT 2.0 hmangin ₹997 lakh vel tunah hian kalpui mek a ni a. Chu chang a ni lo, kan Chief Minister-in Lunglei lam min duhsakna avang leh kan tui-harsatna te hriain SASCI ah tunah hian ₹55.7 crore-a bul tanin, kalpui mek a ni a. Hei hi Lunglei-pa ka nihna ang leh HPC Vice-Chairman ka nihna ang pawhin a chungah lawmthu, Lunglei mipuite aiawhin ka sawi bawka ni.

Pu Speaker, a tawp berah chuan, MLA fund han tihpun te leh chumi piahlahmah Bana Kaih (Hand-holding) policy, kut-hnathawktute leh thalaite, (kei pawh hi thalai ka ni a) ka thalaipuite'n lei rem an rahna tur leh thenawm state leh ram dangte anga an thiamna te, an theihna te an phochhuah ve theihna turin Hand-holding, Bana-kaih hnuai ah tun 2025-2026 budget ah ₹350 crore lai mai ruahman a ni hi, kum kal ta nen khaikhin phei chuan 75% laiin a sang a, hei hi a lawmawm hlein ka hria a ni.

Engpawh ni se, Pu Speaker, he Budget 2025-2026 hi tha ka ti hle a ni, tih he House zahawm takah hian ka han a ni e. Ka lawm e.

(Speech not corrected.)

SPEAKER : A lawmawm e. Hei, medical check-up ka ti lawk a, memberte la ti lo, ti duh kan awm chuan, kan doctor te an inpeih reng a ni, tih kha ka sawi nawn leh e. Tunah chuan member zahawmtak Pu Lalrintluanga Sailo ilo sawm ang.

PU LALRINTLUANGA SAILO: Pu Speaker, ka lawm e. He House ah kan practice ngailoh medical check-up i neih hlan khan a lo thleng a. Kan member-pui zahawmtak Aizawl West-I bialtu khan kan memberte hnenah thuchah te kha a rawn sawi chiam mai a, a mak angreng khawp mai a. Tin, i veilama mite hian Revenue Expenditure leh Capital Expenditure sawiho kan tih pawhin a tul an ti lo, te kha a ti a, khaikhawmtu emaw ni chu, te ka ti deuh a.

Aw le, vawiinni a kan budget sawiho 2025-2026 General Discussion kan neihah hian hei, kan Finance Minister hian a nihna anga a rawn insawi ngam hi a lawmawm hle a. A chhan chu, introduction ah khan, development ah te vision a neih loh zia rawn tarlangin, heti hian a sawi a. Pu Speaker i remtihain, “India ram hian hmasawna kawngah ke pen mekin, khawvel pum huap pawha ram hmasawn chak berte zinga mi a ni mek a. India sorkarin hmasawna kawng atana a vision Viksit Bharat (Developed India) and Viksit Mizoram (Developed Mizoram) te a tangkai thei ang bera lo hmang ve turin kan inbuatsaih mek a ni” a ti a. Kan House Leader hian development ah hmahlir (vision) a neihloh zia a chiangin ka hria a. India sorkar vision, vaiho vision min rawn introduce ta ah ka ngai a. A nihna tak a pawm ngam hi a lawmawm ka ti a ni. Term hmasa lamah helaiyah a thut lai pawh khan Pu Speaker, “keini chuan vision lam kan ngaihtuah lo, issue-base in kan kal a ni” a tih te kha, he a speech ah a rawn tarlang ngam hi ka fak ve duh hrim hrim a ni, Pu Speaker.

Chutih rual chuan, hetah no.3 ah hian ‘Year of Consolidation’, Inremchemna puan thu a rawn lang leh ta a. Amaherawhchu, development ah te vision neilo na na na chuan tih tur vak a lo hre lo a. Mizoram UT kan nih atanga mizo-pa zawng zawngin buhfai subsidy kan lo kalpui thin kum 51 hnuah a rawn titawp a. Mirethei zawk leh harsa zawkte, India Public Distribution System in Food Security Act hnuai a rawn pek bik, entirnan: card var leh card eng te tih loh zawng zawng kha a let thakin buhfai man min han tihsan sak ta a; card pawl te, khatiang khan. Chu mai chu la duhtawk lovin, a buhfai dahkhawmna, retailer ten an khulna zawng zawng, a buara thleng mai khan min sawikhawm sak a. Chutiang chuan miretheite min han hrut ta a ni a.

Chutah chuan, ‘inrenchemna kum kan puang e’, an han ti ta a ni a. Chuta tana lo lang leh ta chu, Pu Speaker, thil chiang deuh mai chu - lirthei lawm mi kan ni a, thla tin hlawh mumal neilo pawhin mahni hmuhchhuah apianga lirthei (vehicle) lei ching kan ni a. Chutah chuan, motor spirit, petrol leh diesel ah te chhiah an han la ta chiam mai a. Chu mai ni lovin, diesel leh petrol lei apiangin cess kan chawi a, litre 1 ah ₹2/- zel kan chawi a ni. Chutiang tlingkhawm atang chuan ram kaihhruai an han tum chu a ni a; beiseina a sang lo hlein ka hria.

Kha a hmalama kan member-pui te khan lawmthu te an han sawi hlawm a. A nih tak hi, ‘he a introductory speech atang hian an en lo em maw ni chu aw’, tih ka ngaihtuahna ah a lian hle a. Chuvang chuan, vawiinniah hian helai no.11 te pawh an han sawi zel a, Administrative Reforms te pawh an ti a. Sokar hmasa ah khan kan lo tih tawh biometric te pawh department hrang hrangah sorkar-hnathawk a hun taka kal tura tih te department ah kan lo hman tawh, a hranpaa hmang ni lem lovin a hming an rawn thlak a, ‘Kai Apps’ te an han ti a. Eng tawng nge pawh ka hre lo, hei hi. Khati vel kha administrative reform nan kan hmang a nih chuan, kan reform-te hi ‘office-a inkhungkhawm hma tur’ tih ang vel kha a ni mai a.

Chuta ka zirchhuah ve chu, vawiina KAI apps kan hmanna ah hian administrative reforms a awm lova, controlling officer-in a staff-te hnenah thuneihna a nei miah lo a ni. A absent anih pawhin, KAI app-ah hian a hun takah a va kal a, a mobile nen a in link zawh hnuah a chhuak nilenga, ban hmaa a lo haw leh hman chuan, kha kha a kalphung deuh chu a ni. Kha kha a nih avangin, controlling officer khan a chungah action lak theihna a nei reng reng lo. Chuvangin, heng te hi a tha ber em aw, tih kha ka ngaihtuah a ni.

Tin, no. 12-ah hian Pu Speaker, ka sawi duh chu, kan thian, kan member-puite ang khan a bu chhungthu hi, a bu ang ang hian ka sawi duh a. ‘Tunlai technology lamin a ken tel harsatna lian tak cyber crime te, social media hmansualna te, dawt leh thu puarpawleng thehdarh ching beihletna kawngah te, dapchhuah leh hremna pek kawngah te theihtawp kan chhuah a’ tih a ni a. Hei thil hi chu ka hresual chuan ka hre lova. Pu Speaker, Nimin maiah Zu-Bill kan sawina chungchangah pawh kan Chief Minister zahawm tak khan a rawn sawi leh a, ‘mi an beihna kawng te pawh a ni ang’ a ti a, ka support khawp mai a; hmeichhe awmtha duhlo ten zan rei tak tak thleng an phone thu a sawi a ni. Power zawng zawng an kutah a awm a, cyber crime thlengin. David Sailo tih loh hi he cyber crime an kuta awm an la chhuichhuak si lova. Kan Chief Minister meuh pawh zanlaia phone thin ho hi engatinge an la chhuichhuah loh? Chhuichhuah tlak a ni; kan ram lu ber a ni a. A niin an rawn phone na number zawng zawng a block vek a, vawiin thleng hian hetiang lama thuneitute’n engatinge hma an la lak loh? Hei hi ka ngaipawimawh hle a ni. Chuvang

chuan, a minister-in-charge pawhin min lo hriatsak se ka duh khawp mai. Ram rolrethu sang ber zanlaia hmeichhe awmtha duh lovin a phone reng ringawt mai; a chhuina lamah hmalakna kan sawi bawk si lo. Cyber crime chungchangah ‘social media hmansualna te leh dawt puarpawheng thehdarhna chungchangah kawng hrang hrangin hremna pek kawngah te theihtawp chhuah a ni’ a ti a; kan House Leader hi chu kan veng ve dawn lawm ni?

Chutih rual chuan, Pu Speaker, he budget-a ka ngaihpawimawh ber chu - an flagship programme an rawn sawi Agriculture Marketing Board ah ₹110/- crore dah thu a lo lang a, chumi atan chuan hmunphiah no.1 ah a dah a. Hmunphiah hi sorkarin policy kan kalpui fu lova, vawiin thleng hian (tunah mai pawh) min rawn bia a, ka bial khaw 33-ah hmunphiah an ching hlawm a ni, a khaw mi tam zawkin; pakhatmah lei a la awm lova; Abdul-a te, Safik-a te hovin an lei a ni. Chuvang chuan, budget buah hian sawi leh tlak a ni em ni chu aw? Nikumah a sawi ri tawh a, nikum budget speech pawh hi ka keng a, ka compare thin a; lei a awm lova, hmalakna a awm lova. Helaiiah House information atan, ka hriatsual loh chuan, ‘ZIDCO kaltlangin lei tum a ni’ a ti a. Hmunphiah season a ral mek a ni a, ruahtui a tla mai dawn; ruahtui a tlak chuan a lak chi tawh loh. Chuvang chuan, kut-hnathawktu hmangaih inti si hian, an tahna khua intisei mek niin ka hria a, a paw ka ti takzet a ni.

Tin, budget-ah hian SASCI hmuh tam te hi inchhuan nan kan hman emaw ni. Loan a ni a, kan hre theuh a. Tin, nikum he Sorkar a dintirh khan SASCI-ah hi chuan ‘utilization dik kan submit ang’ te an ti a. Vawiinah hian la utilize miah loh pawh utilization certificate central-ah pek thlak a ni tih kan hria a. Chuvang chuan, thudik hi sawi mai tur. Chu chu a ni, ka ngaihpawimawh em em ni. Dawt deuh reuh, thudik chanvea patling inbum-inbum tur a ni lova.

Vawiinah hian Pu Speaker, member dangte’n chhuang em emin an rawn sawi a, “kan Budget a tam taw; keini kan sorkar chuan loan kan la lovang, financial management thiamloh vang a ni” tih kha a thunawn kan sak thin kha a ni. Vawiinah hian loan engzatnge kan lak? Ram-mipuite hi i bum lovang u.

Tin, member dangte khan power leina, ‘₹500 crore a lo lang’ an ti a, an chhuang em em a ni. Power generate lamah hian hma ila ang u. Vairama let-thla leh mai mai tur lei nan hian a chhuan chi em maw ni le?

Vawiinah kan kawngchhe em em mai enkawl nan PWD-ah ₹30 crore kan dah a, kan lawm em em a; lawmna chi a ni lo. Ka bial lam Phaileng leh Marpara ringawt pawh ₹71 crore in kan thawk mek a ni.

Tin, kawngpui leh lei chei nan ₹70 crore kan dah a, member dangte kha inlawm tak takin ka ring lo. Lei pakhat siamna tur ₹70 crore-in a daih lo ang. PHE tui pump nan ₹60 crore kan dah an ti a, a bialtute kha an lawm em em mai a. Sorkar ve ta chuan an dah ang chu maw le; han lawm chiam tur a awm em ni?

Chu aimah chuan Social Service Sector-ah hian nikum aiin 4.43% in a hniam a ni. Engatinge Social Service Sector hi kan ngaihpawimawh loh em em? Kan insawi tui laklawh chuan sawi tur a tam hle mai a. Chuvang chuan, vawiinah hian kan budget 2025-26 ah hian lawmna tur a awmlo. Pu Speaker, ka lawm e.

SPEAKER : Member zahawm tak Pu Lalrinsanga Ralte ilo sawm ang.

PU LALRINSANGA RALTE: Pu Speaker, ka lawm e. Vawiinah budget discussion kan han nei leh thei hi a lawmawm hle a. Nimin lamah te kut-hnathawktute hmangaihzia te kan ngaithla a, i dinglam atangin. Vawiin kan budget-ah hian engnge kan an dawn, tih chu a rawn lang Chiang viau a ni.

Pu Speaker, i dinglama mite atangin Revenue Expenditure leh Capital Expenditure hian awmzia nei vak lo anga rawn sawi te kha an awm a. Amaherawhchu, budget pharh hi sorkar kalphung leh kan inruahmanna a ni a. Chuvang chuan, he Budget 2025-26 ah pawh hian kan en ber tur chu, Revenue Expenditure leh Capital Expenditure hi a niin ka hria a. 2023-24 ah khan Capital Expenditure-ah 21% kan kai a ni, ram hmasawna khawih thei turin. Tunah hi chuan Revenue Expenditure 82.51% vel a ni a, Capital Expenditure 17.49% vel a ni bawk a. Hei hi a awmzia ni bera ka hriat chu, kan sorkar inenkawl thiam loh a ni a, financial management-ah hian kan fail hle niin ka hria. Sorkar inrelbawlna, helama i veilama an thutlaiin inrelbawlna ah sum kan dah nasa a. Sorkarin a ram-mipuite leh development a khawihna turah ‘sum kan dah tlem’ tia au thin te kha an lo ni a. Chung chuan hetiang budget an rawn pharh hi a pawh hlein ka hria a ni.

Tin, revenue deficit a han pung te hian budget kan control thatloh zia leh kan monitoring a chhiat zia a rawn langin ka hria a, hei hi a pawh takzet a. Tin, fiscal deficit pungchho hi a pawh hlein ka hria a. Pu Speaker, 2025-26 budget hi ka han thlira kan han chhiar kan han chhiar hian, kum 2024-25 kha ‘Year of Consolidation’ ah kan puang a ni; kan hre vek awm e. Chuti chung chuan kum 2025-26 financial year-a opening balance chu negative a rawn ni ta a. I dinglama miten hei hi sawifiah viau an han tum rualin, financial management thiam; budget tha intite tan chuan a zahthlak hle a ni. Hei hi Pu Speaker, a pawh takzetin ka hria a ni.

Tin, Sorkar inrenchemna nasa takin kan aupui a, Ni-100 chhung thawh turah kan han puang a. “Sorkar chu theitawpin a inrenchem ang; ‘year of consolidation’ pawh kan puang ang” tichungin, a hotupa ber Chief Minister Office enkawlna turah ₹456.78 lakh vel kan han hmang hi, hei hi a pawh hlein ka hria. Kan CMO atang hian year of consolidation tih hi chu kan kalpui lo hle a ni tih hi vawiin ni ah hian a langin ka hria. He ‘year of consolidation’ hi engnge kan fail-na chhan ni ang aw, tih kan ngaihtuaha, Adviser to Chief Minister, he sorkar, kalphung-thar sorkar, ‘Year of Consolidation’ tia ropui taka puangtu hian Adviser to Chief Minister a ngah khawp a. Tin, anni leh an staff te mai nilo, board hrang hrangah an party ZPM hruaitu lawkte, chairman leh member-ah te dah an ni a. Tin, department thenkhatin consultant te an han nei a, board thenkahtah te an lawmman nasa taka tih pun a ni te hi a pawh in ka hria. Hei hian kan budget min tibuai hle a, Year of Consolidation kan puan tawh pawh hi a ti fail niin ka hria a ni. Mipuite kan hrek mai mai a, keini a lulamte hian nuam kan chenin kan invulh hle tih a langin ka hria a ni, he budget kan hmuh hian. Chu chu pawh ka ti takzet a ni.

Tin, Pu Speaker, kan State leiba chungchang hi, term hmasa hun lai khan sorkar kha puk char charin kan sawi a, mipuite dahkham ang deuhthawa sawi te kan hria a nih kha. Sorkar hmasa kha pawisa puk, mipuite dahkhama engmah ti hleithei lo angin kan mawhpuh a. Tun sawrkar pawh hi engemaw kan nih chiah le? MNF Ministry kum 2022-23 ah khan kan leiba chu ₹1,0993 lakh a ni a, chutih laiin 2025-26 leiba tur chhutna kha ₹13,999 lakh a ni dawr

ta mai a; a inthlauhna kha ₹3,009 lakhs a ni ta a. Hei hi sum enkawl thiamte tih dan tur emaw ni aw, tih hi Pu Speaker? Tin, mipui tana harsatna hemi chhung hian kan thlen nasa khawpin ka hria a. Buhfai man kan ti to a, petrol leh diesel chhiah kan la a, harsatna namen lovin mipuia, mi harsa zawkah kan thlen chung leh ‘Year of Consolidation’ tia puang chung a ‘sum puk ve lo ang’ titute’n hetiang khawp sum kan han puk te hi a mak ka ti a ni.

Tin, Pu Speaker, he budget ka hmuha pawl leh hrehawm ka tihpui em em mai, ZPM sorkar inzawrhna leh ZPM ti-ZPM tu ber mai, kut-hnathawktute an thlai thar leina tur ‘D-A-H’ an tiha kha hmuh tur a awm ta lo hi a pawl hlein ka hria a. 2004-2005 ah khan MNF sorkar lo kalsan ₹110 crore kha ‘D-A-H’ ah khan an dah ngei a ni. Amaherawhchu, an budget pangngai an han siam chho ve leh ta a, tun budget ah chuan kut-hnathawktute tan a hranin pawisa pakhat mah tunah hian dah lan a ni lo hi a pawiin ka hria a.

Pu Speaker, ‘hand-holding policy ah ₹350 crore kan dah alawm’, an rawn ti maithei; mahse, kut-hnathawktute thlathar leina man tur a hrang hlaka sum dah tura insawi ten hetah hian sum an dah lo hi a pawl ka ti a. Heng ₹350 crore te hi chu loan interest subsidy te, CM special package tana te hman tur a ni. Chung zingah chuan kut-hnathawktute hi kan bilh tel a nih erawh chuan, an inchuh ve hle turah kan ngai a. Kan duh bera chu, an lo inzawrhna leh an lo insawi ang ngeiin kut-hnathawktute tan hian a hrang hlak hian dah leh thei se tih kha. Kut-hnathawktute kan hmangaih zia a thuin kan sawi a, nimin lawkah pawh he House-a bill kan sawiah pawh kan insawi thiam siak viau; mahse, a takin an tana sum kan han dah lo hi chu pawl ka ti a ni.

Tin, Pu Speaker, 2024-25 chhunga CMO enkawlna tura sum ruahhman zat kha ₹280.41 lakh a ni a, chu chu indaih loin ₹173.37 lakh kan han dil belh leh a ni a. Chutichuan 2024-25 chhunga CM office enkawlna tura kan sum hman zawng zawng chu ₹456.78 lakh a ni. Hei hi a pawl hlein ka hria, a tam ka ti. Chief Minister office enkawlna tura hetiang zah Year of Consolidation kan puan kum khat chhunga kan hmang a nih chuan, kan budget hi beisei a phak dawn lo hle tih chiang tain kan hria.

Tin, Pu Speaker, Finance Commission in sum leh pai enkawl that leh that loh a tehna lian berte zinga mi kan fiscal deficit hi sawi ka duh a. FRBM statement ‘outcome indicator of the state own fiscal correction pad’ tihah khan kan hmu ang a, kum 2022-23-a kan fiscal deficit (kan budget pumpuia kan sum indaih lohna) hi ₹1,107 lakh ni thin chu, 2024-25 RE ah khan ₹ 2596.75 lakh a rawn ni chho ta a, hei hi actual a ni turah kan ngai a. Tin, tun 2025-26 ah hian kan sum indaihlohna tura kan chhut ₹1651.8 lakh hi RE a rawn chhuah meuh hi chuan ₹2,000/- a kai kan ring a ni.

Chuvang chuan, Pu Speaker, he House zahawm takah hian budget kan pharh te kan insawimawi a, budget tha thei ang berin lantir kan tum a, a takah chuan a lo ni vak lem lo niin ka hria a. ‘GSDP figure dik kan hmang’ ti chung si hian, hetiang ringawt maia sum puk leh indaih lohna budget pharh tho hi, eng emaw midangte aia kan special chuanna le?

Pu Speaker, a tawp bera kan sawi duh chu, sectoral allocation ah khan general service sector, sorkar inrelbawl naah kum kal meka kan sum dah ₹5,663.74 crore atanga a punna tur 14.95% a ni hi a pawl hle a. Hei hi sorkarin kan inrelbawl dan, kan inenkawl dan leh sorkar financial management a fuh tawh loh vang niin ka hria a, hei hi insiam that kan ngai hlein kan hria a ni. Chumi a nih rual chuan, social service sector lam, mipui nunphung mamawh leh

hmasawna lam hawia pawisa kan dah a thlahniam hi a pawihle a. Kum lo kal leh tur budget kan han pharh leh hunah chuan social services sector lampang hi uluk taka kan ena, ram-mipuiin hma kan sawn theihna tur budget in rawn pharh ngei kha kan beisei a ni.

Pu Speaker hei a-khawnpui ah hian kan dah tam viau mai a. Sorkar hmasa MNF sorkarah khan Finance Department ah sum engkim dahkhawm a ni a, ‘minister-te intlawn siakna tur a ni’ an ti a; hei hi a ni lovin ka hria. Tun sorkarah pawh hian MNF Ministry Pu Zoramthanga’n a rawn tih ang deuh chiah mai khan a-khawnpui ah pawisa hi an rawn dah ta vak a, hei hi thatna lai a awmin ka hria a. Keini ang State te ah chuan kan hotu lu ber, kan CM-in finance a keng a, sorkar kal dan tur department hrang hrangte mamawh anga CM, a lu berin a pe chhuak thin kha, term hmasa pawh khan kan fak a ni a. Kha kha an rawn chhonzawm ve chat mai erawh hi chu a fakawm ka ti a ni. Pu Speaker, ka lawm e.
(*Speech not corrected.*)

SPEAKER : Tunah chuan, Member zahawmtak Pi Baryl Vanneihsangilo sawm ang.

PI BARYL VANNEIHSANGI: Pu Speaker, ka lawm e. Hei vawiinah hian kan ram hma hun thlir chungin sawikhawmna hunte kan han nei a. Kan hma ah member zahawm tak tak ten hun kal tawhte an sawi lang thin a, a ti fiahtu atan tepawh kan hmang a, a thatna chin a awm a. Thil thleng tak tak te, ni tawh te a ni a, amaherawhchu, vawiinah hian kan tum bulpui ber chu - he kan budget hmang hian hmalam hun eng angin nge kan thlir anga, engtin nge kan inrelbawl ang, engtin nge ruahhmanna kan siam ang, tih kha a ni a.

Tichuan, he budget speech kan Finance Minister, kan Chief Minister ni bawkin a pharh tak kha kan en chuan, phok 19-na, point no. 51-a kan hmuh economics services sector ah khan, Pu Speaker, agriculture leh a kaihawih rural development te leh a hrang hrang a inziak a, MLA-LAD fund tih te a rawn lang a. Tin, budget pumpui atangin 23.15% dah a ni a, tun kum kal mek budget aain 7.27% in a pung a ni tih a rawn tarlang a. Helaiyah hian Pu Speaker, MLA-LAD fund, Local Area Development Fund tihpun chungchang hi ka sawi duh a ni a, hei hi a rawn chhuah tirh phat ah khan kan zain kan hria a. MLA-te invulhna emaw, inrenchem kum a ni si a, engvangin nge MLA fund chu tihpun a nih, tih te zawhna/selna a tam khawp mai a. Hei hi Pu Speaker, keiniyah chuan ₹50 lakh theuha MLA fund kan han tihpun hian, heti chung pawh hian a dik taka sawi chuan a daih hlei thei lo a ni. Kan bial theuhah chu chu kan hriain ka ring a. ₹150/- lakh an neih lai pawhin a daih lova, ₹200/- lakh kan neih pawhin chutiang bawkin Pu Speaker, a daih tak tak thei lo a ni.

Chutiang a nih avang chuan, he sorkarah proper channel-in, GPC kaltlangin ₹50 lakh theuha tihpun kan han rel a. Hei hi mipui chanvo a ni a, mipui hnenah a bo a bang awm lova pe tur kan ni a. Dik takin, langtlang takin kan hmang vek turah ka ngai a ni. Chutih laia sawi ka duh chu Pu Speaker, keini chu a vawikhatna kan ni a, thil kan zir ve chauh a. Kan han zir chhuahah pawh tunhmain kan senior-te an fakawm khawp mai a. POL te an lo nei ngai lova, mahni insengso-in, mahni bialah a hla emaw, a hnai emaw an lo fehchhuak thin a. Chutiang chu tunah pawh hian kan dinhmun a ni.

A nihna takah chuan, a chang leh ‘a heu zawng’ te pawhin ti ila, ka sawi uar lutuk lo turah ka ngai a, chutiang chuan mipui rawng an lo bawl tawh thin a. Tunah pawh hian chu chu kan chhonzawm mek a ni. Keimahni lamah chuan kan chan tur a ni a, kan heu tur a ni a,

ram leh hnam hmangaihnaah chuan chu chu kan tih tur a ni a. Amaherawhchu, kan mipuite'n a chan zawng leh a heu zawng ni lovin, a neih belh zawngin bial chhungah pawh fund a thleng tam zawnga kan kal hi mipui hmangaihna dik tak niin ka hria a ni.

Tin, Pu Speaker, heta sawilan leh ka duh chu point 52-na ah khan 'Bana kaih' tih kan hmu a, kum kal meka kan dah aiin 75% in a sang a ni, tih kha a ni a. Program hrang hrangah kan vannei a, min sawm ve a, kan tel ve a. Thalaite program ah te, program kher lo ah pawh, kan ram dung leh vangah te kan vak chhuak ve nasa viau a. Thalai bana kaih ngai tak tak, tin, han kai ta ila, dingchang tur/dingchhuak tur, business lamah te, entrepreneurship ah tih teh ang, chu chuan a huam vekin ka hria a; chutiang chu an thahnem khawp mai. Vawiinah International Women's Day, Woman & Child Development Deptt. buatsaihin kan va tel a, chutah pawh chuan pheikhawk siam chhuak award - Pu Zakapa Award te an hlan a. Fashion technology-a India ram puma nihna nei pha kan thalaite hnenah award te kan va hlan a ni.

Pu Speaker, chutiang chu a ni a. Kan ram thalaite hi banah hian kai tak tak ila, nakin lawkah chuan kaih ngai lova kala, tlana, zuang thei tur anni dawnin ka hria a. Chutiang ngaihpawimawhna chang hria sorkar kan nei a, a hma aia 75% ngawt maia dah a ni hi a lawmawm ka ti a. Kan ram thalaite aiawh pawhin he House zahawm takah hian lawmthu ka sawi duh a ni.

Pu Speaker, hmun danga kan kal venaah chuan, 'bana kaih duh lo phei chu nghawngah hian a hlina hlin dawr dawr tur a ni', te ka tifiam thin a. A chhan chu min support-tu hi kan mamawh. Kan ramah hian thawh ngai lo emaw, nu leh pa, pi leh pute neih sa ring emaw, chhawm emaw tur hi 2% pawh hi an awm ka ring lova, a dang zawng hi kaih ngai/puih ngai kan ni. Chuvang chuan, uar takin he hand-holding scheme ah hian ngenna te pawh ka'n siam nghal duh a. Thalai tum nei tha tak tak, vision nei tha, policy nei thate'n hand-holding scheme hi an rawn dila, he project hi an lo dil a nih chuan, khawngaih takin duhsak hmasakah te pawh lo tang thei sela. Party leh nihna, an awmna leh an khua, ruling leh ruling lo thliar lovin duhsak hmasakah lo tang se, tih hi vawiinah hian ka ngen duh a. Pu Speaker, nangmah kaltlangin kan Finance Minister te leh he bana-kaih policy ina a huam, heta kan hotute zawng zawng hi ka ngen duh a ni.

A chhan chu, nakinah chuan heng zawng zawng hi investment a ni a, a la let leh dawn a, kan ram economy thanna bulpui a la ni dawn a. A saptawngin, a backbone a la ni dawn a ni. Chuvang chuan, hetah hian kan ram thalaite tan kawng awlsam zawk te kan neih theih zel ka beisei tak zet a ni.

Tichuan, point 12-na ah technology chungchang kan hmu a, nichinah pawh kan ngaithla tawh a. "Cyber crime tih a ni a, ka duhthawh hret a, Cyber-bullying te pawh hi sawi tel thain ka hria a. Kan ram, kan hnam nihphunga kan sawi thin, kan mipate nihna tura kan sawi, kan hmeichhiate nihna tura kan sawi thin hi vawiinah chuan a inthlak thleng emaw tih mai tur a ni a. Social media, smartphone hmangte 'smart ve silo' tih tawngkam te pawh a awm thin a nih kha. Chutiang chuan, kan ram hi tunah hian a run zo ta emaw tih tur a ni a, tawngkam mawi lo leh tawngkam chhe tinrenga han indeuna te, inselna te a tam hle mai a. A thenah phei chuan nunkhaw-nawmlohna te thleng pawh a thlen niin ka hria a. Kan entertainer te a bik takin a tuartu te an ni a.

Chutiang chu tunah hian kan ram dinhmun, Kristian ram tiha mawi lo khawp te Pu Speaker, tunah chuan kan ti a, kan ziaa a, kan sawi duhin kan phuah duh ta a ni. Chuvang chuan heta awareness kan inpek thin hi a tha hle mai a, hei ai hian uar theih ni sela. A tul anih phei chuan hetah hian sum leh pai tam zawk te pawh dah belh ni sela. Chutiang chuan constituency-wise emaw, district-wise emaw pawhin awareness te pawh kalpuiin, inven hna te pawh thawh chhonzawm zel nise ka ti hle mai.

Vawiinah hian kan thawhpuite, kan rawngbawlpuite, Pu Speaker an awm a, han sawi tawp kha a mawi lo em ka hre chiah lo a. Chakma MLA kan nei a, tah hian sawilan ka duh zawk a chu Pu Speaker, mizote hi social media ah engkim mai thup leh zep nei lova ziaa chi kan ni a. Chakma an ni emaw, Hmar an ni emaw, Paite an ni emaw, Lai an ni emaw, chung tena an unaupui, an hnampuite han tihmingchhiat bawih bawih leh han sel te, an thlavang hauhna awm lova anmahni mualphona tur han ziaa te hi hnam dang hian an tih ve awm kei chuan ka hre lova; ka hresual a ni mai thei a; amaherawhchu, hmuh tur hi a vang em em mai a. A titu awm chhun, a uartu awm chhun chu keini ho hi kan ni a. Hetah hian kan inen fiaha, engkim mai a tulna laia kan insiam that ngam hi a pawimawh hlein ka hria.

Tichuan, point 11-na ah KAI app hman chungchang a lo lang a. Experience chhete kan nei a, private ah kan lo thawk ve tawh thin a, private-a thawk tam tak in awmin ka ring a. Chutah chuan private-a kan thawh dan ang hian sorkar-hnathawkte hi thawk ta sela, hah ve sela, hun hi vawng dik ve sela chuan, hna hi a sawt viau ang, tih hi kan sawi thin a ni. A chhan chu, a hahthlak em em a, hah tura thawk kan ni a. Mahse chu chuan result tha tak a nei thin a. Chuvang chuan, Pu Speaker, hmun dangah carom board pen te, eng eng emaw lo khela, zuma te thleng pawh khan lo tih thin a nih kha. Khatiang kha tunah chuan hmuh tur an awm ta meuh lova, hun kan vawng tha tawh a. Tin, hnathawh dan tur work-ethics te neih that lamah hma kan sawn tan a. He sorkar ina a reform zinga 'chhuanawm ber pawl' a tih loh theih lova, chuvang chuan, khalaita pawh kha ka han tarlang tel duh a ni.

Tichuan point 47 te, 54-na ah te pawh a ni a, essential needs a lo lang a. Tui pump-na tur chungchang te, kawng siamna tur te a ni a. Pu Speaker, nichina kan ngaihthlak tak ang khan, engmah hian a daih hi a awm thei rih lo a ni, tunah chuan. Kan neih chhun hi hetiang hian insiam rema, inher rema, insemzai tur kan ni a. Duhthusam dah thei lo mah ila, hetiang kan essential needs, mipuite'n a lova kan awm theih loh min han dah sak a, min ngaihpawimawh sak a, budget-a lo lang hi a tha hlein ka hria a. Building ropui tak takte, field tha tak takte neih hi a tha. Chumi piahaa chuan kan nitin mamawh - kawng te, eng te, tui te kan neih that leh si loh chuan awmzia a awm lo; khang building leh field hman ve lote min nghawng ve lo thin a. Chuvang chuan, hetiang kan essential needs ngaihpawimawh a ni hi a thain, a lawmawm ka ti hle a ni.

Tichuan, Pu Speaker, point 10-naah tax reforms lam kan hmu a, MSHD tih te a ni a. Ram changkanga tax an lak nat thin zia te kan lo ral-hriat ve a. Amaherawhchu, a aia thuk zawk leh chiang zawka sawi tur a awm ngeiin ka ring a. Ka sawi duh zawk chu - Pu Speaker, mizo-mipuite hian tax pek hi kan hreh reng reng lo a ni. Amaherawhchu, a hmanna hi hria ila, a lo let leh hi awm sela, kan ram hi develop phah se, mipuiten hnianghnar phah ila, kan neih tur ang neih phah ila, kan chanvo tur ang chang pha ila.

Tichuan, tax pek hi kan hreh lo; kan pe ang. Thuawihthei hnam kan ni a, kan ti em em ang. Amaherawhchu, kan tax pekte hi khawiah nge a kal a, engtin nge hman thin a nih hriat loh

chuan pek hi har ve tak a ni; cheng tam anga lang lo mah nise. Chuvang chuan, Pu Speaker, tun atang chuan heng kan tax pek te/ kan chhiah thawhkhawm te hi a hmanna tur dik takah hman niin, kan ram leh hnam tihchangtlunna atan hman zel nise, tih kha ka han rawt duh a.

A tawp berah chuan Pu Speaker, tih tak takna, thlen chin atanga hmasawn tumna kan mamawh hlein ka hria a. State intodelh kan nih hma chuan Central atanga mamawh belh, puk ngai dinhmunah kan la ding zel rihin a hriat a. Chuvang chuan, nakin hun lo kal turah 'hei hi chu kan mamawh tawh lo e; kan state kan intodelh ve tawh e' kan tih theih hun a thlen hma chuan, vawiina kan neih chhun ang, budget-a kan pharh ang te hman tura ruahman ang te hi anihna tur dik takah hmang ila, a nihna tur ang zelin pek chhuah, sem chhuah ni sela; tichuan, he ram roreltu leh rawngbawltu, vawiina platform neite hian nakin hun lokal tur atana thil tha tihna chance a ni tih hriain, rilru dik tak, thianghlim tak, langtlang tak nen heng kan budget neih ang angte hi tha tak leh tangkai taka kan hman theuh kha ka beisei a. Tichuan, 'he budget hi ka thlawp a ni' tih ka sawi duh a ni e. Pu Speaker, ka lawm e.

(Speech not corrected)

SPEAKER : A lawmawm e. Tunah chuan Member zahawm tak Pi Prova Chakma ilo sawm ang.

PI PROVA CHAKMA: Pu Speaker, ka lawm e. Vawiinah hian kan Chief Minister zahawm takin budget a rawn pharh kan sawiho a, kan ngaithla a; nikum lamahte pawh khan kan ngaithla a, kan chhiar a. Nikum leh tun kum kan han khaikhin a, khatah a bik takin ka bialah hian kan budget pharhah hian a topic bik awm lova sawi zau vek theih tih anih avangin k'an sawi ve ang a.

Tuna kan biala burning issue chu hmunphiah chungchang hi a ni a. Sorkar hmasaah khan hmunphiah hi kg ah ₹150/-a an hralh laiin, nikumah pawh kan hralh thei lova kan bialah hian. Tichuan, kuminah pawh hian empanel buyers te tun thleng hian kan bial hi an la rawn thleng lova, a thleng ka hriat pakhat chu Hill woodcraft te niin ka hria a, chu mite chuan kg ah ₹60/-in an lei a ni awm e. Kan sorkar kal mek hian a intiam angin Grade-A ah hian ₹100/-, Grade-B ah hian ₹80/-; kan bialah kha chuan Grade-A a tlin loh thu te pawh kan dawng a. Amaherawhchu, Grade-B tal ₹80/-in han lei ve se; engatinge kg ah 60/-in an lei tih kha ka hre duh a. Kut-hnathawktute hi an khawngaih em em a, I dinglama memberte pawhin an sawi a. Kut-hnathawktute an hmangaih em em chuan, engatinge chu kut-hnathawktute chu an tiam angin ₹100/- emaw ₹80/- emawin an leisak mai loh? Kg ah ₹60/-in an lei tih kha ka sawi duh a ni. Keipawhin ka tuarpui em em a, a then chuan Marpara lamah te kg ah ₹50/- tein an han hralh a, an khawngaih thlak em em a ni.

Tin, Food & Civil Supplies-ah hian, thenkhatin Food & Civil Supplies Minister hi an lo fak em em laiin, kei erawh chuan fakna tur ka hrelo a ni. A chhan chu, kan bial chu mirethei te te awm khawmna a ni a, buhfai kg-ah 15/- pawha ration an khul theih loh laiin, engtinge ₹30/- chuan an khul theih ang? An harsa em em a, ka tawrhpuai em em a ni. Chuvang chuan, hei pawh hi ZPM sorkar hian min ngaihtuah sak se, kg ah ₹30/- chu mi rethei tan chuan a na lutuk a ni. Chuvang chuan, Food & Civil Supplies changtu Minister hnenah hian ka lawm vak lo a ni.

PWD hi kei chu technical deuhin ka sawi lo ang a. Tun kumah hian ₹30 crore atangin ₹70 crore ah a kai ta a, nikum khan PWD works hmun hrang hrangah hmuh tur a tam a ni awm e; amaherawhchu, kan bialah pakhatmah hmuh tur a awm lova. Tlabung area bik hi engtiklai pawha kawng chhia hi a ni a. PMGSY te, CPWD road te a awm a, khangte siamthatna tur khan wawi tam tak department-ah ka thehluat a. ‘Kan ti ang’ an ti a, tun thlengin tih a al awm chuang lova.

Pu Speaker, nikum budget session-ah pawh khan KAI App a tha ka tih zia ka lo sawi tawh a, punctuality a maintain avangin. Kei pawh zirtirtu ka nih lai khan punctuality maintain thin ka nih avangin, tha dawn riaua rinna ka nei a ni. Mahse, keini bialah te chuan KAI app hman ngaihna a awm lova, kan lo hmang dawn anih pawhin signal that loh avangin awmzia a nei dawn lova. Chuvangin, KAI app kan hman ve theihna turin connectivity, network problem hi min solve sak theih chuan a lawmawm ngawt ang.

Niminah kan CM zahawm tak speech ah khan healthcare scheme a sum dah ₹20 crore atanga ₹50 crore-a a pun thu kan hria a, a lawmawm takzet a. Amaherawhchu, ka ngaihtuahnaa rawn lang chu, liquor prohibition bill kan sawi ah khan healthcare scheme-ah sum tam zawk dah a ni tih kan hria a, kha kha engnge a chhan ni ang aw ka ti a. Agricultural products fruits atang tea zu kan zawrh chuan health issue a hringchhuak hmem dawn si a, khang avang khan sum hi dah tam a ni mai lo maw, tih te ka rilruah a rawn lang a ni. Nimin khan ban kha phar kha Pu Speaker, i hmu lova, ka sawi ve hman ta lova, mahse hei vawiinah sawina chance ka nei hlauh a, a lawmawm hle mai.

Niminah food processing chungchang kan sawi a, “entrepreneurship ah khan food processing chu kan ti dawn a lawm; fruits kha wine ah kan chantir chuan revenue a tam dawn” tih kha a ni a. Mahse, fruit-juice atanga wine an siam kha mi nazawngin an in thei dawn lova; food processing entirnan – grapes kha dried-grapes ah kan process chuan naupang atanga kum upa lam thleng khan an ei thei dawn a ni. Chuvang chuan, grapes wine ni lovin, dried-grape fruits-ah te emaw, slice ah te emaw, chips ah te emaw siam ta zawk ila, tih kha ka rawt ve duh a. Chutiang anih chuan healthcare ah hian sum dah tam e mem pawh a ngai dawn lo a ni.

Pu Speaker, helai hi ka phak tawkin ka zir ve nasa a, kan bial angah hi chuan mamawh hi a tam khawp mai a. Tunhna Congress hunlai a sawi loh theih loh a. Congress Minister-in kan bial hi a lo awp char char a, tun term hi party dang kan tlin a vawikhatna a nih avangin theihtawp chhuah ka tum ve a ni. Chuvangin, CM speech ah hian Power & Electricity Department-a transformer leina tur leh a hlui thlakna tur sum tam tak a awm dawnin kan hria a. Kan bialah hian transformer 1 emaw, 2 emaw hi thlak a ni tawh a, amaherawhchu, a tam zawk thlakte an la ni lova. Khua a lum dawn tan a, khaw luma awm tan chuan current awmlo hi a hrehawm lutuk a; Pu Speaker, lo kal ve chiah ula in hre mai ang. Lum tak a ni.

Thil pakhat leh chu, rooftop solar kan sorkarin rualkhai takin kan ti ang an ti a. Amaherawhchu, Aizawl chhung MLA zawngte roof top solar energy a free in kan pe ang in ti a. Pu Speaker, engatinge keini thingtlang lam bialte kan tel ve loh?

Tichuan, Fisheries Department hi, nikum khan sangha chi Fauna kha hmun tinah sem niin kan hria a. Pu Speaker, kei pawhin fisheries beneficiaries list mi eng emaw zat telna ka rawn submit tawh a, mahse ka bialah chuan a thleng lo a ni. Chuvang chuan, he sorkar

hian rualkhai takin min en lo tih hi a chiang a. Nikum a Governor speech leh CM speech ah te pawh 'rualkhai takin' kalpui a ni dawn' tih kha a ni a. Chuvangin, Pu Speaker, he sorkar hian min enhrang lo se, tih kha ka ngenna a ni e. Ka lawm e.

(Speech not corrected)

SPEAKER : A lawmawm e. Tunah chuan Member zahawm tak Pu K. Laldawngliana ilo sawm ang.

PU K. LALDAWNGLIANA: Pu Speaker, ka lawm e. Vawiinah kan Chief Minister zahawm tak rawn pharh budget 2025-2026 sawihona, general discussion hun tha tak mai kan nei thei hi lawmawm ka ti hle a ni.

Pu Speaker, a hmasa bera kan sawi duh chu – Annual Financial Statement, 2025-2026 a phok tawpna lai hi kan tisual palh nge; han en ula, 'Actual 2022-2023' tih hi pahnih a awm a, a bakah 2024-2025, 2024-2025 pawh hi a awm bawk a. Hei hi tihsual palh nge, tih kha ka'n sawi hmasa a.

Pu Speaker, dinglam atang khan a thatna lai te kan Chief Minister zahawm takin a speech ah hian tam tak a rawn sawi tawh a. Khangte kha thlirna lehlam atanga kan thlir ve fo hi a ngai a, hrethiam takin min lo ngaihthlak sak turin kan ngen che u a ni.

Pu Speaker, budget pumpui hi ₹15,198.76 crore a ni a. Tichuan, sorkar inrelbawlina revenue expenditure hi ₹12,540.20 crore zet a ni a, chu chu budget pumpui chhutin 82.81% a ni. Chutih laiin hmasawna tur capital expenditure lam erawh hi chu ₹2,658.56 crore chauh a ni thung a.

SPEAKER : Khawngaihni; hei kan hun pangngai dar 4:00 a lo ri a. Vawiin chu nimina kan tih turte kan han chhawp bawk nen. Kan kal zel dawn mai em ni ang? (House-in kal zel a remti a.) Aw le, chhunzawm rawh le.

PU K. LALDAWNGLIANA: Pu Speaker, ka lawm e. Kan budget pumpui atanga capital expenditure hi 17.9% chauh a ni a, kan sorkar inrelbawlina lian chho zelah hian hmasawna hnathawhna tur a tihtlem zel avangin, inrelbawlina senso titem zawnga tan lak hi a tul hle a ni, tih kha point pakhatna ah kan sawilang duh a.

A pahnihna ah chuan, budget pharh ruala pharh tak Supplementary Demand for Grant ah hian ₹3476.21 crore lai a lo awm a. Hei hi kan hriat angin kum 2021-2022 chho Covid period tih lovah chuan supplementary demand tam ber tum a ni a. Pu Speaker, House Leader zahawm tak khan hun hmasa lama a sawi thin kha ka hre reng a, Supplementary Demand chu sorkar sum hman thiam loh vang leh sum hman sual avanga cheng vaibelchhe tel chhawp chhuah ni anga a lo sawi thin kha, a dikloh zia a lo lang ta niin ka hria a. Vawiinni ah hian ama sawi ang ngei khan supplementary demand tam ber hi a rawn pharh ta a nih hi. Pu Speaker, kan Finance Minister budget speech, para 21-a leiba chungchang a sawina ah hian 2024-2025 BE - ₹14,034.76 crore leh RE - ₹13,030.82 crore a nih thu sawi lan a ni a. Tichuan, leiba hi ₹1,003.94 crore-a tlahniam angin a sawi bawk a ni.

Amaherawhchu, a tak takah chuan leiba hi a tlahniam chuang si lo a ni a, chhan chu, kan leiba a tlahniam lohna, a punna hi han sawi ka duh a. A dik tak - actual kan nei tawh chinah

hian sorkar hmasa hunlai 2022-2023 kum tawpah khan a awmzia chu, (31st March, 2023 tihna a nih kha) leiba tlingkhawm chi ₹10,993.09 crore a ni a, hei hi ZPM-sorkar hnuai hian a tlahniam zawngin a kal lem lo a ni, tih hetah hian a chiang a ni. A kum leh 2023 actual ah chuan ₹12082.26 crore a kai chho nghal a, a pung chho zel a nih kha. Tichuan, actual kan neih tawh 2023-2024 chhunga leiba tlingkhawm ₹12,082.26 crore atanga chhut phei chuan tuna kan sawi mek BE 2025-2026 hi kum tawpa leiba tlingkhawm tur chhut zat ₹13,999 crore hi ₹1,916 crore zetin a lo pung tawh zawk a ni lawm ni, helaiah hian?

Pu Speaker, budget speech para 37, page 15 a kan hmuh ang hian, revenue expenditure pawh hi kum liam ta BE aiin tuna BE ah hian 4.88% zetin a pung a, he kan budget pumpui atanga 82.51% zet maiin a kai dawrh a nih hi. Actual kan neih tharlam ber kan sawiah khan 2023-2024 ah ₹10,836.96 crore kan hmanral lai aiin tuna BE ah hian ₹12,540.20 crore zet hman a lo ni leh a, a pun chhohna hi ₹1,303.20 zet a tling hman a ni. Pu Speaker, vanduaithlak tak mai chu, FRBM Act pawhin min phut angin, kum tam tak revenue surplus neia kan lo kal chhoh tawh laiin, kum kal mekah hian revenue deficit kan nei leh ta tlat mai hi a ni.

Nichinah member zahawmtak khan actual 2021 te, 2022 te an rawn sawi chho den den a, a dik khawp mai a. 2024-2025 BE ah hian ₹564.90 crore nei leh tura kan inbeisei laiin RE ah hian revenue deficit ₹39.19 crore lai kan hmu a nih kha. 2015 atangin covid period tih lovah chuan revenue deficit kan neih ngah ber tum a ni a, hemi avang hian fiscal deficit puk belh a ngai ta a ni. Chutah chuan, para 20, page 8-a kan hmuh ang khan, ‘fiscal deficit a tam ber tum a ni’ tiin chiang takin a rawn sawilang a ni. Kum 2024 BE leh RE pawh chiang takin a rawn sawi lang a. Tichuan, kum 2025-2026 ah hian GSDP atanga chhut phei chuan 4.57% a rawn tling a nih kha; a crore zawng chuan ₹1,651.68 crore a tling a ni tih kha Pu Speaker, khatah khan chiang takin kan hmu a ni.

Pu Speaker, Sorkarin inrenchem tur kan ti a, kan sawi tam tawh viau a; revenue receipt kan neih chhan pawh a ni ang a. Hei, Supplementary Demand for Grant PWD hnuai hian chiang takin a lang a. CM Office leh a chenna cheina atan ₹148.92 lakh lai a lang a, Advisor to CM te, Vice-Chairman MRMC te lirthei leina tur out-sourcing ah khan ₹26.60 lakh a lang bawk a. Chief Minister bika Dy. Speaker leh a dang Adviser to CM te Bungalow, mimal chenna inah khan ₹288.90 lakh lai kan hmu bawk a nih kha. Pu Speaker, ‘year of consideration’ kan sawi mek lai hian, a nihna takah chuan kan inrenchem lutuk lo a ni. Adviser to CM te, Board Chairman hrang hrangte avanga kan sum sen hi a tam a ni. Inrenchem ila chuan heti zat zat hi deficit kan nei lo ang tih hi a chiang hle a ni. Tin, chhiah tihpun loh te phaw kha an ti deuh khan ka hre si a, mahse a tul a nih ka ring a; kan tipung leh lawi bawk si a.

Aw le, Pu Speaker, ‘year of consolidation’ kan puan mek lai hian kan leiba pawh a pung chho mek zel bawk a. Revenue deficit neih bawk, revenue expenditure pung chho zel bawk; he budget hi ‘budget-tha’ a ni thei dawn em ni? Hetiang budget pass a ngai tur hi a paw ka ti hle mai, Pu Speaker. Ka lawm e.

SPEAKER : Member zahawm tak Dr. Vanlalhlana ilo sawm ang.

DR. VANLALHLANA, MINISTER: Pu Speaker, ka lawm e. Sawi rei loh hram kan tum ang a. Kan vei tlang si a, helai Session Hall, Assembly Hall pawnah hian sawi ho a chakawm khawp mai a.

Pu Speaker a hmasaber ah chuan, GSDP chungchang hi tarlan a ngaiin ka hria a. Pu Speaker, i veilama mite hian ‘a tam, a tam’ an ti a, GSDP a tanga teh vek a ni. Kan ti thiam miao a, GSDP kan biru ve lova, kan cheimawi ve lova, a nihna angin kan rawn tarlang mai a ni. 2023 chho, 2022-23 GSDP BE kha ₹39,000/- crore tih vel chho kha a ni a, actual ah chuan ₹30,000/- crore a ni a, ₹9,000/- crore-in a tla a. Tin, a kum leh 2023-24 BE ah ₹35,000/- crore bawr velah dah a ni a, chutah chuan ₹31,000/- crore a actual a ni chho leh a, ₹4,000/- crore velin a tlahniam ve leh a ni, a actual ah chuan.

Tin, Pu Speaker, 2024-25 khan an lo teh tawh dan thin kalphung hmang khan BE siam a ni a, chutah chuan GSDP kha ₹4,837.52/- crore a ni. FRBM Statement under FRBM Act, 2025-26 kha lo en ula, pheik 13-na ah khan heti hian a inziak a - “2023-24 actuals ₹31,917/- crore a nih lai khan, kalphung-hlui BE siamah khan ₹48,000/- crore ah a rawn kai chho ta a. Khati a nih chuan, actual leh BE khaikhin khan 50.50% growth kha a awm a ni; a rapthlak lutuk a ni. Pu Speaker, khatiang zat zat thanna kha engtinngge kan neih theih ang? Kan GSDP siamthat a ngai a ni tih chu a lang Chiang a. He thil ngaihven hian sawlai ah Economics & Statistic ah pawh term hmasaa kan opposition lai khan tum thum ka va tlan pheih a, ‘hei chu a fuh theih dawn em ni?’, tiin ka va zawt Chiang a ni. Anni chuan, a teh dan hrang hrang a awm a, an ti a, Amaherawhchu, ‘Will a awm a ngai’ an ti a ni. Tun sorkar tharah hi chuan ‘Will’ a rawn awm ta a, a nihna diktakin GSDP hi tarlan a ni ta a ni.

He thil avang hian, Pu Speaker, i veilama mite hian ‘a hniam, a hniam; a sang, a sang’ an ti a. A tha lo lam GSDP to Debt te pawh kha a sang dawn tih kan hre reng; kan leiba pawh a lang tam dawn tih kan hre reng; a ratio ah chuan fiscal deficit te pawh a sang dawn tih kan hrereng a ni. Amaherawhchu, ‘kan nih dan ang hian kan lan ngam a ngai’ tiin, ARIMA method 2011-12 basier a hmangin, Autoregressive Integrated Moving Average (ARIMA) method an hmang chho ta a. Ti hian kan GSDP chu kumin budget ah chuan ₹36,088 crore ah a rawn tlahniam ta a ni. Nakinah RBI in State te a rawn ti leh ang a, State hrang hrang budget khaikhinna te a rawn ti leh ang a, chutah pawh chuan kan dinhmun a tha lutuk lo mai thei. Amaherawhchu, kan insiamthatna atan kan mamawh si a. Chuvangin GSDP hi tihhniam a ni a, chu thil chuan a hliam si chuan, helaia kan leiba te a ngai ang deuhthaw a la awm te emaw, kan tihhniam hret emaw te, helaia kan revenue awm te GSDP atanga teh anih avangin a rawn lang tam ta a ni. Pu Speaker, i veilama mite hian tam an ti a, tam an la rawn ti chho zel dawn. Amaherawhchu, nihna diktak tilang ngama kan pen avang hian a tam a ni. Chu chu i veilama mite hian min lo hriatsak se ka duh khawp mai.

Tin, Dampa bialtu zahawm tak Pu Lalrintluanga Sailo in hydel project a rawn ngai pawimawh thar kha ka lawm khawp mai a. An sorkar lai khan Ministry of Finance a tangin hydel project 210 Mw an ngaihsak loh lutuk avanga principle an inhnudawh lehna lehkhah sorkarin a dawng a ni. XV Finance Commission ah kha memorandum vawihnih an thehlut a, tah khan hydel project chungchang engmah tarlan a ni lova. Han en let mah ula, NIT ho tender chhuahna Mizoram ah khan, No. 1 of 2024, tender hmasa ber kha hydel project a ni. Chuvang chuan, ZPM te hian hydel project kan ngai pawimawh a, kan rawn buaipui zel ang; a thla lo muang rawh se.

Tin, cyber crime chungchangah kan Chief Minister zahawm takin a thil tawn a sawina chungchangah fiamthu-nuihza siamnan a rawn hmang fo mai a, hei hi sawifiah ngai a awmin ka hria a. Pu Speaker, hmel hian a zir deuh nge ka hre lova, term hmasa lai khan kei te, Pu Hlana te, kan Speaker hlui Pu Rina te Delhi ah kan zin a, committee in; workshop hmang te

pawhin a ni ang chu. Chutah chuan Pu Rina room ah kan thu a, a te thawt mai a, ‘zak theilo lutuk’ a rawn ti a ni. Thlalak/video rawn langa kha a hmuhdawm vak lo; ‘a va mak e aw’ kan ti a, Pu Hlana nen hian kan tawn tawh thu kan sawi a ni. Chu chu kan tawn a ni.

Kan Chief Minister hian rilru thianghlim takin a thil tawn a rawn sawi a, a hahthlak zia, a manganthlak zia a rawn sawi a ni. Cyber crime han ruai ila, phone no. te thlakin an ti kual ang a. A dik tak phei chuan, kan Speaker hmasa pawh khan chutianga buaipuiin, a um bik em ni? Helai pakhatin a rawn sawi tak avanga hetia tih kual reng ringawta hi fuh ber lovin ka hria a. Kan House Leader hi a hmel a tha deuh a, an call ngun deuh bik em ni ka hre lova; kan tawng a ni.

Chutiingin, kan sawi kan sawi lova, fiamthu thawhnaa tih chi pawh a ni chiah lo. Kei phei hi chu choka ah kan nu nen thil kan buaipui lain a rawn call a, kei pawh ka off nghal a ni. ‘A van mak e aw’ ka ti a; kan nu’n, ‘engnge a?’ a ti a; kan sawi a, a mak kan tih thu; an zahtheihloh thu te kan sawi a ni. Chu chu kan thil tawn a ni a. Fiamthu thawhnan emaw, khatianga indeuhsawhna atana inphawrksak reng emaw, insawisak reng emaw hi a fuh lovin ka hria a. An phone ve peih lo te, an phone ve duh lo te pawh a ni ang a, kha chu kan tih theih bak a ni a, kan hriat ve bak a ni a. Ani paw’n a tawng ve tho mai thei.

Cyber Crime lamah han ngaihven ila, Vai ho phei chu thil tam takah phone an thlak zung zung a, an block a, a har lutuk; pawisa hmuhlet leh te hi a har lutuk. A nazawnga han um vek kha kan hman bik loh avangin, kan um lo a ni mai. Keini pawn kan um lova, Pu Hlana te kan Speaker hlui te paw’n a um bik lo a ni.

Tin, Pu Speaker, KAI App chungchang an rawn sawi a, ka deptt. chan te pawh a ni a; nakinah Demand-ah te pawh kan la sawi ang a. A felfamkim lo tih kan hria a, theihtawp erawh kan chhuah a. Mipuite’n ZPM-ah beiseina an nei a, chu beiseina avang chuan sorkarna min hlan a ni. Chu beiseina an neih tam tak karah chuan, “sorkar-hnathawk ten tha deuhin hna thawk rawh se” tiin, ZPM te min fuih a; kan headmaster te, kan director te, kan office head te anni ang chu, tamtak an inzir te pawh a ngai a, kan inen zel a. A thenkhat te phei chuan an dahna atanga meter 500 chhunga attendance dah theihna ah te khan an lo rem a, kan siamtha ngat ngat a ni. Meter 500 chu Aizawl bikah phei chuan, mahni in atangin attendance a dah ngat ngat theih a, khang te kha kan um a ni. Amaherawhchu, tunah hian veng thenkhatah chuan, sorkar-hnathawk ho an chhuah hunlai, traffic jam huna kha ‘a danglam ta deuh e’ te chu an ti a ni. Tin, ‘kan sorkar hmalakna chhunzawmna’ tih angin a rawn sawi a, KAI App ang tak hi chu a awm ka hre lova. Engpawh nisela, nakinah kan ti zel ang.

A tawp berna atan, Pu Speaker, supplementary demand chungchang kha sawiho kan chak a ni; ‘i sawi ho ang u’, kan ti a, keini khan. A pun chhan leh a tam chhan te kha deptt. 11-ah hian supplementary demand kha ₹100 crore chuangin a rawn pel hlawm a, a then chu aia tam daih te a ni a; a tam chhana kha sawi kan chak a ni. Amaherawhchu, Opp. Leader-in, ‘i ti lo mai ang u’ a tih avangin. Kei pawh ka inring a, a la enlet theihin ka ring; kan sawiho ta lutuk lo a ni a. Hemi chungchang pawh hi kan sawi chak a. ‘Supplementary Demand a sang’ an rawn ti leh ang a, a san chhan hi a awm a, keini chuan kan sawi thei a, kan House Leader-in kei ai daihin a sawi thiam zawk dawn a. Pu Speaker, hun te a zo tan tawh dawn bawka a, ka duhtawka mai ang e. Ka lawm e.

(Speech not corrected.)

SPEAKER : A lawmawm e. Member zahawmtak Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, supplementary demand atanga han tan a va chakawm ve. Engpawh nise, supplementary demand hi budget documents zing ami a ni a, budget-general discussion kan nei mek a, chutah chuan sawi tur niin a lang a. Chuvang chuan supplementary demand sawiho vel kha a la ding zel turah te pawh ngai ila a that ka ring a ni.

Tawitea sawi ve ka duh chu, fiamthu nan ka han hmang deuh nanging ka'n sawi zawm teh ang. Supplementary Demand chungchangah hian ka inring te-traw ve khawp mai a. Supplementary Demand hi kumin chu kum dang ang lo deuh maiin Loan Bu, Sum pukna Bu a ni ringawt a ni. Hei hi tuna ka hma chiaha sawi pawh khan a hre chiangin ka ring a. Kum dangah sum pukna supplementary demand tam tak a awm ngai lova. Kum dangah chuan CSS sum budget session neih hnua sorkar hlawhtlin avanga sum hmuhbelh te supplementary demand-ah a lo lut khawm thin a, a nuai sing bi nei depts. hlawhtling tak tak te an awm a. Chung avang chuan, supplementary demand a tha chi kha a tam thin a ni.

Tin, kumin Supplementary Demand-ah hian motor leina a tam khawp mai a, kum dang lo ang takin. Motor leina supplementary demand-a tih chiam kum hi ZPM a sorkar kum khatna kan hman dan hi a ni a. A takin budget speech ah te emawa kan sawi anglo tak hian he sorkar hi a kal thin a ni tih, he supplementary demand-a additional sum kan mamawh chhanah hian a rawn lang nasa khawp mai a. Department 6 emaw motor leina chu supplementary demand-ah a rawn lang a ni.

Kan hriat angin, Supplementary Demand ah hian a tha chi leh a chhe chi a awm a, a chhe chi chu depts. pakhat atanga sum depts. danga indaihlohna avanga suankual vela kha supplementary demand-a luh kual a ngai a, re-appropriation a tih theih loh a, depts. chhung lo ah chuan. Depts. khat atanga depts. danga a kal khan supplementary demand angin allocation hrang a lo ngai a, chu chu he House-ah vote a ngaih avangin, kan han vote thin kha a ni a. Kan vote hunlai khan tihdanglam theih pawh a ni tawh lo a, mahse, general discussion-ah chuan a huam tel vek thin niin ka hria a. Chu chu State dangah pawh an tihdan niin ka hria a, tuna kan sawi hi a pawilo turah te pawh ka ngai a ni.

Tichuan, (a tawi zawngin) tun tuma kan supplementary demand hi depts. khat atangin depts. danga sum suankualna eng emaw zat a awm a, Finance-ina sum indaihlohna avanga a pek belh motor leina ang chi te, an chairman hlawh leh kan commission emaw, consultant te hlawh emaw te kha a ni nge ka hrechiang chiaha lo a, a detail takin a inziak chiaha lova, revenue-head ah pawh hian. Supplementary Demand kumina kan pass tak kum kallai meka hi a tam khawp mai.

A dawt leha chuan, supplementary demand-a sum hmuh a tha chi hi chu depts. thenkhatah a awm a, (a kil kelin ka sawilo ang a). Supplementary Demand tha chi, 'Grade B' te pawh ti ila, a tha awm e. SASCI te hi kei chuan tha ka ti tho mai a, SASCI sum hmuh hi kan sorkar lai te pawh khan i veilama mite khan an sawisel viau thin a; mahse, SASCI hi chu kum 50 chhung interest-free a ni a. Kum 50 a liam chuan hetiang amount hi chu tlemte kha a ni tawh dawn a, rulh pawh kha, sorkar kan batah a la kal zel a nih pawhin a har lutuk lo ang a. Mahse, kum dang angin, 'supplementary demand ah sum thar kan hmu teuh mai; kan

thawhchhuah a ni' han tiha chhuan viau tur chi chu a ni lem lo a ni, SACi hi. 100% loan a ni a. Govt. of India pawh a thil phal ngang mai a, a-criteria fulfill-a, reform ngai te kan tih chuan kan hmu mai tur niin a lang a.

Hemi chungchangah hian kan sorkar officials leh Finance Deptt. lam te pawh te pawh an fakawm hlein ka hria a. Helaia a-sorkar pui anga tih chiam theih chu a awm lo a. Mahse, a-officials te smart leh smart lovah thil thui tak a inngat a, chung chu kumina loan tamtak kan lak theihna chhan hi kan official te emaw, an mi-rawihte emaw smart vang te pawh a ni ang a, sorkar hmasa lam lo kaldan te pawh a ni ang a.

Tin, tun sorkarin loan policy fel tak an nei a, 'lak theih theih chu loan hi lak tur' tia an sawiloh zawnga an kal thin vang hian, chu policy chu neia an lak bawrh bawrh mai avang hian Supplementary Demand pawh hi 'Loan-puk Bu a ni' ka han tihna chhan kha a ni. Puk hi a tam em em a, ka'n en thuak hian nuaih-nuaih khat vel, nuaih-nuaih khat hi chu a tam fu mai a. A sap tawngin han sawi ta ila, ₹1,000 crore kan Supplementary Demand bu-a kan sum dah 100% hi loan a ni pha em aw, ka ti a; anih phak loh pawhin a tlinglo hret vel ang a. Kan loan lak hi kan duham khawp mai a, a tul te pawh a ni ang e. Mahse campaign-na leh party office-a kan lo sawi thin dan ang kha chuan he Sorkar hi a kal lo a ni tih, chu chuan a tichiang a ni.

Tin, BE han sawi hi a tak rama kan kal dan nen hian a inmil thin loh avangin ka tha a na angreng a, mahse loh theih loh te pawh a ni ve a; MLA te kan nih ve chuan, sawi chak te kan lo nei ve lo thei lo a. "Year of Consolidation" tiin hming mawi tak kan vuah a, a tak taka sorkar kan kalpui dan chu sum leh pai consolidate-a, inrenchema, inhun ngheh lam kawkin a lang lova. Sorkar hmasa ten an tih duh loh tamtak Year of Consolidation ah kan sorkar hian a ti a. A tak taka kan kal dan tura hi, he Sorkar hi estimate-a rilru nghet tak, commitment fel tak anih loh chuan, kan budget estimate in a tinzawn, a-orient zawng hian kan kal lovang tih a hlauhawm hlein ka hria a.

Tin, thlai thar chungchang kha, hmunphiah hi thlai tharah mizo tawng chuan a huam lo mai thei e. Hmunphiah chungchang hi kan budget mai pawh ni lo, kan Governor Speech te, kan hotute speech te, budget-a kan dah dan ang te in a takin a chang lova, hmunphiah chingtute an rilru a na a ni, tih kan hria a. Nikumah phei chuan mahni fa Aizawl-a dah mekte'n an fate chawmna tur neih theih loh avanga inhruai haw te pawh ka hre nual a ni; chutiang khawp chuan chhungkaw tam takin an tuar a. Chutih mek lai chuan, kan la serious tawk lo deuh em aw ka ti a. Chuvang chuan, nikum supplementary demand te kan en let chuan, sorkar hmasa ah khan SEDP-a a sum dah, Planning Deptt-a awm thlap tawh kha sorkar-in cancel-in a la let a, supplementary demand anga regularize chhoh te a ni a.

Tunah pawh hian tam tak hi kan la hmang lo niin ka hria a. MNF hunlaia sum dah ₹110 crore, thlai thar lei nana an tih SEDP pawisa kha, kuminah hian nichina kan member zahawm tak Pi Prova-i sawi ang deuh khan, a sum kha a awm reng tho a nih si chuan, engatinge kan lei ve mai loh? Khaw tam takah chuan an ching lova, a ching uarte chuan an bei ve nasa khawp a. Kan bial lamah te pawh harsatna tawk tunah mangang takin an awm a ni tih hi, he House zahawm tak leh kan House Leader zahawm tak pawh hi Pu Speaker, nangmah kaltlangin ka'n hrilh duh a ni.

Tin, ‘GSDP formula tharin kan ti’ tih kha, khatiang kha ngaihtuah chian ngai tak niin ka hre ve a. Tunge responsibility la ang? Fix ngai te ni ta se, engtin nge ni ang? Mahse sorkar hi chuan system fel tak a nei a, arawn awm chite sorkar-ah chuan tel ve kan tam a, ZPM Party tih kha a ni ngawt tawh lo deuh a. ZPM Party ang kha chuan kan rel thelh nasa ve thin tho a, kan research-base ang te pawh a sual pheng-phung thin a. Mahse sorkar decision a nih kha chuan, mi thiam tak takte nen inrawn tlanga an tih a ni turah ngai ila. Chutih mek lai erawh chuan, implication tam tak a nei thei ang em aw tih te rilruah a awm a.

He budget chungchanga indicator hrang hrang hi sawi ve pawh ka tum loh phah a ni. GSDP anrawn arrived dan leh, ‘khami chhuak tur khan eng formula nge an hman; a approve turte’n khatah khan engtin nge ngaihtuahna, thu leh hla an neih tih te kha ka hriat chiah loh chuan, kei min la convince chiah lo deuh a. Kan la inzir ve zel turah te pawh ngai ila. Tin, he budget-a ‘CM chanvo’ tih kha a sang fer fawr khawp mai a. Kha kha kan hunlai, (han ti ve khanglang ila) MNF hunlaia kan CM chanvo te nen chuan inthlau tak a ni a, hei hi mipui hriat atan te pawh a tha awm e. Tin, he budget vanduaithlak deuhna chu, ‘penalty interest’ tih hi he budget-ah hian kan hmu thluah ta mai a, ‘chawi’ tihna te pawh a ni ang chu. Sum hman tlai vanga chawi, (penalty interest) hi budget discuss tichakawm lo tu te pawh a ni em aw, i dinglama thute tan khan? Hei, PMGSY-ah te pawh hian a lo awm a, Health Department-ah pawh hian 274 lakh tih te, 47 lakh tih te, PMGSY-ah 361lakh tih te.

Tin, hei SNA, Finance Department lama transfer tlai hrim hrim avang te pawh hian ₹1,894/- lakh kan lo chawi niin a lang a, DC&MA ah pawh 12.37 lakh tih te. Chuvang chuan, sorkar smart tak, sorkar efficient tak; i dinglama miten an tih ang kha chu Pu Speaker, sorkar kal dan tur chu a ni chiah lo a ni ang, tih hi, he Penal Interest budget bu a lo lang hian a tilangin ka hria a ni. Mahse, hei SNA-SPARSH model te implement a ni dawn a, CSS bikah hi chuan SNA-SPARSH model system-a on-boarding engkim tih fel a nih chuan, heng te hi chu a thleng tawh lo turah beisei ila. Helai sawi ngaia awm hi ..
(**Speaker:** I zo thei dawn tawh em?) nuam lo deuh mah ni se, kan sawi a ni.

A tawp nan tak tak, Pu Speaker. Finance Department emaw, Mizoram Sorkar emaw hian UC dik lovin Central Sorkar-ah a submit em tih, kan Chief Minister zahawm tak, Finance changtu hi ka zawt duh a. He house-ah ngei pawh hian, ‘UC dik lovin kan submit ve dawn lo’ tiin kan House Leader hian a sawi thin a. SASCI Part-I, 2024-2025-ah te hian sum a taka la hman miah loh, contractor pawh la thlan loh, a implementing department-ah pawh sum la dah chhuah chiah loh te pawh a ni mai thei e. Tin, a taka lo thawh tawh pawh nise, thui la thawh loh, a amount kha utilized anga UC lo submit kha a awm em? A awm chuan, a sawi loh angin he sorkar hi a kal a ni lo maw? Tin, nakinah eng emaw thil pawh palh lo awm ta sela, kan sorkarin kan lo tihtir a nih chuan, officialte’n tuar lo hram sela. Hei hi thil serious tak, state thenkhatah chuan harsatna khirh tak an tawhna te pawh niin ka hria a. Sum, second installment duh vang emaw, additional duh vang emawa UC la submit theih loh, UC la sign chi lovah department lamin second installment kan hmuh theih nan ‘UC rawn sign ula’ tia Central Sorkar-a UC thehthlak mai te hi a lo awm palh em aw, tih kha ka zawhna a ni e. Ka lawm e.

SPEAKER : A lawmawm e. Tunah chuan Member zahawm tak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, vawiin budget discussion-a thu ka sawi thei tur hi ka lawm khawp mai. Ka hmaa mite khan, “I vei lama mite khan Year of

Consolidation ah inrenchemna hi an kalpui tak tak lo” tih kha a sawi uar viau mai a. Inrenchemna kalpui tak tak lo ila, electric bill ba sum tlingkhawm ₹837 crore zet te kha engtin nge kan pek theih ang? K-deposit leh thil chi hrang hrang, pension benefit tea ba tang te pawh chu kan pe teuh thei a; inrenchem lo ni ila engtinnga kha kha kan pek theih ang? A hma chuan an ba khawl er-ur a ni a; Pu Speaker, electric bill-ah ringawt pawh surcharged kan pek thin ang te ₹300/- lakh-in a tla hniam thei a, chumi avang chuan a hun dik taka bill kan pek man rebate pawh ₹165.69/- lakh zet kan hmu thei a ni. Khang kha inrenchem vang a ni lo em ni, Pu Speaker?

Tin, tar pension te pawh inthlan laia kan tiam ang ngeiin tunhma Central atanga tlem te te an hmuh thin kha, kan pek belh teuh a ni. Khang zawng zawng kha a vai-vaia sawi kha a a ngai lovin ka hria, Pu Speaker. Healthcare ba pek theih loh tlingkhawm pawh 80% lai kan pe thei a; inrenchem lo ila engtin nge khang kha kan pek theih ang, Pu Speaker?

Tin, PDS (Public Distribution System) hnuai ah kan Supply Minister-in huaisen takin buhfai man subsidized avanga sorkar insen teuh teuhna kha a tihnam a, card-var atangin non-NSFA kg ah ₹15/- atangin ₹30/- ah a ti chho dawr a, party lam pawh kan tim viau a ni, dik tak chuan. VC thlana sorkar hmasa party te an chak duai-duaina ang kan phak lohna chhan pawh kha vang kha em ni, kan ti. Amaherawhchu, ₹20 crore lai kan hum phah a, khang kha inrenchemna kan kalpui vang vek a ni.

Administrative Reforms chungchangah hian Pu Speaker, ‘KAI App’ kan tih, Bio-Metric Attendance hi a tangkai khawp mai a, hei hian kan work-culture pawh a ti danglam em em a ni. Thingtlang sikulah te pawh dah vek ila chu aikal venna tha ber a ni, tu kutzia mah a inmil si lova. Ti thei vek ila chuan, hei baka aikal venna tha hi a awm lo reng reng zawk a ni. Chuvang chuan, heng te hi kan la tih chho zel theih a tha khawp ang. ‘D-A-H’ tih chungchang kha an vei viau mai a, Pu Speaker. Hand-holding scheme phok 5-na, no. 13-ah khan, nikum kum tawp lama Agriculture Marketing Board-a ₹110 crore kan pek tawh chu, “sorkarin a thlan bik thlaithar - hmunphiah, sawhthing, aieng, hmarcha leh mizo-thar buhhu lei nana hman chhoh tan mek a ni” tih a ni. Tin, Bana-kaih scheme phok 20-ah hian ₹250/- crore an dah thu chiang takin a lang bawk a. Chuvang chuan, D-A-H kha budget ah pawh a rawn reflect hle a ni tih kha a hriat theih a ni. Tin, tunhmaa thil thleng ngailo, MLA te min tirit em emtu ‘Ruang-phurh’ kan rawn tichhuak a, hengte hi a lawmawm em em a, khang kha kawng hrang hranga kan inrenchemna rah vek a ni.

Pu Speaker, a tawp berah chuan, Supplementary Demand chungchang kha kan House Leader hian saw lam, i vei lama a thut lai pawha a sawi tam ber a ni a, sorkar hmasa lamah pawh sawi phut thin a ni; mahse, an sawipui ngai lo. Tunah, helamah kan han thu ta a, sawiho pawh kan rawt a, an duh tlat lo a ni. Tuna han sawi pawr leh vela kha a awmzia ka hre lo khawp mai. Pu Nguna chiahin a rawn sawi a; midang kha chu an leader berin sawi loh mai tura a tih tlat avangin an sawi lo a ni. Sawiho duh ila, sawi ho kan chak takzet. Aizawl North II bialtu Dr. Vanlalhlana rawn sawi ang khan, sawiho hi kan chak takmeuh. Tunah sawiho chak em ema rawn insawi leh si; sawiho hunlaia “Rei tak kalphunga kan lo neih tawh a ni a, sawi lo ang” ti tlat bawk si kha chu, sawiho chak tak takte awm dan tur niin ka hre lo.

Chuvangin, He budget tuna kan discuss mek hi a tha thawkhat hlein ka hria a. ZPM-in kan inthlan hmaa kan intiam tam takte pawh tihhlawhtlin anih ngei ka beisei. Ka lawm e.

SPEAKER : A lawmawm e. Tunah kan Opp. Leader sawm ila, a zawhah kan Finance Minister, kan House Leader kan sawm dawn nia.

PU LALCHHANDAMA RALTE, OPP. LEADER: Pu Speaker, ka lawm e. Hei March Ni 4, (kar hmasa thawhlehi) a kan Chief Minister zahawm takin Budget 2025-2026 a pharh sawi hona kan han nei thei hi a lawmawm ka ti a. Kan budget pumpui hi ₹15,198.78 crore a nih thu te kan hmu a, a hmanna tura ruahmanna hrang hrangte, a hmuh leh a hman dan turte tarlanna a ni a. Thu hrang hrang kan han ngaithlakah khan thu-inchuh te pawh kan nei a, tuna kan ngaihtlak tak ang khan Supplementary Demand pawh kha, Pu Speaker, sawiho kan chak viau a, amaherawhchu, Opp. Leader ka nihna angin he House-ah tradition mumal tak kum 50 chuang an lo neih tawh angin sawiho loh nise, sum kal liam tawh, parliament leh State dangah pawh an practice lutuk loh a nih avangin, chutianga kalphung pangngai convention a kal hi he House tan a tha ang a tih avangin, keimah zawk hian LoP ka nihna angin ka keng a. Amaherawhchu, zawhna zawhfiah duh tan a neih theih e kan ti a, 'hei hi chu a nih phung pangngaiin i kal ang' ka tih kha, indem tur a awm lo a. Tradition helaia kan hman thin pangngai angin he House zahawmna tur atana kalpui a tul kan tih avanga sawi ka ni.

Tin, kan sorkar hrawnlai mek hi sum enkawl chungchangah hian 'a thiam, a thiam lo' tih hi Pu Speaker, i dinglam leh i veilam ten kan thlirna tlang leh lehkhabu pakhat chhiar theuh-theuh pawhin kan hmuh leh kan hriat atanga kan thlirna dan te a dang lo thei lo a. Kan sorkar hi financial management pawh thiam viau niin i dinglama thute'n an sawi a, mahse, a lanna-tlang dang atang chuan an thiam lo viau mai a, an insawi ang an ni lo tih hi kei pawh ka hmuh dan a ni a.

Tuna kan Financial Year kallai 2024-2025 pawh hi Year of Consolidation - sum inrenchem nan, insawhngheh nan tiin tiin kan sum dinhmun siamthat an tum viau a. Fiscal perimeter hrang hrangte pawh an hmang a. Khatianga an tih chuan kan leiba te pawh tlahniam viau leh, kan sum dinhmun te pawh tho kang awkna tur, rahbi rem han rahna turah kan ngai a. Hei, financial year khat an liam dawn a, vawiina actual kan hmuhah hian kum kal ta 2023-2024-a kan ba kha ₹10,282.26 crore a ni a. Tunah hian kan bat zat tur awm hi ₹13,038.8 crore a ni. 'Year of consolidation' tichungin ₹ 948.5 crore-in kan leiba a rawn pung tlat hi, sum hmang thiam viau an ni em?

Tin, kum lo kal leh tur budget kan han pharh tak 2025-2026 ah hian kan leiba tura chhut hi ₹13,999 crore a ni a. Vawiina kan pass tur hi a han kal meuha RE te a han zawh chuan, he sorkarin kum 2 budget an pharhah hian ₹2000 crore velin leiba a pung dawn niin a lang a ni. Chuvangin, he sorkar hi sum enkawl thiam tak chu a ni lo ang tih hi, kei chuan ka hmuh dan a ni.

A dawt lehah chuan, Pu Speaker, kan Finance Minister-in BE a rawn tarlanah khan kum kallai 2024-2025 BE leh kumthar BE tur kha a rawn khaikhin a. Khaikhin awm tak pawh a nih rualin RE-a kan sum hman tur dik tak a lo lan tawh laia, a hlui zawk teh nan a hmang tlat mai hian lan-mawi tumna leh keimahni helai House chhunga mite ngei pawh inbum kan tumna a ni em; Zoram-mipuite pawh hi kan bum deuh em aw, ka ti a. A tehfung tur parameter awm renga, February thla chho vela sum beisei tur tarlan a ni tlat laia kha, lan mawi tumna a kaw em?

A dawt lehah chuan, kan Finance Minister speech para 52-ah khan ZPM-sorkar flagship - Bana kaih scheme ah khan ₹350 crore dah a nih thu a rawn tarlang a, a lawmawm khawp mai a; ₹350 crore zet kan han dah thei hi. Kum kallai (nikum ti tawh ila) ah hian ₹200 crore kan dah 50-a pung hi a lawmawm a ni. Chutih rual chuan, MNF sorkar liam ta khan SEDP sum ₹150 crore a la dah, hman hman loh kha kha he sorkar hian a chhawm a. ₹40 crore chu healthcare scheme-ah hmangin, ₹110 crore chu agriculture lama Agriculture Marketing Assurance Fund-ah a dah a. He House-ah hian nikumah pawh dawhkan kan ben dar dar, 'nithum chhungin D-A-H kan ti thei e' an tiha kha. ₹110 crore zet kum hmasa lama hman anih loh avang khan kut-hnathawkte hamthatna lam hawi zawngin sorkar hian tun kum kal laiah sum hman tur a ngah viau turah kan ngai a.

Tin, mak em em mai chu, Pu Speaker, hetiang anih lai hian sorkar kum kallai meka kan Head of Account-ah hian 2024-25 ah hian, BE emaw, RE emaw ah hian kha crore 110 kha hmuh a har khawp mai a. Tin, 2025-26 BE-ah pawh hian hmuh tur a vang dawn a ni. Crore 110 kha khawi head-ah nge an dah tak? Chumi hmanga hnathawhna, sawhthing an leina tur lah chu an ba ten-tun mai si a, hmunphiah lah lei reng reng a awm si lova, Zoram hmun tinah kan mangang em em mai si a. Tin, thil dang lei tura kan tih hmarcha te, aieng te pawh an lei tur thawm hriat tur a awm lo khawp mai. Zoram kut-hnathawktute an rum a, an tap a ni. 'Sum chu a awm' an ti bawk si a, khawiah nge an dah, tih kha ka zawhna a ni.

A dawt lehah chuan Pu Speaker, state sum dehchhuah tehna GSDP (Gross State Domestic Product) estimate chungchangah khan, kan sorkar hian kalphung thar, a tehna perimeter thar kan hmang dawn, an ti a. A figure chungchangah te pawh 'sorkar kal tawh ten a date leh fugure dik tawk lo an hmang a ni' tiin, a tha ber, a fel ber niawm tak khan an rawn insawi a. An huaisenna te pawh a thatna a awm a ni mai thei e; engnge dik dawn ka hre lova. Amaherawhchu, GSDP estimate hi central statistic kaihhruaina hnuaia tih thin kha a niin ka hria a. Kuminah hian hetia GSDP tehfung thar kan han siam hi, hmun danga tehkhawng an hman nen hian a inang reng em? India ram pumah economic survey te nakinah lo chhuak ta se, kan tehna hian a tha zawngin nge min nghawng anga, a thalo zawngin? Thil thar han tih hi a huaisen thlak rualin, engnge chu chuan rah a chhuah dawn, tih kha ka zawhna a ni tel a ni.

A dawt lehah chuan Pu Speaker, sorkar kum kal laiah hian kan sum leh pai enkawl dan a fel tawk lo hle kan tihna chu, revenue deficit kan nei tlat mai hi. Sorkar hian revenue deficit hi a nei khat em em a. Covid vanglai, 2021-a MNF sorkar lai khan crore 3000 vel central atanga kan hmuh tur leh state-own tax revenue tur a lo lut loh avanga kan hmuh loh khan, revenue deficit kan nei a ni. A hnua revenue deficit awm tawh loh hnua kumina a han awm tlat hi! 'Pawisa kan chhuah hnem' tia insawi mawi kan tumna te kha; dik tak chuan revenue deficit kan neih phah a, khangte kha a chhuanawmna chin a awm rualin, a lehlamah sorkar hian sum management-ah fail-na lian tak a awm tel a. Hei hi hun lo kal leh turah tun kuma kan budget pharhah hian siamthat hret hret kan tum ka beisei a ni.

Pu Speaker, a tawpna atan chuan, vawiinah hian i dinglama member thenkhat thusawi te kha, an bial mipui ten an lo ngaithla ang a, engtin nge an rilruah a thawh ang aw, ka ti a. (**Speaker:** Tikhan minute 8-a warning a ni a; i sawi chhunzawm thei e.) Para 9-na ah khan buhfai man ₹15/- atangin ₹30/-ah a han pung a, chumi avanga revenue kan hmuh crore 20 ha hipa kan han lawm kha, lawmna tur a ni em maw ni le? Miretheite pawisa kan chhuh saka avanga mittui tla chung a awm kan han lawm thei hi mak ka ti a ni.

A dawt lehah chuan, oil man kan han tipung a, diesel leh petrol ₹5/- atangin ₹7/- in an han tipung a, a chumi avanga sumo fare te, dawr-bungraw phurhna man te, an buh phurh chhuahna zawng zawng te a to a, engkim mai an to a, miretheite'n an tuar a. Chu chang a ni lo, stamp duty a let hnih (200%) in kan han tipung a, miretheite kan rawk chungka kan lawm thei hi mak ka ti a ni. Amosa 2:7-ah 'Miretheite lu chungka vaivut takngial pawh...' tih te kha ka thinlungah a lang deuh uai uai mai a. Lawmna tur in zawna kawngah hian in bial mipuite an lawm ang em le? Heti lo zawng deuh te pawh hian sorkarin sum leh pai tuakna turin hma a lo la a nih pawhin, he House ah hi chuan miretheite tawrhna tur hi chu lawmthu sawina chi ah ka ngai lo a ni.

A dawt leh ah chuan, kan Finance Minister thusawi point 8-naah khan healthcare scheme, Universal Health Care Scheme kha 1st April, 2025 atangin kalpui tum anih thu a rawn sawi a. Nikum April velah khan an tum tawh a, August – September ah chuan an tum a 'su' kha, a 'se' tawh a. Hei, kumin budget speech-ah hian a awm leh a, an ti leh thei ang em, tih kha ka rilruah a awm a ni.

Private Hospital, Non-government Hospital Association te hian sorkar nena an indawrna cashless hi an pawm tawh em? Sorkar hospital aiin private-ah tunah chuan inenkawlina hmun a tam tawh a; heng hi in be tawh em? Budget Speech-ah in dah si a, hei hi mipuiin kan judge-na tur che u a ni. Hei hi kan House Leader-in min sawifiah sak se ka duh khawp mai.

Pu Speaker, budget allocation han en hian ka department chan hlui leh ka ngaih pawimawh a nih piah lamah, kan ram tan a pawimawh nia ka hriat education budget hi kumina a tlakhniamna a sang em em a, ₹30,000 lakh chuangin kuminah hian education budget hi a tlakhniam dawn a ni. Hei hian ka rilruah zawhna lian tak a awmtir a. Education-a zirtirtu indaih lo lak belh te, sikul upgradation te, SSA zirtirtu dah ngheh te leh building siam tur tam tak te hi kumin kan budget-ah hian an tel ve lo a ni; Education tan hian. Hei hi engnge a chhan tih ka zawh duh bawk a. Kan House Leader khan a khawnpui-ah pawisa a dah hnem deuh a. Education te hi chu mihring mihringa min chhuahtu a nih avangin lo duhsak thei hram se ka duh a.

Tin, Higher & Technical chan tuna kan RE han en hian, ₹50 crore velin a tlakhniam tlat mai a. State University Bill kan passed zo a; vawinniah pawh a indaih loh laia, vaibelchhe sawmnga vela a han tlakhniam hian kan bill passed zawh hlim han bawhzuina pawh a huphurhawm a ni. Tin, heng avang hian he House zahawmna pawh hi a tlakhniam ka hlau a. Kan hotupa ber hian a khawnpui atang khan Higher & Technical ah te pawh hian han dah belh se, he House-in lungrual taka University Bill kan passed te pawh kha a tih hlawhtlin chhoh nan a tangkai dawn a ni.

A tawpna atan chuan, kan budget pumpuiah hian kan CMO hian 34.57 a chang a, a lawmawm a. A fual lei leh mawmawhna ah an han bel chhoh turah ka ngai a. Heng kawngah hian kan ram-in, kan hnam-in a eng hi nge uar ngai ang? Nimin lawka kan debate-ah te pawh a bik takin kan ram natna ruihhlo kaihhnawiha thawktu excise force tihchak ngai kan tih lam te pawh hi han nawr na deuh ila a tha awm mang e ka ti a.

Tichuan, Pu Speaker, kan House Leader kaihhruaina hnuaiah kan sum neih ang te kan ruahmanna ₹15198.76 crore hi a hmanna tur dik taka hman a nih theihna turin duhsakna ka hlan e. Ka lawm e.

SPEAKER : A lawmawm e. Annual Budget for the Year 2025-26 chu kan sawiho zo ta a. Tunah chuan kan CM zahawm tak, kan Finance Minister ni bawkin rawn windup sela; ilo sawm ang u.

PU LALDUHOMA, CHIEF MINISTER: Pu Speaker, ka lawm e. Hei, mi 23 in kan sawiin ka hria a, a ngaihnaawm hlawm khawp mai a. Thahnemngai takin ram tan kan sawi vek niin ka hria a, a sawitute zawng zawng chungah lawmthu ka sawi a ni.

Kan hriat ang khan, Pu Speaker, nakum 2025-26-a kan budget thar tur hi ₹786.62 crore-in a pung ve dawn a, a punna hi 5.45% a ni dawn a ni.

Tichuan, thil thar langsar zual ber GSDP atangin tan ila. GSDP final hi kum 2021-22 chin kha hriat a ni tawh a, kum 2022-23 final figure hi kum August-ah kan hre chauh dawn a ni. Chuvang chuan, a final figure hriat hun hi a tlai raih thin a, kan lo estimate fuh leh fuh loh pawh kan thlirlet hman tawh mang thin lo a, kum a lo ral tawh viau hman thin avang hian. Amaherawhchu, chiang taka kan hmuh chu, kan ram kalphung hluih chuan GSDP hi a tam thei ang berin kan dah thin a, budget estimate-ah te hian kan dah hnem em em a. Budget Session-ah sawi a tinuam a, Revise Estimate-ah meuh chuan kum khat chhung pawh hian a lo phai leh duk tawh thin a. Tichuan, nichina kan ngaihthlak tawh ang khan, kan estimate leh a actual te chu a crore sing bi in a intamhleih ta thin a ni.

Helai kan budget session-a, ‘heti zat hi kan GSDP a ni’ tia mipuia kan sawi kha, a tak takah chuan crore sing biin a lo tlem leh daih zel si a, hei tluka mipui bumna rapthlak hi a awm chuang lo a ni. Chuvangin, “keini chuan kan nih ang angin ilang ngam ang; tehna chi hrang hrangah kan bat te tisang dawnin lang mah sela, kan fiscal te tisang dawn mah sela, kan puk theih chin pawh tihnam dawn pawh ni se, figure diktak i nei ang” kan ti a. Kan ram mipui hma leh khawvel hmaah pawh sawlama kan thut laia kan lo au kan lo au ve tawh, chhiarkawp dik pho chhuak theia kan awm ta hi kan lawm hle a ni.

Tichuan, tunah hian, kumin BE kha chu chhiarkawp awmsa ringin kan ti ve lo thei lova, kan siamtha hman lova, RE ah hian kan siamtha hman ta a. Tichuan, kan GSDP chu ₹14034. 25 crore in a lo hniam ta dawr mai a ni. Kan hniam ngam a ni, heti zat hian. Amaherawh chu, tuna figure dika kan tih avang hian tuna kan pass tur kum thar budget lo awm turah chuan heta tang hian kan tang chho ve tawh dawn a, ₹2085. 55crore-in a pung chho ve leh ang a, a punna chu 6.13% a ni ve thung dawn a ni. Tin, kan growth rate hi 2011-12 kha a base-year a ni daih a, chuta tanga teh chuan tun kum kal laia 10.05% hi tun kum tharah hi chuan 10.21% ah kan growth rate pawh hi sang chho tawh turah kan ngai a ni.

Tichuan, kan fiscal deficit kha kan sawi nasa viau mai a. Hei pawh hi chhiarkawp diklo kan hman thin avangin fiscal deficit nei manglo tur angin Budget Session ah chuan sorkar hmasa kha an insawi thin a, mipui hmaah chutiang chuan an lang fo a ni. Kum a han tawpa, actual a lo thlen meuh chuan an fiscal deficit kha a lo sang leh em em zel a, kumtharah an chhut hniam leh a. Khati hrim hrim khan kan kal a. Chuvang chuan, BE aia RE sang leh duai thin a crore sang tela kan fiscal deficit danglam dawr dawr thin kha keini chuan pumpelh kan duh tawh a ni. Chuvangin, tunah hianin kan nihna ang takin kan lang ta a ni.

Tichuan, kum kallaia kan RE ah hian kan fiscal deficit hi crore 2,596.75 a nih laiin, tuna kan passed turah hi chuan crore 1,651.68 in a lo tlahniam tawh dawn a, crore 945.07 in

kan fiscal deficit amount a tlahniam dawn a ni, kum thar budget ah hian. Chu chu figure thil a ni a, inhnial chi ah pawh ka ngai lo a. Amaherawhchu, kan sum indaihlohna kan titem duai chung hian GSDP atanga teha a percentage erawh chu a sang ta a ni. A chhan chu, tuna kan budget thar turah hian -4.57% a ni dawn a. Hei hi a sang tak tak a ni lo; a tlahniam duai a ni. Crore 900 chuangin a tlahniam a ni. Mahse GSDP atanga teh chuan a hma ai khan a sang ta tlat a ni. Engvang nge kan tih chuan, kan tehna GSDP kha a taka kan hmana, kan tihlem avangin; kan tehna hmanrua kha a tlem miao avangin, a percentage pawh kha khata tanga teh a nih avangin, a lo lang sang ve ta thung a ni. Chu chu kan hriatthiam ka beisei a. Hei pawh hi Mizoram mipuite tan thil thar a ni a, amaherawhchu, mi tam takin an hriatthiam ka ring a. Tun atang chuan a dikin kan kalchho tawh dawn a ni.

Tichuan, kan leibat zat hi GSDP atang bawka teh a ni a, tuna kumthara kan leibat zat tur hi 38.80% a ni dawn a ni. Chu chu a hmaa tun kum kallai RE-a 38.32% ai chuan a sang hret dawn a ni. Engvang nge kan tih chuan, GSDP nghawng bawka kha a ni leh ta a ni. A tak takah chuan Pu Speaker, vawiinah hian kan outstanding liability, kan leibat hi kum khat chhungin crore ₹1003.94 in kan tihnam a ni. Nichinah khan kan member thenkhatte khan, “slogan mai mai a ni; leibat kan tihnam in ti a, tak takah a hniam lo; au hla a ni” min ti a. “Kum khat chhungin crore sang chuanga kan leiba kan tihnam hi au-hla mai mai a ni lo, a tak a ni e”, tih kha ka sawi duh a ni. Heng te hi kan inhrilh hle chungin kan lawm ve em em a.

Tichuan, kan internal debt pawh hi he kum thar budget turah hian crore ₹1,482 zetin a tlem dawn a ni. Hei hi engvang nge kan tih chuan, “kan puk te pawh, pawng puk lo ila; kan hman khawp a awm hi chuan, duh leh a tla chawpin puk belh mai ila. Puk vak vaka hman zawh leh si loh, a pung pek reng ngai, sorkar lo awm leh tur te’na an rulh leh tur lo bat pun vak vak hi a tih loh theih dan i ngaihtuah ang. Tin, pawisa kan puk dawn a nih rau rau chuan, a pung tlem chi; a pung awm lo te erawh hi chu theih ang tawka tam puk i tum thung ang,” tih kha kan kal dan a ni a.

Tichuan, tunah hian kan liability an san tak awkna chhan te pawh kan sawi tawh a. Thil kan lo bat tlingkhawm te kha tam tak kan rulh te a lo ngai a. Tichuan, RBI statement hi a lo chhuak thin a, hei hi tumahin kan bum thei lo. Helaiyah hian, kum tam tak chhung khan lo inham pur hle thin mah ila, RBI statement a lo chhuah meuh hi chuan, a dik hi a lo chhuak leh thin a ni. Chuvangin, tuna GSDP hman hi chu ‘ARIMA Forecasting Method’ a ni a, growth rate base-a GSDP flow nena inmila tura kan siam a ni a. A chiah-chiah chuan a theih dawn loh; RBI statement te pawh a lo chhuak ang a, a danglam nasa tawh lo turah kan ngai a. Chu bakah, kan bat te pawh hi RBI statement-ah chuan a lo lang tam dawn a ni. A figure a percentage-a chhutnaah chuan a lo lang tam dawn a ni. Hei hi ka sawi sa duh – ‘a percentage-in lo sang zawk mahse, kan bat tak tak chu a tlahniam a ni’ tih hi kan thilungah a Chiang tho a, inthiamlohna kan nei chuang lo. A tak ram kha keini chuan kan duh a ni a.

Tin, NSSF hi kan puk ngai tawh lova. Amaherawhchu, Sorkar hmasa te’na an lo puk tawh a hi tunah hian crore za tel rulh sak tur kan nei a ni. Chutiang chuan, keiniin pek tlem tum ngawt mah ila, lo puk tawha kha kan rulh ve zel a ngai a. Tun hma kha chuan heng kan outstanding liability te pawh hi budget pass lai hi chuan a tam vak ngai reng reng lo a ni. Bat tam loh dan kha kan hotu hmasate khan an thiam riau. GSDP atanga teh pawhin ba tam vak lo tur anga lan dan kha an thiam riau. Keini erawh chuan kan bat tak tak tur kan

rawn pho chhuak a ni. Vawiinnia ba tlem dawn awm deuha lo lana, nakum tun ang huna tam tak bat leh si thina kha, mahni leh mahni inbum kha kan duh ve lo a ni. Chuvang chuan, ‘a dik hi i ngaina teh ang’ kan ti a ni.

Tin, kan punna, a lawmawm lampang te han sawi leh ta ila. Devolution hi kumin hian kan beisei aia tam kan hmu a, 16.61% ngawta rawn pung hi kan lawm hle a. Tin, kum tam tak chhung khan kan budget atanga 10% pawh hi kan thawkchhuak ve lo tih kha kan hruiatute khan min hrilh zing khawp mai. Vawinah chuan, tan kan han la ve tauh-tauh a, keimahni ram chhung tax atanga kan hmuh leh non-tax atanga kan hmuh belhkhawm hi kan budget pumpui atangin 17.21% a lo tling ve ta a ni. Hei hi achievement ropui tak a ni. A chhan chu, kum tam tak chu “chawmhlawm, Delhi drip khaia nung kan ni,” tihna hnuaiah kan lo awm a, ‘10% pawh kan tum ve thei lo’ kan tih fo laiin tunah hi chuan 17% kan total pumpui atangin a ni a. Kan revenue receipt atanga kan chhut phei chuan 20.21% a tling daih a ni. Tin, Loans and Advances-ah hian kan lak tam ber chu SASCI a ni a. Tipa bialtu khan ‘Delhi lamah hian engmah hi in tithei si lova’ a ti a, min khawngaih viau khan ka hria a. Amaherawhchu, kan dawng tha ve phian mai chu a nih hi.

Loans and Advances ah hian SASCI leh thil dang atangin crore 251 chuang kan dawng a, tun budget-a rawn lang hman ta lo hi kan sawi ang e. Tun budget kan tih hnua kan dawn leh tunhnai tea kan dawn hi SASCI Part-XIII hnuaiah hian crore 97.50 min approve sak tawh a. Hmanniah ka sawi a, ka sawi nawn leh duh chu, duhsak zual State 3-te an pek niin a lang. Pakhatnaah chuan, Rajasthan - kum kha leh chen Congress Sorkarna lo ni ngar ngar BJP-in an chhuhsak ta a, lawmmanah an pe a ang viau a ni. A dang lehah chuan, Andhra Pradesh - Chandra Babu Naidu-a Chief Minister-na; ani hi a lungawi loh phawt chuan Central Sorkar chu tla mai tur a ni a, chuvang chuan ‘ani chu kan pek tam a ngai’ an ti a, an pe ta a. State 3 chiah an pe a, a 3-na kan ni tlat mai.

Tin, kan Member te zingah hian Central lama ruling ho hi tam thei ang ber chhawr kan duh a, anni phei chuan kan budget allocation chhung ami nilo hi dil chhuak thei se kan duh khawp mai a. An dil dawn hian, ‘DO min ziahsak rawh’ an ti ziah mai bawk a, kan DO ziah te hi a pawimawh ve chu a nih hmel e. Nichin lawkah pawh khan pakhat ka sign a nia aw. Tichuan, part I additional ah hian ₹275 crore kan beisei mek a, Part I Cyclone Remal-ah ₹137.50 crore min approve sak tawh bawk a. Part V reforms 3 ah ₹100 crore, hei pawh hi State paruk chauhin an dawng a ni, India ramah hian. Chungte chu - Andhra Pradesh, Sikkim, Manipur, Himachal leh Chattishgarh te an ni. SNA Spurs hi nimin khan kan thawnthlain ka hria a, (ka hresual maithei a) kan onboard fel tawh a. Hetah hian a zat chiah kan sawi thei lo a, ₹250-500 crore inkar kan beisei a ni.

Tichuan, hand-holding alo pung ta a. Hei hi D-A-H kal zel kha a ni a, lo buai tur a ni lo a. Hei hian thlathar leina turte leh ‘Chief Minister - special package’ kan tih te, loan component kan tih te, khang zawng zawng kha a rawn huam vek dawn a. A tula mamawh belh a awm chuan, kan dah belh thei zel ang. A punna hi 75% a ni a, kum khat chhunga a punna atan chuan a sang el-awl hle a ni. A awmzia chu, khang loan component leh special package te kha, kumin chu pilot project lek angin kan ti a, a kum hnihnaah chuan tih tam tawh kan tum tihna a ni a, a kum thumnaah tikhan tihtam chhoh zel kan tum a. Finance Commission nena kan inbiakna leh hmanna NITI Aayog hotupa a lo kala kan inkawmnaah chuan, he kan hand-holding atan hian eng emaw zat pekbelh min tiam a ni. Chu chu

kan bawhzui turah kan ngai a, helaia lo dahlawk teuh pawh hi a tullo maithei, tihna rilru nen kan awm a.

Tin, punna dang la awm leh chu, General Services hi a ni. Kan leibat te, kan puk te kan han ti tlema ba lo awm tawh te kan han rul hle chungin, kan budget kha inlo en chuan General Services ah chuan 14.95% in a pung tih kan hmu ang a. Economic Services ah 7.27% in a pung a, Capital Expenditure pawh 80.29% in a pung a ni. Kan member thenkhatte khan a pung lo angin an han sawi lek lek a. A bu hi enchiang ila, tah chuan a pun leh pun loh chu a chiang mai. Tin, Revenue Expenditure kan vei tlang a, kan sawi nual bawk a. ‘Engatinge kan Revenue Expenditure hi tiang anga a lo awm tak’ kan ti a. Kan sum indaihlohna a lo zual ta a ni, tun kum kallai chhung hian. A chhan chu, kan sorkar hnathawk DA pung 4% kan pekna ringawtah pawh khan crore 39.19 a kal ral a ni. Chu chu budget kan hmuh laia kan hmuh lawk hauh loh kan hman belh lo ngai ta a ni a.

Tin, kan Autonomous District Council-a kan MDC te, kan EM te, kan Chairman te an hlawh kan tipung vek a. Tin, Lunglei Municipal Council leh AMC-a kan Co-operator te hlawh pawh kan tipung a, khang khan a belchhah loh theih lo a. Tichuan, minus angin kan han lang ta a. Tichuan, MR bill kan pek thu kan sawi ngun tawh a, Cyclone Remal vanging kan hriatlawk loh in tam tak kan seng bawk a, Police DA kumtam tak hrenbeh tawh pawh kan chhuah bawk a, pension te crore sang chuang kan chhuah a ni. Khang khan Revenue Expenditure hnuaihan expenditure a tihsan avangin, kan sum indaihlohna a minus-a kha arawn tising ta a ni. Chu chu kan hrethiam turah ka ngai. Chutiang chu a ni a; sawi tur a tam a.

Amaherawhchu, heng hi tunhma lam thilte kan lo clear-na leh, khatiang a nih avangin he kumtharah hi chuan tun financial year kal mek BE atanga kan RE kha danglam tain lang mah sela, tuna kan pass turah hi chuan kan surplus leh tho dawn a ni, crore 562.90 tun kumthar budget ah hian surplus kan nei leh nghal dawn a ni. Tichuan, kan kiamna te kha, deficit grant hi tunah hian state paruk chauhin kan dawng tawh a. Kan member pakhat khan kan dawng tlem bik viau ang khan arawn sawi a. Hei hi kumin aiin nakumah kan dawng tlem leh dawn a, a tawpah a la zero dawn a ni. Heihi chu, tupawh sorkar ila an tihdan tur hrim hrim a ni a. A la dawng State paruk zingah kan la tel hram hram hi chu a lawmawm a. Hmanniah pawh khan, “heih chu, ‘kan remna leh muanna thuthlung - special category angin kan enkawl zel ang che u’ in ti anih kha,” tih pawh kan lo hrilh a ni.

Tichuan, Backward Region Grant Fund kan budget-a lang ve reng si kha, kan hmu ngai ta miah lo a, khang kha a kiamna a ni ta a. Tichuan kan Rural Local Body hi crore 2 in a tlem ta bawk a, hei hi a pawl khawp mai a; kan village council te kan enkawl na tur a ni a. Chuvang chuan, 16th Finance Commission-ah khan uar taka ziakin, tha takin kan thehlut a, tawngkam pawhin kan bawhzui a. “Heih chu minrawn tihpun sak leh ngei-gei rawh u,” kan ti a. Chuvang chuan, minrawn pek pun leh te pawh kan beisei a ni.

Tin, kan CSS leh kan Social Services Sector lo tlakhniamna chhan kha kan sawi nasa viau mai a. Heih hi 2023-2024 sorkar hmasa hunah khan Samagra hi an zuk sawichhuak zo lo ni maw ka ti mai a, an dawng tlat lo mai a ni. An dawn theih loh crore 274 lai mai kha tun kum kal laiah hian kan dawng hlauh mai a, chu chuan arawn tising ta ur mai a ni, kan social service sector ami kha.

Tunah chuan, kumin kal laia tana kan lo dahsa leh kum hmasa ami an hmuh loh kan hmuh thar nen khan tun kum kal laia kan sum hmuh kha Samagra ah hian a sang ta thur mai a, kha kha chu kumhnih ta kumkhata kan dawn vang a ni a, tun kum tharah hi chuan a tlem leh lo theilo a ni. Kum thar ami tur kan dawn leh dawn avangin tunah hian crore 110 kan dawng dawn; ‘dawng dawn’ ti mai ila, kan dah a ni. Kha kha anih avang khan, he kum kallai leh kum thar lo awm tura kan dawn zat a inan tak loh avangin, kan dawn double khan lo hniam ta angin kan social service sector hi a lang mai a ni a, sector dangah tlakhniamna kan nei lova. Tichuan, kuminah hi chuan crore 164 velin a lo hniam dawn ta tihna a ni.

Tin, kan public account liability te pawh nasa takin a lo hniam ve ta a, sorkar-hnathawkte hlawh a hunah kan inpe thei hram hram hi lawmawm kan ti a ni. Tin, tlema hlawh tlem ho (i ti mai ang) hi tunah hian a dawng tlaiah an la tang a, ka hnenah hian an rawn sawi mai thin a. Chu chu kan department ho zawng-zawng pawhin an lo hriat atana ka duh chu, eng department-ah pawh hian a hniam lampang welfare hi kan lo ngaihsak tawh lo deuh hret niin ka hria. Hlawh an lak tlai pawhin hetah a senior-te chuan an la mai a, an naute’n an lak tlai khan mut mawh hnar mawhah an nei vak lo em maw ni aw, ka ti. Tunah hi chuan tun hmaa department zawng zawngin Finance Department an kawh rawn a, ‘Finance Department tih khawtlai; chuti khati an pending’ an ti a. Vawiinah chuan, a lehlingin Finance department hian department te hi ‘rawn ti thuai thuai rawh u; in muang’ tiin kan leh nawr tawh a ni. Chuvang chuan, nau te hlawh la lo an awm tur a ni lo.

Central atanga hlawh la, an account-a direct-a lut hi chu tihngaihna a awmlo, a lo thlen tlai chuan. An account ah a lut miao a; an rawn tih tlai chuan kan mawh pawh a ni lova; an la tlai a ni mai. Amaherawhchu, khatiang nilo chi central atanga an rawn pe tlai a nih chuan, ‘rawn sawi ula, rawn thehlut hma ula, keimahni state sumin kan lo pe lailawk mai ang’ kan ti a, advance a pek tur kan ruahman a ni. Tichuan, central ami a lo thlen huna rul leh mai tura adjust turin kan ti a ni. Nizan lamah khan wildlife sanctuary a thawk ten ‘thla 4 hlawh kan la tawh lo’ an rawn ti leh a, engatinge ni aw ka ti a, kan han zawt Chiang a. ‘Integrated wildlife habitat’ tih hnuaiah 2nd installment an lo la dawnglo a lo ni a. Tichuan, Forest Department hian an saving neih ang ang lakhawmin tun thla hian pek vek hman an tum a ni.

Amaherawhchu, hetiang hi, department-ah hian a thenin a hlawh la, ngaihsaktu leh sawipuitu nei thalo deuh tena hlawh an lak tlai hi thleng tawh lo se ka duh khawp mai. Mizo dan leh a nihna takah chuan, ‘kan nau te hian la hmasa sela, keiin la tlai ila’ tih hi kan tihdan zawk tur tak a ni a. Chuvangin, kan sumin a daihlo emaw, central atangin kan grant a lo la thleng lo emaw a nih pawhin, finance ah rawn sawi se la, rawn ti hmasa sela; ‘rawn ti rawh u; in muang’ va tih va tih ngailo hian; tichuan, keiniin advance-a lo pek dan te kan lo ngaihtuah ang a. Pawisa kan neih loh chuan kan thei kherlo ang a; a tlangpui thuiin kan nei ve thei turah te inngai ila. Tiang tur chuan kan inbuatsaih dawn a ni.

Awle, Pu Speaker, kha kha a tlangpuia kan sawi duh tawh ni selangin. Kan member te point han sawichhuah ho kha a vaiin ka react dawn lova. A minister concerned ten demand discussion hunah an rawn khawih chho mai turah ka ngai deuh a. Amaherawhchu, a pawimawh zual kan han ti ang a.

Pu RM Chakma, Tuichawng bialtu MLA zahawm tak khan austerity measures chungchang a rawn vei a, a lawmawm a. Tunah hian kum kal mek anga kum tharah chuan austerity

measures lak vak chu kan tum tawh lo a ni. Amaherawhchu, la kalpui zel chu kan tum; a theih chen-chenah inrenchem hi chu kan tih tur a ni.

Tin, District Council thenkhat ten hlawh lak tur nei dawn lo awm anga rawn hlauhthawnpuina kha, a awmzia chu - District Council-ah hian keiniin kan duh zat zat pawisa kan pe theilo; 2nd Mizoram Finance Commission recommendation angin kan kal a ni. Chu mite'n, 'pe rawh u' an tihzat apiang chu kan pe mai ang. Chu mite pek zat chu an hmanzawha, hlawh lak tur an neilo a nih chuan, an thu a ni tawh, kha kha chu. An dawn zat tur an hrereng a ni. Chutianga nu leh pain chungkuua pawisa an neihzat hre renga, buhfai leina tur neilo khawpa thil danga an lo hmang a nih chuan, an fate'n an tuar dawn a ni mai. Khatiang deuh hlek khan, 2nd Finance Commission-in a recommend bak hi chu, keini hian tih theih vak kan nei lo a, hemi chungah hian an inkhung a ngai a ni.

Tin, Pu Ramthanmawia, East Tuipui bialtu rawn sawi Revenue Deficit chungchang kha chu nichin khan ka chhangin ka hria a. 'Hei hi kan surplus leh tawh dawn' tiin ka sawi a nih kha.

Tin, member thenkhat khan "keini chuan kan puk ve lovang in ti; loan kan la ve lo ang in ti" min ti vak-vak mai a. Kha kha Pu Speaker, a ziak emaw, a video emaw, a proof-na nei thei se ka duh hle mai. Party ve lem sorkar tumin, 'kan puk ve lo ang; loan kan la ve lovang' tih thu va awm suh. Keini ang State-ah te chuan kan revenue-ah hian engtiklai pawhin puk tur a tel a ni. Amaherawhchu, khatih lai, sorkar hmasa huna kan dinhmun kan sawi a, Pathian-thu atang tein kan sawi a. Pathianin min dahna hmun chu, a mei ni lovin, a lu ni tur kan ni. A hnuaihning ni lovin, a chungnung kan ni tur a ni. Puktu ni lovin, puktir tu tur zawk kan ni. Bible hian, "nangni erawh chuan in puk ve lovang" min ti tih erawh chu, kan sawi thin. "ZPM kan Sorkar hunah chuan kan puk ve lovang; loan kan la ve lovang" kan tih chu ka ring miah lo. Chuvang chuan, thudik tawklo hi chuan ti thin lo ila a thain ka ring a.

Tin, Supplementary Demand kha kan sawi leh vak mai a. Nilai zan inkhawmah thupui sawi hun an hawng a; sawi ngam mang silo, haw hnuah tapchhaka sawi vak kan ang khawpin ka hria. Hei, sorkar kalphung a danglam tak zia chu, tunhma zawng-zawngin opposition atangin Supplementary Demand sawiho (discussion) kan ngen thin a. Sawiho kan chak a, ruling lam khan sawiho an ngam ngai tlat lo mai a ni. 'Engatinge heti zat kan pass loh pawisa hi a lo awm tak' tih kha sawiho kan duh a, an ngam thin lo a ni. Vawiinah chuan keini lamin sawiho kan chak em em a, opposition hovin an ngam tlat lo. Hei hi sorkar kalphung inthlak danglam nasa tak chu a niin ka hria. Kan tanna a inthlak ta tlat mai a. Chuti chung chung chuan rem leh rem lovin, sawi ngam lo nih hrehin, a sawi hun a pelh tawh hnuah vawiinah an han sawi leh hlawm a. 'Supplementary Demand hi engvangin nge a lo tam tak' kan tih chuan, sorkar kal hmasa leiba rulh tur kan nei ngah em a ni. Chu chu a ni mai.

TP Enterprise te, KT Thanga & Sons te, Ganga World tih te - firm pathum lek kum tam tak chhung leiba an lo rulh theih loh pawh kha crore 26 chuang a ni. Hek deuh a sin! Energy bill te, penalty interest te hi sorkar hmasa an hremna man kha keiniin kan chawi ta hlauh si a. Hei, XVth Finance Commission-a penalty interest an chawi hi lakh 71 zet a ni a, District Council & Minority Affairs-ah hian excluded area sum a huna an pek loh (2019-20 kum kha a la ni daih lehngal) lakh 12.33 kan chawi bawk a. Tichuan, MGNREGA-ah hian (an sawrkar lai a mi bawk kha) eng emaw zat kan chawi bawk a. PWD-ah phei hi chuan PMGSY-a an lo bat hi lakh 361.39 kan rulhsak a. Tichuan, ULB Grant a huna an lo

pek loh penalty interest hi UD&PA-ah hian lakh 7.15 kan rulhsak bawk a. Tichuan, Health Grant, XVth Finance Commission-ina a rawn pek, a dawngtu turte an pek mai loh 2021-22 inkar ami, chu chu a hremna hi lakh 247.47 kan chawi bawk a ni. Tiang chu a ni a. A awmzia tak chu, kan hmaa kal te khan an lo palkhu a, keini hi kan hahchhiau ta a ni ber mai.

Tin, Finance-ah sum dah tam tih a ni a. Finance-a sum hi Finance Department hman tur a ni lova. department dangho hman tur vek zawk a ni a; Finance Department chuan an hlawh tur leh tlem chauh an hmang ang. Entirnan, hand-holding han tih te, PMJVK han tih te nakinah a scheme a lo kal ang a, department-a minister theuhin an priority an rawn siam ang a, an insem leh dawn a ni. Finance kha chuan cheng khat mah a chang dawn chuang lo a, khatiang kha ni. Tin, CMO thuam that kan sawi kan sawi a; India ram ah hian CM bungalow emaw, a office emaw hi enchhuak vek ta ula, Mizoram Chief Minister office tluka rethei hi an awm ka ring lo; kan sum sen a tlem ber ka ring.

Amaherawhchu, tunah chuan dashboard te kan neih a ngai ta a, supervision kan tih nasat tawh avangin, review committee department tin te kan neihpui a; ti khan kan kual map map a; tih tak tak a hna kan thawh tawh avangin, staff pawh kan mamawh belh a ni; room pawh kan mamawh belh a ni. Dik tak chuan space a awm miao lo a, a tih theih tawh lo a. Tuna a building saw'n la daih se chuan, hei aia liana CM office chei hi a tul ngawih-ngawih a, chu chu a taka hretu kan ni a. Hetah a mimalah engmah a lut a ni chuang lo; chu chu kan hriat a thain ka ring a.

Tin, Er. Lalzirliana Mamit bialtu zahawm tak khan cess chungchang kha a rawn sawi a. Cess-a kan lak zat kha kan opposition leader pawh khan an rawn sawi a, “₹5/- te an ti a, a thenin ₹7/- te an ti a” a ti a. Petrol leh diesel hi litre ah ₹2/- ve-ve in kan la a ni. Kha kha kan sawi leh pawhin, ₹2/- i ti tawh ang u aw.

PU H. LALZIRLIANA: Pu Speaker, tax difference a rawn kal dan, a cess kha chu litre ah ₹2/-, ₹4/-, kha a ni a. Amaherawhchu, a rate hmasa atanga a increase-na average chu ₹5.11/- te a ni a, Mizoram ah pawh petrol pump hi hmun tinah a rate a in ang lo a, a increase-na laia kha a ni a ka rawn sawi chu.

PU LALDUHOMA, CHIEF MINISTER: Hei hi ‘Delhi khuang ben ruala lam’ kan tih fo a reh theihna turin keimahni kea ding thei tura kan inbuatsaihna a ni a. Chhiah la lo chuan tu sawrkar mah a awm thei lova, chuti chung chuan budget thar turah hian chhiah thar engmah kan la lovin ka hria a. Heng hi mipuite'n kan tel ve a ni tih an hriat nan kan duh tel a ni. A then hi kawng siam nan kan hmang dawn a ni, he cess hi. Kan kawng a chhia kan ti a, mipuiin petrol, diesel kan lei apiangin ‘kan kawng siamthat nan kan thawh tel a ni’ tih an hriat kan duh a ni. Tin, education ah te, dam lo enkawlna turte petrol kan lei apiang hian kan thawh tel a ni tih inhria se kan duh a, thil dang atana hman thiang miah lo a ni.

Tin, Lawngtlai West bialtu khan kha, ‘MLA ten NREGA-a VC chan ai an chhuhsak’ tih kha a rawn sawi a, heti mai chuan khawilai nge tih kan inhrih bawk si lova, ka chhang mai thiam lova. Amaherawhchu, a changtu minister in hei hi chu demand sawi hunah a rawn chhang fel thei turah ngai ta ila. Tin, ‘salary a tlahniam, engatinge’ tih a ni a. Ni e, figure dik hi kan uar a ni keini chuan; nominal role hmangin hlawh hi rawn siam rawh u kan ti a ni. Tunah chuan nominal role hmangin an rawn siam a, chumi hmanga an rawn siam chu an indaih turah kan ngai.

Tin, kan State hnuai bika BE to BE inkarah hian ₹20/- crore velin a pung a, CSS hnuai ah chuan BE to BE ah hian ₹10/- crore velin a tla hniam ta a. A chhan chu, CSS hnuai ah kan dawn thin Samagra kan tih ang chi te, khang dawn tawh loh chhoh zel hi kan nei dawn a, a tawpah phei chuan kan dawng miah dawn lo a ni. ‘CSS hi an hand-holding ve a ni a’, kan tih zawng zawng hi Central hand-holding scheme a ni. State te mahni kea ding thei turin kan bana min kaihna a ni a, kum 10 chhung te, kum 15 te min kai a ni. Chumi hnu chuan, ‘kan kai dawn tawh lo che u; in kein kal tawh rawh u’, min tihna a ni a. Kum tam tak kha inpuahchahna hun kan nei tawh a, tunah hian min han thlah phut se, ding hleithei lo tur department hi kan la nei a ni. NHM te hi withdraw ta thut sela kan Health Department hi a collapse lo ang tih kan sawi thei lo. Chutiang khawp chuan kan lo inbuatsaih lawkna hi a that loh avangin, tun atang tal hian theih tawp kan chhuaha, hei hi a tawp hun hunah mahni kea ding thei tura kan lo inbuatsaih a ngai a ni.

Tin, Siaha bialtu Dr. Beichhua khan Annual Financial Statement (last page) chungchang a rawn zawh kha a lo endik peih hle mai a, a lawmawm khawp mai. 2022-2023 actuals, kha kha a lang nawn palh a ni. (**Speaker:** Pu K. Laldawngliana ni zawk lo maw ni aw?) Pu Beichhua pawhin a sawi. In sawi ve ve a nih chu, lo inchuh suh u. A hnunung zawk kha a dik zawk a ni a. Tin, 2023-24 kha actual tur a ni. Tichuan, Tax Revenue other than GST san chhan kha nikuma awm lo ₹50 crore kha cess atanga kan project avangin a lo awm ta a, kha khan a tisang a ni. Tichuan annual financial statement pheh hnunung bera ‘2024-25 BE’ tih kha, ‘2025-26 BE’ tih zawk tur a ni. Tin, interest receipt hi engatinge a tlem tak, tih te a ni a. A chhan chu, bank interest hi pek lohin a lo awm deuh thin a tunhma lampang khan, a arrear kha a lo tlingkhawm a ni. Chu chu keini sorkar hi chuan interest kan pek tur chu kan pe dawn; ‘i ba loving; kan lo bat pawh hi clear vek ang’ kan ti a ni. Chuvang chuan, khang arrear lo tlingkhawm ho kha kan clear vek tak avangin tunah hian arrear a awm dawn tawh loh avangin, budget tharah hian interest receipt kha a lo tlem tawh dawn a ni. Tichuan, khang thil chhut sual neuh neuha kha computer-a copy/paste avanga lo sual a ni a, website lamah chuan a dik vek tho tih kha ka’n sawi duh a ni.

Tin, Dampa bialtu member zahawm tak khan, ‘Viksik Bharat tinzawnin in kal’ a ti a, kan pha hauh lova. Prime Minister vision a ni a, Prime Minister vision ang hian state tin hi kan kal a ngai a ni. Union Finance Minister-in budget a present ve leh hian a copy hi kan ngaihven vat a, khami ang dung zui khan state tin hi kan kal a ngai. Hetah scheme hranpa lo duang mah ila, khulaia scheme nena kal dun loh chuan a hlawhtling thei chuang lo. Central dung zuia kan kal thiam poh leh kan tan nihlawhna a ni dawn. Chuvang chuan, ‘Viksik Bharat’ kha, ‘Viksik Mizoram’ kan tih ve a ngai a ni.

Tin, card-eng leh card-pawl mai bakah khan card-sen introduce a ni a, mi tam tak hetah hian an lut tawh a ni a. Tichuan, card-var lo nei thin mi tam takin ‘keini chhung chu sorkar-hnathawkte kan lo nei ve tawh a’ tiin, card-pawl a awm te, card-eng a awmte card-var ah anmahni thuin an insawn chho a. Anni aia chhungkaw rethei zawk hmun an kian a, hengte hi ropui kan ti em em a. Tin, chhungkua eng emaw zatin kan card te kan surrender a, keini ho pawh hian kan surrender vekin ka ring a, a lawmawm takzet a ni.

Tin, ‘KAI apps kha eng tawng nge’ tih kha, a hre lo tlat mai a, kan Dampa bialtu khan. Hei hi chu mizo-tawng a ni. Pi Prova-i khan an constituency-a network that loh thu a sawi kha, kan lo chhinchhiah ang, theih tawkin.

Tin, hmunphiah chungchang kha kan sawi a. Hmunphiah hi a hring lei kan intiam ngai lova, a ro tur a ni a; chu pawh chu graded - A leh B a ni tur a ni kan ti a. Kan hmunphiah thartute hian a hringin an hralh deuh vak mai a, a tihrona hmunawl te an nei tha lova, tin, sum te an lo duh hmanhmawh a, kan dem thei hauh lova. Tichuan, a ro awmchhun chhun pawh kha grading an ti lo tlat mai a ni. A lei tura kan tihte khan graded a nih loh chuan an lei thei si lova. A chhan chu, khati khan va lei ringawt se, grade chawp leh kha a ngai a, an tan chuan loss-na a ni. Chuvang chuan, kan farmers te tan hian a grading hi chu a lo har deuh a ni. Nakum lam atang chuan a grading leh rate tur hi siam tawh zawk ila, a leitu turte hian a tihro te pawh hi tum tawh zawk mai sela a tha mai awm mang e, tih te kan ngaihtuah a. A tihdan tha zawk kan ngaihtuah thiam kan beisei a.

Pu Speaker, kan inrawlh pawh a ni lova, a man tlahniam tur vengtu chauh kan ni. Sorkarin a rate kan tuk aia toa lei duh an awm phawt chuan, ‘sorkar chu kan inkuangkua ang’ kan ti a ni; kan tel ve a ngai lo. Amaherawhchu, vai-sumdawng ho inthuralin rate an tih hniam thin avangin ₹80/- leh ₹100/- hi chu a pelh thlak lohna turin, hetiang a nih dawn chuan a ro grade A - ₹100/-, grade B - ₹80/- a lei tur kan dah a ni. Chu chu tun Kumah hian a lei duh an awm tak loh avangin a tlahniam ngei tur a ni a. Awm se chuan, sorkar hian kan buaipui a ngai lo; sorkarin a lei tak tak chiah pawh hi kan tum lo. Amaherawhchu, loh theih lohnain min nan avangin lei tak tak pawh a ngai dawn a ni. An hralh bang chu kan lei vek dawn; a inpawlh sawpin grading siam lovin ₹80/- in kan lei vek dawn.
(interruption)

PU LALRINTLUANGA SAILO: Hmunphiah kha a hringin kan lei lo, Dampa bialah; a bik takin Thorang ah hian a hringin kan hralh ngai lo a ni, kum hei leh chen hi. A grading kha chu khatianga farmers ten siam tur chuan hriatna kha an nei lova, chumi hrihlfiahtu chu an awm baw si lova, wawiin niah hian an mangang hle a ni. Pu Speaker, tunah khuan Safika leh Abdula ten cheng 65/- in an lakhawm a. Kum dang, ZPM sorkar hma chuan tun ang hunah hian cheng 120/- a kai tawh thin a ni. Sorkar hi in inrawlh peih mai mai. A awmzia chu, Pu Speaker, kan CM pawh hian a ngaipawimawhin ka hria a. Hmunphiah chingtu bik hi chu buaipui an ngai lo; tunhma atanga kal danah chuan sorkarin royalty kan lak loh chuan, anmahniin an inbuaipui tha em em a ni. Sorkar a inrawlh hian a buai mai mai a ni.

PU LALDUHOMA, CHIEF MINISTER: Pu Lalrinsanga khan, ‘Advisor te inngah’ a ti a. Ni e, ‘ngah’ kan tih hi a inang lova. Sorkar hmasaa Board Chairman chanve zah pawh kha an la tling lo a sin maw le. Pi Prova-i khan PWD ah pawisa kan dah tlem deuh ti khan a rawn sawi niin ka hria a. Helaia kan thailan hi chu, State sum atanga kawng siamna kan tih a ni a, a-ve lek kan dah a ni. Hei aia tam hi kan la hmu dawn tih kan hriat avangin khang zawng khan kan tilang a ni.

Tin, ‘Tlabung area-ah kawng a chhia’ a ti a; saw saw kan hotu hmasa ten a duh taka an lo appoint contractor ho hnathawh a ni a, a buaithlak khawp mai. Chu chu a rang thei lamin Tlabung area ah sawn monitoring committee rawn tirh kan tum ang a, tichuan MLA te pawhin tawiawm ulangin. Chutah chuan a nawr hmanhmawh dan emaw, action lak a tul a nih chuan, lak dan tur emaw kan ngaihtuah a ngai a ni.

Tin, healthcare chungchangah pawisa kan dah tamna chhan hi ‘wine leh beer inzawrh dawn avangin mi an hrisello dawn’ tih lam kha a ni lova. Tunah hian District Council area ah ‘sap-

zu hi min khap sak suh u' tih khan kan inngen a. sorkar lam pawhin a remchan hunah amendment te pawh kan la ti ang chu kan ti a, kan inhawng viau a. Tunah hian entirnan: sap-zu te, duichuani te rawn khap vek ta ila, distilled ho zawng zawng nen, in thalaite sawn zu chhia an in dawn. Chutah chuan, healthcare-a dah tur chu a pung sawt zawk ang. Kha kha inhlaui niin ka ring a. Tichuan, 'hei hi chu in rawn ti lo mai rawh u' an ti a, kan Minister khan ngaihtuah a tum niin ka hria a. Amaherawhchu, an thlai atanga processing lo tih ve chin tal hi chu District Council-ah sawn kal ve rawh se, huap ve rawh se. Kan farmer te kan duhsak a lawm maw le. Khalai kha chu a la insiamrem theihin ka ring a ni.

Tichuan, roof-top solar energy hi khawpui MLA ten a free in an lo dawng em tih kha kha ka chiang lova, 'thingtlang lamin kan la dawng ve lo' tih kha a ni a; ka hriatsual a ni ang a. Kan dawn chuan khawpui leh thingtlangin kan dawng vek ang; opposition leh ruling in kan dawng dial dial ang kha kha chu.

Tichuan, Pu Robert-a rawn sawi 'UC diklo tih kha han sawifiah lawk ka duh a. UC diklo hi an lo ti thang tawh khawp a, an zawh hmain UC an lo theh lut deuh vek mai thin hi a lo ni a; amah kha hrechiang ber pawl a nih kan ring nghe nghe a. Chu chu Central lam tunah kan han dawr a, 'hei hi rawn ti hmanhmawh rawh u' an tiha, 'UC kan la thehlut thei lo' kan han tih khan, 'kan official te hnenah zawh kher angai hlei nem; rawn thehlut mai rawh u' te an lo ti thin a ni. Khatiang na na na kha chu an ni a dawngtu tur berina an sawisel loh chuan an lo tih ve thin mai chang te pawh a lo awm a ni mahna.

Tin, kan Opposition Leader khan BE leh RE a khaikhin vak vak a. Budget hi kan khai khin dawn tak tak chuan BE to BE, RE to RE, Actual to Actual zel kha kan compare dan tur dik a nih kan ring a. Tin, ₹110 crore an hman zawh hman tak loh nuaih 3-a sem an tum an sem bang (nuaih 3 an sem hnua an sem bang chu a nilo maw kha) kha an hre rei hle mai a. Keini chuan sem hi kan duh lova, thlaithar lei nan kan hmang; Tunah pawh kan hmang teuh tawh. 'Engatinge tun budget-ah a lan loh' kan ti a, tunah engahnge a lan ang? Kum kalta budget a mi kha a ni a, khatah khan Supplementary-ah a lan daih tawh kha. Kha kha hria ilangin. Tichuan, heng kan han tihte hi dahbelh a ngaih chuan kan dah belh zel ang.

Pu Speaker, a tawp nan chuan, kan ram tan hian theihtawp kan chhuaha... (*interruption*)

PU LALCHHANDAM RALTE, OPP. LEADER: Pu Speaker, ka ngaih pawimawh deuh mai pakhat min la hrilh loh chu, Universal Health Care Scheme kha '1st April atangin kan tan ang' tih kha i speech-ah khan a awm a. Kha kha nikum lamah khan kan lo failed tawh a, kuminah hian non-government hospital nen khan in inbe fel tawh em? Kan tan tak tak thei dawn em, Mipui hian an nghakhlel si a?

PU LALDUHOMA, CHIEF MINISTER: Aw le; non-government hospital-te nen ibiak felna kan la nei thei lova. An harsatna chu MNF Sorkar lai khan pawisa puk chawp khan healthcare kha tih a ni a. Tichuan, private hospital leh Synod hospital-te pawh anni vek a. Khatah khan crore 4 chuang an ba ral a ni. Tichuan, khang private hospital ding tir te te doctor hlawh pek ngai, damdawi zawng zawng lei ngai, an intunnunna ve tur khati zat an hmuh tak loh kha chuan hlauhthawnnain an khat ta a ni. Tichuan, hospital-in dawng hek suh, a damlote'n dawng hek suh, crore 4 chuang kha tikhan a thamral ringawt mai a ni. An dinhmunah indah ta ula inngaih a ngam har ve khawp ang. Chumi hnua chuan rei takn an la bat sak zui leh nghal a, "thla khat chhunga kan senso min rulh loh hian kan chhe

hman a ni,” an ti a ni, damdawi-in pawl te phei hi chuan. Chutiang khawp chuan kan mamawh hi a tam si a, sorkarin rei tak tak min batsak phei hi chuan kan tan chuan survive a har lutuk an ti a ni. Chuvangin, ‘nangmahni hi kan ringlo che u pawh a ni lo, thil kal tawha kan thil tawnah chukchu ben thelh ang deuh hian kan awm tawh a, nangni pawh hi rin har kan ti khawp tawh mai che u’ an ti a ni. Chu chu an harsatna a ni a, keini pawhin kan hriatthiampui a.

Amaherawhchu, damlo enkawl nana kan mamawh tur, damlo kum tina kan neih zatah damlo kan neih tam ber kum Covid nasat lai ber kum kha kan la a ni. Chu chu kan la belh ta a ni damlo dangin; a uar thei ang berin kan senso tur pawh kan chhut a, kan sum hmuh tur hi a tlem thei ang berin kan chhut thung a. Chumi hnuah chuan, sorkarin ‘heti zat kan dah belh ang’ kan ti bawk a. Chu pawhin a la daih lo chuan, bank lam hian ‘eng emaw chhiat in lo tawk thut a nih pawhin ni 45 chhung interest awm lovin in lo hmanng dawn nia’ min la ti leh ta a. Tin, a hun chhung kan tiama kan pek loh che u chuan, a penal interest kan chawi ang kan ti bawk a, a sorkar lam chu kan confi khawp mai a. Amaherawh chu, miin thil lo tawn sual tawhte an neiin; hei, kan Vai-hlahna te pawh a reh har em hi. Tunah hian chutiang chu kan dinhmun a ni rih a. Amaherawh chu, eng le khaw le, sorkar hi cashless hian kan kal dawn a, April ni 1 atangin. Chutah chuan, kan sorkar hospital zawng zawng kan upgrade vek dawn; kan ICU zawng zawng operational-in kan siam vek dawn; doctor an mamawh anih chuan kan lakbelh dawn; nurse an mamawh anih chuan, an mamawh zat zat kan lak belh dawn. Kan Civil Hospital ho, PHC leh adang ho zawng zawng hi mipuite’n tlawm zawka an inenkawl theihna turin, chutianga upgrade chu kan tum a ni.

Aw le; a tawpna atan chuan, Pu Speaker, insit hi a na khawp mai a, kan thil tihah hian kan duhthu hi a sam bik miah lo. Amaherawh chu, kan theihtawp kan chhuah hi mipuiten min hriatpui se kan duh hle. Kan hmalakna reng reng hi sorkar insingsak felna - administrative reform; financial reform a ni satliah lova, moral reform a keng vek a ni. Kan chhungril lo dik lo laklawh tawh tihdikna kawnga kawng dik leh rinawmna kawng zawh hona tur, mipuite nen, kan sorkar-hnathawkte nen chu chu kum khat chhung hian kan ti ve nual hi kan lawm em em a. Tin, kan lawmna em em chu, sem tih rik a awm ta lo hi a ni. Dawn ve duha, hreh chung chung mahni awmna party leh thiante phatsana an pawla va inpek te a ngai tawh lo; mipui-sorkar a piang tawh a, mi taima apiangte tan he kan Bana-kaih policy hi a inhawng a ni. Zoram mipuite’n kan chungah an rinna nghatin sorkarna min pe a, chuvang chuan, Zoram-mipuite hi tihbeidawn kan tum lo a ni.

Pu Speaker, i lehlama mite pawh ka chah duh chu, inthlan leh hunah sorkar duhin kan inbei leh ang a, sorkarna kan inchuh leh dawn a. Kan inchuh lehna tur kawngah hian insawisel ringawt lam ni lo hian, tuna ZPM-sorkar aia tha din tum hian hma rawn la teh se. A tha zawngin i inel ila tichuan, keini sorkar aia tha a la din leh theih phei chuan a lawmawm khawp ang. Khati zawng khan kan ram hi inelna thianghlim nen kal ila a tha ang e. Tichuan, kha ka budget rawn putluh kha min pass-pui turin ka sawm che u.

SPEAKER : A lawmawm e. ‘Budget kha chu kan pass tur a ni rih lo a, tun hunah chuan general discussion a ni a’ kan ti nge, chuti zawng zawk chuan .. (**Pu Lalrintluanga Sailo**: Pu Speaker, pass-pui mai ila a tha lawm ni? I pass tlut tlut mai ang u). A lawmawm tlang e.

Hei, vawiina kan general discussion hi kan hah tlang a, Assembly Secretariat-in kan ban hunah ei leh in tur a buatsaih a, kan ei hram ang a. Tin, hei, Tuirial bialtu zahawm tak Pu Dawngtea khan nizan a hawnah vuak a tawh leh tawh loh a sawi duh si lova, i zawt kher tawh lo mai ang aw.

Aw le, vawiin atana kan business chu kan zo ta a, naktuk Ni 12th March, 2025 (Nilaini) chawhma dar 10:30 ah kan thukhawm leh dawn nia.

Sitting is adjourned. (5:57 PM)